

الطبعة  
الثانية

# هذا ما رأيته في

# دبي

يوميات  
مغترب



طارق حسن عبدالعال





يوميّات مغترب

# هذا ما رأيّت في

# دبي

تأليف

طارق حسن

مكتبة الإسكندرية  
التزويد



العنوان:  
**هذا ما رأيت في دبي**

تأليف:  
**طارق حسن**

إشراف عام:  
**داليا محمد إبراهيم**

**جميع الحقوق محفوظة © لدار نهضة مصر للنشر**

**يحظر طبع أو نشر أو تصوير أو تخزين  
أي جزء من هذا الكتاب بأية وسيلة إلكترونية أو ميكانيكية  
أو بالتصوير أو خلاف ذلك إلا بإذن كتابي صريح من الناشر.**

الترقيم الدولي: 977-14-4511-1  
رقم الإيداع: 8259 / 2012  
الطبعة الثانية: إبريل 2013

تليفون: 33466434 - 33472864 02  
فاكس: 33462576 02

خدمة العملاء: 16766


Website: [www.nahdetmisr.com](http://www.nahdetmisr.com)  
E-mail: [publishing@nahdetmisr.com](mailto:publishing@nahdetmisr.com)



أسسها أحمد محمد إبراهيم سنة 1938

21 شارع أحمد عرابي -  
المهندسين - الجيزة





## مقدمة

في حياة كل منا مواقف وأحداث لا يمكن أن ينساها، لما لها من بالغ التأثير على مجرى حياته، ومن أهم المواقف في حياتي تجرّبة سفري إلى دولة الإمارات العربية المتحدة، وخصوصاً دبي؛ فقد كان السفر والعمل بها أحد أحلامي ولكن ما لبث أن تحول هذا الحلم إلى كابوس لما قابلته من أعباء ومشاكل، و تمنيت لو أنني ما قدمت إليها وظللت أعمل بمصر الحبيبة، وبمرور الوقت والتأقلم مع متغيرات الحياة، أصبحت الإمارات من أحب البلاد إلى قلبي.


وها أنا أضع بين أيديكم مقتطفات من هذه التجربة لعلها قد تساعد في توعية الشباب الراغبين أو المقدمين على العمل بالخارج بما قد يصادفهم من مواقف أو مشاكل وكيفية التعامل معها لتجنب الوقوع في أخطاء وقع فيها الكثيرون وذلك من خلال سرد الأحداث التي مررت بها وأحداث مربها أناس عايشتهم وأصدقاء جلبتهم للعمل معي، وذلك في قالب لا يخلو من الفكاهة حتى لا يمل القارئ.

فאלله أسأل أن ينال هذا العمل إعجابكم..

والله ولي التوفيق

طارق حسن عبدالعال





## البداية: البحث عن فرصة سفر

كأي شاب، كنت أحلم بالسفر للخارج ليس فقط للعمل وجني الأموال ☺ وإنما لاكتساب الخبرات والتعامل مع جنسيات وثقافات مختلفة.

بدأت حياتي العملية في مصر بإحدى شركات البرمجة بالجيزة وتحديدًا في شارع الهرم بجوار كازينو الليل. وكانت الشركة توفر لنا سكنًا في نفس المبنى، فكنا نعمل نهارًا ونقف في الشرفة ليلاً ☺.

كنت لا أعرف أحدًا بالخارج كي يساعدني في الحصول على الوظيفة التي أريدها فما كان أمامي إلا خيار واحد وهو البحث على الإنترنت، فربما يحالفني الحظ وأجد غايتي.

كنت أمضي أكثر من ساعتين يوميًا بعد انتهاء العمل أتصفح فيها الإنترنت بحثًا عن وظيفة مبرمج في دول الخليج وتحديدًا دولة الإمارات العربية المتحدة.

أرسلت سيرتي الذاتية آلاف المرات ولكن دون جدوى، فلم يكن أحد يعيرني أي اهتمام بالرد على إيميلاتي ولكن كان أملي في الله كبيرًا فلم يعرف اليأس أو الملل لي بابًا، حتى بدأت بؤادر الأمل تظهر. ذات صباح وجدت ردًا من إحدى الشركات على البريد الإلكتروني، ثم بدأت المراسلات والاتصالات بيننا.





مضى أكثر من ستة أشهر في المراسلات والاتصالات وفي النهاية لم يحدث توافق بيننا على العرض وعقد العمل، كنت حزينًا لضياع الفرصة مني ولكنني كنت على يقين أنني سأحصل على فرصة أفضل منها.

وبالفعل لم يمض أكثر من أسبوعين حتى جاءني اتصال من صاحب إحدى الشركات في دبي، حدثني بالإنجليزية خمس دقائق يسألني عن نفسي وعن خبراتي ثم أخبرني بعد ذلك بالعربية أنه مصري يمتلك شركة لصناعة البرمجيات في دبي ويريدني أن أعمل معه فرحبت بذلك على الفور، فأخبرني أنه سيرسل لي بعض المهام (Assignment) علي إنجازها خلال يومين وذلك ليختبر قدراتي العملية ثم سيختبرني بعدها شفويًا تليفونيًا أو أونلين عن طريق المسنجر. ومع رخامة وصعوبة ما طلبه في الـ (Assignment) فإنني أنجزتها في يوم واحد بفضل الله. بعدها أرسل لي عرض العمل، فسألته عن الاختبار الشفوي فقال لست بحاجة إليه فقد تأكدت من خبراتك.


بعد ذلك تحدثنا عن تفاصيل عمل الشركة وكنت بطريقتي في الكلام أجعله يشعر بأنني المنقذ وأني الوحيد الذي يستطيع الاعتماد عليه، والحقيقة بمجرد دخولي دبي حدثت بها أزمة اقتصادية 😊.

تناقشنا في تفاصيل العقد وتم التوافق والحمد لله، ثم طلب مني أن أرسل له صورة شخصية وصورة لجواز السفر حتى يستخرج لي الفيزا. وبالفعل أرسلت له ما طلب فقد استخرجت جواز سفري منذ فترة تحسبًا لأي عرض قد يأتي.

تم هذا كله في شهر تقريبًا، فقد كان أول اتصال بيننا يوم 24 مايو 2008 وتم استخراج الفيزا يوم 25 يونيو 2008، وقمت بالحجز للسفر في اليوم التالي.







## في المطار


انطلقت إلى المطار يوم 27 يونيو 2008 وقمت بتوديع أبي وأمي (بارك الله لي فيهما) على بوابات الدخول وكانت لحظة لا توصف، فهي المرة الأولى التي أترك فيها بلدي ذاهبًا إلى المجهول. وبعد العديد من القبلات والأحضان الحارة، هممت بالدخول تاركًا أبي وأمي والحزن يعتصرهما.

وإذا سمح لي القارئ الكريم، فسأحدث باللغة المصرية العامية حتى أسرع في الكتابة وأختصر في الوقت، فقد اضطررت إلى ترك أبي وأمي في المطار منذ قليل فلا بأس أن أترك اللغة العربية شبيهة الفصحى إلى إشعار آخر، أو من نظرة أخرى، فلم ولن أترك لغتي المصرية أينما ذهبت ومهما حدث، فأرجو أن يتسع صدرك لهذا.



وانا داخل لقيت واحد بيقولي إنت رايح دبي؟ قلت أيوه قاللي طب خد البنّت دي معاك عشان مسفرتش لوحدها قبل كدا. قلت ماشي قال يعني أنا اللي سافرت قبل كدا؟ 😊، يلا يا بنتي رزقي ورزقك على ربنا.





دخلت أنا والبنت وخلصنا الإجراءات ورحنا نستنا الطائرة. وطبعًا مكنش معايا التليفون، فقلت لها ممكن بس أكلّم أهلي دقيقة عشان اطمئنهم ويمشوا، أهو نستفاد منها بحاجة، قالت شوور اتفضل، بس اكتب 002 قبل الرقم عشان دا خط دولي، قلت إيه الإحراج دا، بردوو هتصل.

واحنا قاعدين بدأنا نتكلم وهي ما صدقت إني أسألها سؤال. كان عندها حوالي 16 أو 17 سنة، مصرية عايشة في دبي وكانت نازلة زيارة لجدها وفضلت تكلمني عن الفرق بين مصر ودبي بطريقة استفزتني لما كنت هضربها، بس قلت مينفعش دي أمانة 😊.

فضلت تحكي، الزبالة بترمي في الشارع، مفيش عداد في التاكسي والسواق بيتحكم فيك، الشباب والمعاكسات وقلة الأدب، وتروح تاكل في مطعم تلاقي الفاتورة طالع فيها ضريبة، وأنا أدافع: لا لا مصر دي أمي، متقوليش كدا، لا لا لا لا، ولكن لا حياة لمن تنادي.

وأول ما وصلت دبي قلت فعلاً عندك حق والله، بس بردو فضلت مصر أمي بس في الرضاعة 😊.

المهم البنت أوصتني إني أقعد جنب الشباك لو عرفت يعني، عشان اشوف المدينة اللي في البحر، بس للأسف مكاني مكنش جنب الشباك وركبت الطائرة وأخيراً ركبته لأول مرة.

طبعًا مكنش قلقان ولا حاسس بالخوف زي ما بيحصل للناس كتير من أول مرة. سبحان الله مش عارف ليه، بس كان إحساس جميل وانت راكب الطائرة لأول مرة! (دي استعارة مكنية تفيد التحنيس للي مركبوهاش قبل كدا 😊).





## يوميات مُغترب

لما نزلت هناك المفروض إني معايا صورة من الفيزا بتعتي وهاخذ الأصل من المطار من مكتب الإيداعات، زي ما مدير الشركة مفهمني. رحت لمكتب الإيداعات لقيت أصل الفيزا ضايع وفضلوا ساعة يبحثوا عنها ولكن دون جدوى، في الآخر ختمولي الصورة قلت بدايتها كدا.... ربنا يستر!

البنت اللي كانت معايا استتني شوية عشان نخرج سوا، لكن بسبب التأخير سبتني وخرجت، بعطني من أول لحظة.

المهم طلعت من باب الخروج، فيه حاجة مهمة، أنا معرفش شكل المدير اللي مستنني ومعرفش مستنني فين ولا معايا تليفون، طب هلاقيه ازاي، غير إني اتأخرت ساعة وممكن يكون مشي يا انهار ابيض، إحنا فينا من كدا!

خرجت من المطار ومش عارف اروح فين.... طب الراجل ده مش يقولي لما تطلع من المطار هيحصل كذا وكذا مثلاً.... لقيت ناس ماسكة ورق مكتوب فيه أسماء لأشخاص، قلت أكيد إسمي هيبقى مكتوب على أي ورقة من دول، لفيت عليهم واحد واحد، اسمي مكتوب.. لا، إلی بعده، إسمي مكتوب... لا. طب وبعدين أعمل إيه؟ الجو حر نار كانت درجة الحرارة من 39 لـ 42 وكانت الناس بتجيب مطر مش عرق وطبعاً أنا بقى لابس البدلة ويمكن كنت الوحيد اللي لابس بدلة، كل الناس لابس مش لابس وأنا هعيط من الحر. منك لله يلي في بالي، منك لله يا جمال يا مروان.

المهم لقيت قدامي بنت من اللي شفتهم كتير في الطائرة وعند أخذ الحقائق وكان معها موبيل، قلت بس هي دي الحل، رحلتها وقلت لو سمحتي ممكن



## هَذَا مَا رَأَيْتَ فِي دَلِي


الموبيل لحظة قالت اتفضل قول الرقم، مش عارف خافت إني آخذ الموبيل وأجري، المهم قتلها الرقم واتصلت وقالت اتفضل...

الوووو.....أيوه يابن ال.....أيوه يا بشمهندس.. حضرتك فين؟ قال أنا عند نقطة الالتقاء meeting Point لابس تي شرت أخضر. طيب أنا جيلك.

شكرت البنت وقلت هي فين نقطة الالتقاء؟ قالت هناك، رحت لقيته واقف لابس نظارة شمس وواقف في التكييف.

البشمهندس عامر؟ أيوه ازيك؟ الحمد لله. سلم عليا وخدني بالحضن والبوس، مصريين بقي. طبعاً كنت مبسوط إنه مصري، أكيد هيفهمني وافهمه ولكن خاب ظني بعد ذلك، يا ريتو ما كان مصري.





## اليوم الأول في الإمارات

في الطريق من المطار للسكن، بدأ يسألني عن خبراتي والحاجات اللي اشتغلت فيها وبعدين كلمني عن الشركة وإننا شركة صغيرة بس عندنا شغل كثير وبنكبر وعندنا عملاء كثير وشغلنا في مجال كذا وكذا، وقبل كذا أنا جيت ناس من مصر وقعدوا شهرين بس مكنوش كويسين فمشيتهم. كانت مشكلتهم في السكن وكانوا بياخدوا في الطريق 3 ساعات رايح وساعتين جاي، فكانوا بيعجوا تعبانين وهالكانيين وأوقات نايمين، وكانوا بيقعدوا في الأوضة حوالي 9 وشوية حاجات قاهالي افتتاحية، عشان كذا فكرنا نوفر سكن للناس اللي هتيجي لأن السكن أهم حاجة، لو الشخص مرتاح في السكن ومش بعيد عن الشغل أكيد هيبقى شغال وييدي كويس.

بالنسبة لللاتين المصريين اللي اشتغلوا شهرين فحكايتهم ببساطة إنهم خلصوا المنحة ITI وبعدين دوروا على فرص شغل خارج مصر وطبعًا الإنترنت على النت بتبقى بنسبة كبيرة أسئلة في الأساسيات فقط. Logic concepts وبتوع المنحة الحاجات دي بتبقى عندهم كويسة بس طبعًا من غير خبرة. مشكلة كبيرة، فلما راحوا هناك مكنش فيه شغل ظاهر ليهم، طبعًا اللي



بيروح بيروح زيارة لأن بعد الزيارة صاحب الشركة بيحدد هل الشخص دا هيكمل ولا لا.

الزيارة كانت الأول شهرين فبها خدوا الشهرين وبعدين قاللهم إنتو انزلوا مصر خدوا خبرة وبعدين فكروا في السفر. أنا كمان كنت رايح زيارة لمدة شهرين، سمعت الكلام دا، قلبي اتقبض، قلت في سري هو بيخوفني ولا إيه ويقصد إيه من الكلام ده.

المهم رحنا على الشقة وهو مكش يعرف مكانها بالتحديد فاتصل على شريكته وكانت أردنية، اسمها دينا. قابلتنا ورحنا على الشقة، شقة كانت جميلة وفاضية. كانت في منطقة اسمها النهضة، موجودة في آخر الشارقة وأول دبي. وكنت أنا أول واحد يسكنها لأنه لسه متأجرها جديد والبنية أصلاً جديدة وهو لسه هيجيب ناس غيري على حسب قوله.

المهم قاللي إنك بكرة هتيجي على الشغل واداني العنوان في ورقة وقاللي هتاخذ تاكسي وتديله العنوان وهو هيوصلك. وخلي بالك أصعب حاجة هنا المواصلات، ممكن تفضل وقت طويل متلقيش تاكسي، فمتز هقش بسرعة. قلت ربنا يسهل.

أعطاني ألف درهم حق التذكرة، طبعاً أنا كنت متفق معاه إن تذكرة الطائرة عليه وقاللي هتخدها يوم ما توصل. وبالفعل أعطاهالي في نفس اليوم الي وصلت فيه.

حطيت حجاتي وأخذت دش ورحت عشان أكلم أهلي على الإنترنت أطمئنهم عليا. ببص على ساعة الإنترنت لقيتها بـ 5 دراهم. يا يهوي. يا يهوي.



## يوميات مُغترب


يا يهوي، دا الدرهم بجنيه ونص يعني ساعة الإنترنت بـ 4 جنيه ونص،  
من أولها كدا؟ دا خراب بيوت. قلت أدخل نص ساعة عشان أطمئن أهلي  
وأخرج بسرعة. لقيتو بيعاسبني على النص ساعة بـ 3 دراهم.. قلت بدايتها  
فل، ربنا معانا.

طلعت على الشقة أكلت، الحاجة الوالدة كانت متوصية بيا شوية في  
موضوع الأكل، ربنا يباركلي فيها يا رب. وبعدين نزلت تحت أتمشى شوية  
واشوف الدنيا فيها إيه. لقيت واحد قاعد في مدخل العمارة، سلمت عليه  
طلع عربي، سألته عن الوضع وقلتله إني لسه جاي جديد، طلع مصري..  
ميه ميه.. فضل يحكي لي شوية عن المصاريف والدنيا هنا نار وخلي بالك من  
الميه اللي فوق إوعى تشرب منها، مية الشرب هنا معدنية وبس... قلت نعم.  
قاللي آه الميه اللي فوق تجيب فشل كلوي في أسبوع واحد. قلت يا ستار يا رب،  
ربنا يستر.

قلتله هسيبك دلوقتي واروح السوبر ماركت أشتري شوية حاجات.  
قاللي اتفضل.

رحت على السوبر ماركت ويا رتني ما رحت....





## في السوبر ماركت

دخلت السوبر ماركت قلت اشوف الأسعار عاملة إيه، كل شوية واحد يقولي الأسعار غالية، الأسعار غالية. وكم إن أشترى شوية فاكهة وشوية خضراوات، الواحد في مصر كان متعود موز، تفاح، خيار، خس، الفيتامينات والحديد والحاجات التيك اواي 😊.

أول ما دخلت لقيت في وشي الموز قلت حلو قوي، مسكت موزاية وقلت بكام الموز، هاو ماتش، قاللي 0.75 درهم قلت اية دا بجد الكيلوب 0.75 درهم قاللي لا الصابع، البنانية بـ 0.75 درهم، رميتها من إيدي وقلت أعوذ بالله، طيب التفاح بكام، قاللي الواحدة بدرهم، إرمي.. طيب الخيار حبيبي بكام، قاللي الكيلوب 6 دراهم قلت نعم احنا فينا من كدا، حتى الخيار.. دا أنا انضحك عليا بقى وشكلي هشحت على آخر الشهر. قلت أكمل أسئلة واشوف هشتري ايه في الآخر، طيب كيلو الطماطم بكام؟ قاللي بـ 5 دراهم، طيب الخس بكام، قاللي الواحدة بـ 4 دراهم.. يا يهوي.. يا يهوي... دا أحلى خسارة فيك يا مصر بـ 50 قرش ودي متجيش نصها كمان.... وينقول الأسعار غالية في مصر! يا حبيتي يا مصر يا مصر، يا حبيتي يا مصر يا مصر.





## يوميات مُغترب

قلت في نفسي الحاجات دي كلها قشور ممكن نستغني عنها، خلىنا في الأساسيات، الرز بقى، كيلو الرز بكام؟ قاللي بـ 8 دراهم.. كان هيغمن عليا على طول، أنا عمال اضرب السعر بالمصري في كل حاجة كيلو الرز بـ 12 جنيه، الخساية بـ 6 جنيه، كيلو الخيار بـ 9 جنيه، التفاحة بـ 1.50 جنيه، الموزاية بحوالي جنيه. ليه كدا، دا حرام والله، ربنا ميرضاش بالظلم، شكلي هشوف أيام ما يعلم بيها إلا ربنا. الحاجة الوحيدة اللي لقيتها رخيصة هي الكانز، ودا اللي كنت مستغربلو، علبة الكانز بـ 1 درهم بس.

ومكديش عليكوا، مشترتش أي حاجة من الحاجات اللي فوق دي كلها، زي ما قلت دي كلها قشور ☺، اللهم إلا قزازه ماء وفرشاة ومعجون وكانوا غاليين والله بس هعمل إيه، مضطري يا جماعة. حمدت ربنا إني سمعت كلام أمي وجبت معايا الأكل اللي كانت مجهز هولي، أكل يكفيني أسبوع على الأقل، رز ولحمة وفراخ وجبنة وشوية طماطم وخيار وخبز، ربنا يجازيكي عني خير يا أمي.

قلت لما أخلص الأكل اللي أنا جايه دا يبقى ربنا سهل، - في الطريق دماغي عمالة تحسب في فرق الأسعار والمتوقع إني اصرفه في الشهر، طبعا كل الخطط والتوقعات اللي كانت مخطوطة في مصر تبخرت تماما. وبدأت أغني وانا ماشي... ياريتني، وغلطة، إنسى.

ياريتني... مجيت وفضلت في بلدي.


غلطة... إني مسعمتش كلام الناس.

إنسى... إنك توفر حاجة.

دا احنا لسه بنتكلم على أول حاجة.. الأكل، أمال الحاجات الثانية هيبقى

فيها إيه؟ يارب سلم.. سلم.





## في التاكسي

تاني يوم كان السبت، أول يوم ليا في الشغل، نزلت بدري عشان أروح الشغل، المدير كان محذرنى من المواصلات قايلي بالحرف. أصعب حاجة في الإمارات هي المواصلات، صعب جدًا إنك تلاقي تاكسي الصبح.. نزلت بدري، أول ما طلعت على الشارع مفيش 3 دقائق إلا والتاكسي وقفلي قلت تمام ما العملية سهلة والشوارع فاضية أهيه... أمال الراجل دا بيضحك عليا ولا إيه؟

ركبت التاكسي... رايح فين؟ إديته العنوان في الورقة... قاللي أوك... بدأ العداد. 2.5 درهم... قتلته إيه ياعم دا.. إحنا لسه ع الصبح.. ليه 2.5 إحنا لسه مشينا؟ قال دي بداية العداد... قلت يا اولاد الحرمة... ربنا على الظالم.. طبعًا هو مش فاهم عربي فبتكلم براحتي.. حتى في السوبر ماركت.. كلهم هنود أو باكستان.

طول الطريق عيني منزلتش عن العداد، 10 درهم يعني 15 جنية، 15 درهم، 20 درهم، ولسه موصلناش وكل يوم كدا. يا نهار يا نهار، يا بياض يا بياض.

طبعًا مفيش مواصلات عامة يعني آخرك تاكسيات. المهم وصلت والعداد على 25 درهم وقاللي إن احنا عدينا على حاجة اسمها سالك بتخصم 5 دراهم



## يوميات مغترب

يعني عايز 30 درهم (طبعا دا كان بيستغفلي عشان عرف إني لسه جديد وأصلا مكش فيه سالك في الطريق.. سالك دي بوابة إلكترونية بتخصم 4 دراهم للي يعدي منها، دي عشان تخفف الضغط على الطرق الرئيسية.. المهم اديتله الـ 30 درهم وقلبي بيتقطع، 45 جنيه يا جدعان وفيه زيهم وانت راجع وكل يوم كدا، عشان كدا صاحب الشغل قاللي المواصلات عليك، يابن الدين، هقول إيه.. حسبي الله ونعم الوكيل، حسبي الله ونعم الوكيل.

افتكرت البنت بتاعة المطار اللي بتقولي التاكسي في مصر بيتحكم فيك ومفيش عداد، ياختي خليه يتحكم براحتو، دا آخروا بياخد 20 أو 30 جنيه ويلف بيك مصر كلها، إنما دا في 20 دقيقة خد 45 جنيه وبالقانون والعداد ومحدث يقدر يقول لا 😊. إذا كان تاكسي مصر بيتحكم في الأجرة قبل ما يتحرك فتاكسي الإمارات بيتحكم في الأعصاب والضغط والسكر والبنكرياس والشرابين أول ما يتحرك 😊.

وصلت الشركة الحمد لله، ووصلت بدري، ولما جيه المدير سألني.. ها إيه الأخبار؟ قلت الحمد لله.. كله تمام، ولقيت تاكسي على طول، مفيش زحمة ولا حاجة. بقولها كدا بأسلوب المتصر كأي بقولله إنت كذاب مفيش زحمة بتخوفني ليه يا وحش؟

لقيتو بيضحك ضحكة شريرة وقاللي عشان انهارده السبت ومعظم الشركات أجازة انهارده فمفيش زحمة في المواصلات ولقيت تاكسي بسهولة. قلت في سري ربنا يطمئك.

وبالفعل ثاني يوم عرفت يعني إيه صعب تلاقي تاكسي، كان أصعب يوم ليا في دبي الأحد 29/06/2008.







## في التاكسي (الوش الثاني)

طبعًا يوم السبت أنا يدوبك خرجت مفيش خمس دقائق الطريق كان فاضي ولقيت تاكسي وصلني الشغل في 20 دقيقة... يوم الأحد بقى نازل لا بيا ولا عليا وفي نفس المكان اللي ركبت منه التاكسي امبارح، وفجأة صرخت... يا نهار ابيض.... إيه دا كلو، لقيت عربياااات ملهاش أول من آخر، بجد مهما أقول مش هعرف أوصف، عربيات زي النمل، وطبعًا عربيات ايه... همر... مرسيدس.... بي إم دبليو.. فورد.. جاكور... عربيات بنشوفها في الأفلام والمسلسلات بس، تمورة والهضبة أو مرشح مجلس الشعب أو البودي جارادات بتوع رجال الأعمال وهذه العينة من الناس.

طيب أنا هلاقي تاكسي فين وسط ماسورة العربيات اللي انفجرت دي، وأصلاً التاكسي هيو صلي ازاى من العربيات دي كلها، دا العربيات بتمشي زي السلاحف من الزحمة، قلت امشي قدام على أول الطريق يمكن ألاقى حاجة، لقيت عربيات أكثر، طبعا درجة الحرارة كانت فوق الاربعين وبلا حسد، والله من الحر كنت حاسس إنى واقف تحت دش مية من العرق. عيشوا الموقف كدا، درجة الحرارة النار، الشمس المحرقة، دا غير إن الجسم

## يوميات مُغترب

لسه أصلاً متأقلمش على الاختلاف بين البيئة المصرية والبيئة الإماراتية، زي ما كانوا بيقولولنا في علوم تالته إعدادي، الدب القطبي والكانجارو والتأقلم والحاجات دي.

أخيراً أشوفت تاكسي، يا مسهل يارب، جريت عليه، بافتح الباب لقيته مقفول، ولقيت السواق بينزل زجاج الباب اللي قدام، وبابتسامة كدا بيسألني بالإنجليزي رايح فين، قتلته دبي قاللي سوري وراح رافع زجاج العربية وماشي. مرة واثنين وثلاثة وأربعة، نفس الطريقة ابتسامة. رايح فين. سوري ويرفع زجاج العربية ويمشي. إيه دا يا جدعان هي دبي فيها بيع ولا إيه؟ وبعدين دا تاكسي ولا عربية خاصة عشان يوافق ويرفض، دا لو في مصر مش هيعملوا كدا. فين البنت اللي مكنش عجبها مصر دي تيجي تشوف. فضلت على كدا تقريباً ساعة ونص لما تاكسي حنّ عليا ورضي يوديني دبي دا بعد ما المواصلات خفت شوية، بس تخيلوا ساعه ونص ومفیش مكان ضل الواحد يقف فيه، عشان تقف في الضل عند عمارة مثلاً يبقى تروح بعيد عن الطريق، يبقى انسى تلاقي تاكسي، دا غير إن الهواء نفسه سخن، جو نااااار يا جدعان، فعلاً الواحد لازم يعذر الناس اللي بتمشي لابسة من غير هدوم، مضطرين بردوا 😊.

وطبعاً في زحمة المواصلات العداد بيعد والتاكسي بيمشي زي السلحفاة، بس مش مهم، يعد زي ما يعد، المهم اني ركبت في تاكسي يرحمني من الحر اللي انا شفته.

إيه دا، يعني الأسعار معدتش فارقة معاك والعداد عمال يعد أكثر وانت



بتقول يعد زي ما يعد؟! هقول إيه، مهو لو الواحد عنده صداع وعمال يقول آه يا راسي وبعدين جالو مخص فطيع، هيقول آه يا بطني ولا آه يا راسي؟ 😊.

يوم السبت طلعت من البيت الساعة 7:30 الصبح، ركبت التاكسي ووصلت الشركة على 8:00 الصبح، يعني في 25 دقيقة. يوم الأحد طلعت من البيت 7:30 الصبح بردو، ركبت التاكسي 9:10 صباحًا، ووصلت الشركة 10:15 صباحًا.. تخيلوا بقى المعاناة في الشمس والحر كانت عاملة ازاي!

فضلت على الموضوع ده لمدة 3 أسابيع شفت فيها أيام ربنا ميوريها لحد ولا يعودها تاني. لكن خلال الـ 3 أسابيع كان فيه مرتين أو ثلاثة مختلفين، مرة اتنين عرب صعبت عليهم وأنا واقف في الشمس وفي نص الطريق مش لاقى تاكسي، سألوني رايح فين، قلت دبي وسبحان الله كانوا رايحين نفس المبنى اللي فيه الشركة بتاعتي، غبي أنا بقى مطلبش منه رقم الموبيل أو أي وسيلة اتصال، لأ.. شكرتهم ومشيت. بعد كدا عرفت إن فيه حاجة اسمها كار ليفت أو بالعربي إنك تتفق مع شخص عنده سيارة يوصلك الشغل ويرجعك مقابل مبلغ من المال شهريًا، عادة الشخص دا بيكون شغال قريب من شغلك وساكن قريب من سكنك. طبعًا أنا مكتتش اعرف الحاجات دي كلها، كنت لسه جديد وبالصرامة اتكسفت إنني أطلب منهم رقم موبيل أو حاجة، كانت فرصة من ذهب، لكن الحمد لله على كل شيء.

مرة ثانية واحد هندي راكب عربية لاند كروزر، حاجة جامدة كدا، راح وقفلي وسألني أي مساعدة.. رايح فين، قلتله دبي وقلتله على العنوان، قاللي أنا مش رايح هناك بس ممكن آخذك لأول دبي بحيث تلاقي تاكسي بسهولة،



## يوميات مغترب

قلته أوك شكرًا. وركبت معاه ومنستش طبعًا آخذ رقم الموبيل وفضلنا على اتصال كام يوم كدا، بس مجتش فرصة إني أقابله تاني.


مرة تالته ورابعة كان فيه عربيات بتقفلي (ومحدث يفهمني غلط) ويسألني رايح فين ويقول هو صلك بمبلغ 30 أو 40 درهم على حسب كل واحد، وكنت بوافق طبعًا، أهو ينقذني من وقفة الشارع والجو النار.

بدون مبالغة والله، خلال الـ 3 أسابيع الأولى دي دفعت في المواصلات أكثر من تلت مرتبي. هقول إيه؟ منك لله يلي في بالي، منك لله يا جمال يا مروان. المواصلات كانت أكبر مشكلة بالنسبالي، بسبب المعاناة اليومية، كرهت فيها دبي، واللي عايز يشتغل في دبي، واللي يفكر يشتغل في دبي، واللي يساعد واحد إنه يفكر يشتغل في دبي، واللي يقول لواحد إنه يساعد واحد إنه يفكر إنه يشتغل في دبي.

دي عينة من زحمة المواصلات من نفس المنطقة اللي كنت بركب منها يوميًا، على اليوتيوب

<http://www.youtube.com/watch?v=seW0YP2BcaI>





## في الشركة

في أول يوم ليا في الشركة اتعرفت على الموظفين:

سجريد Segrid، السكرتيرة، فلبينية بقالها في الشركة شهرين.

واردة أو فاردة Varda 😊. مبرمجة هندية بقالها في الشركة شهر.

أرون Arun مبرمج هندي، أقدم موظف في الشركة... بقاله في الشركة 3 سنين وجايله فرصة حلوة في مكان تاني وكلم المدير إنه عاوز يمشي والمدير قاله لما ييجي حد كويس اعتمد عليه هخليك تمشي (المفروض إني هكون الشخص دا).

عامر، المدير مصري كان مبرمج وكان شغال في حكومة دبي وحاليًا مستشار تكنولوجيا معلومات في وزارة ال... بعمان وفاتح الشركة دي بيتابعها من عمان ومن دبي في أيام أجازته الأسبوعية. بيسافر عمان جمعة ويرجع دبي الأربعاء آخر النهار. المسافة بين عمان ودبي بالطيارة 35 دقيقة وبالعبية 4 أو 5 ساعات، يعني موضوع سهل.

دينا، أردنية مبرمجة ومساعدة المدير وشريكة بنسبة 20٪ في الشركة.



## يوميات مغترب

شريكة بشغلها ومجهودها لأن المدير يقدر الموظفين حسب شغلهم (على حد قوله)، غير متزوجة، نشيطة جدًا، جميلة، بس أكبر مني ومحدث يفهم غلط أنا بشجع المنتج المصري.

دخلت مع المدير في اجتماع وبدأ يعرفني على نظام الشركة وطريقة الشغل وعملاء الشركة وسوق العمل وإنه عاوز يكتر الشركة ويحيب موظفين كثير ويفتح أكثر من فرع وخصوصا في مصر بس متردد عشان مفيش ناس يعتمد عليها. وقال لي لو انت أثبت نفسك معايا ممكن انزلك مصر ونفتح فرع هناك وتبقى انت مدير فرع مصر، أنا هعلمك كل حاجة بنفسي وهتستفاد مني كثير. فياريت تحاول تتعلم كل حاجة أقولها لك، إنت شايف دينا بمجهودها وشغلها بقت شريكة ليا بـ 10% وبعد كذا زودتها لـ 20% فلو انت اجتهدت وأثبتت نفسك أكيد هيبقى ليك مستقبل كويس معايا.

وقالي أنا جبت ناس كثير قبل كذا، كان أكثر حاجة بتتعبهم السكن، كانوا ساكنين حوالي 9 في الغرفة وبـ 1200 درهم في الشهر وكانوا بياخدوا 3 ساعات عشان يوصلوا الشغل فتخيل العذاب اللي كانوا فيه ودا كان بيأثر على أدائهم وشغلهم. عشان كذا أجرت الشقة اللي أنت قاعد فيها وفرشتها عشان انت والشباب اللي لسه هيجوا يكونوا مرتاحين فتعرفوا تشتغلوا كويس (إسلوب معايرة يفيد كسر العين مع إن دا جزء من الاتفاق، ما علينا).

وبعدين قلّي إنه معظم الوقت هيكون في عمان وهيتابع معايا الشغل من على النت ولو فيه أي استفسار أو حاجة هتصل بيك ف لازم يكون عندك مهارات اتصالات عالية communication skills.





## هذا ما رأيت في دبي

كلام جميل، كلام معقول، مقدرش اقول حاجة عنه، لكن خيال طارق المجنون لسه هنشوف كتير منه 😊. شركة صغيرة الواحد ممكن يكبر فيها وبشوية مجهود يبقى شريك، أو يبقى مدير فرع في مصر ويجيب شوية مبرمجين ويتأمر عليهم... أنت يا بني تعالى اعمل البتاعة دي.... إنتي يا بنتي تعالى اعملي الحاجة دي.... إنت ياد معملتش الحاجة دي ليه؟ وجهك ياد... طاخ طاخ طاخ... معلش يا معلم... قصدي معلش يا بشمهندس والله نسيت.

نسيت؟؟؟ نسيت تاكل... نسيت تعكّن على أبوك... نسيت تستحمي في الفسين؟ 😊.

أحلام يقظة بتمر قدام عينا بعد الاجتماع. أنا جه في بالي حدوتة صغيرة... حلوة قوي.

كان فيه واحد فقير لقي 100 جنيه... راح اشترى بيها طقم أطباق زجاج شيك جدًا عشان يتاجر فيه وحطه جنبه كدا وقعد يتخيل.. آه لو بعت الطقم دا بـ 200 جنيه... وبعدين أشترى طقمين وابعهم بـ 400 جنيه وبالك 400 أجيب 4 اطقم وابعهم بـ 800 واجيب وابع واجيب وابع لحد ما اعمل ثروة وبعدين اشترى فيلا واجوز ويبقى عندي خدام وحشم واخلف ولد ويكبر ويدخل المدرسة واسأله بتعمل الواجب ولا لا... ولو في يوم قالي معملتش الواجب لازم اضربه واعلمه الأدب... خد ياد معملتش الواجب ليه واديله بالشلوت كده ووووو ورا ح ضارب طقم الأطباق برجله راح مكسره وضاعت كل أحلامه.. 😊 حد فهم حاجة.

عدى أول يوم في الشغل عادي... وبعد الاجتماع، المدير عمل حفلة

## يوميات مُغترب

صغيرة بمناسبة قدومي عضوًا جديدًا في الشركة وطلب لنا بيتزا عشان يبقى عيش وبيتزا.


لكن دا كله مكنش في دماغي ولا حفلة ولا بيتزا ولا دايو ولا بيبي، كان فيه حاجة تانية هي اللي شاغلة دماغي، عقد العمل.

مع كل قطعة بيتزا كنت بسأل نفسي يا ترى همضي العقد إنهاردة ولا لأ.  
مع كل شوية كاتشب تنزل على قطعة بيتزا كنت بسأل نفسي يا ترى همضي العقد إنهارده ولا لأ.

مع كل واحدة شاليمو بحطها في علبة كانز جديدة كنت بسأل نفسي يا ترى همضي العقد إنهارده ولا لأ 😊.

كنت منتظر إنه يكلمني عن العقد، مهو مينفعش أنا اللي اسأله عن العقد.  
يقول عليا إيه؟ من أول يوم بيسأل عن العقد.





### والا عقد الااا

لسة مفوقتش من تأثير أول 3 مشاكل قبلوني. (أسعار المواد الغذائية. أسعار التاكسيات. زحمة المواصلات مع الحر)، إلا وظهرتلي المشكلة الرابعة. «العقد».

سفري للإمارات كان عبارة عن زيارة مدتها شهران، خلال الشهرين وحسب الاتفاق مع صاحب الشغل، هيخلص عقد العمل والفيزا والإقامة بتاعتي. لكن لو الشهرين دول خلصوا ولسه الإقامة مطلعتش يبقى لازم أغادر وإلا هبقى مخالف وهدفع غرامة 100 درهم على كل يوم ليا في البلد بعد الشهرين. موت وخراب ديار مش كدا؟

يعني بعد ما سبت شغلي في مصر وعاشش الدور وجايلك يا دبي. (عندليب الدقي 2)، بقيت إيد في الميه وإيد في النار، تحت رحمة صاحب الشغل، ممكن بعد الشهرين ما يخلصوا أو حتى قبل ما يخلصوا، يقولي: سوري مش هينفع نكمل سواء، أو لازم نسيب بعض ☺، بالبلدي روح على بيتك يا شاطر. فيه فرق شاسع بين روح على بيتك يا شاطر من القاهرة وبين روح على









وبدأت الأحلام الوردية تضيع، مفيش شقة ولا شبكة ولا مهر ولا عفش  
ولا عروسة من الأساس، مين اللي هترضى بالفاشل؟ (باعتبار ما سيكون..  
يعني هعنس ومش هدخل دنيا إلا على الأربعين أو الخمسين، كفاية كدا  
عشان هعيط وأنا دمعتي قريبة.


فعلاً فيه ناس كتير بتبقى فاكرة إن السفر راحة... وإن المسافر هيقعد  
على مكتب حاطط رجل على رجل زي الباشا وهياخد مرتب قد كدا ويعبي  
الشنطة اللي مسافر بيها فلوس.

وكما قالت المغنية اللي ولا واحدة صدقتها «متفكروش يا بنات إن الجواز  
راحة، ومتزعلوش يا بنات لو قلنا بصراحة، إن الجواز عمره، عمره ما كان  
راحة».

فأنا من واقع تجربتي اللي معداش عليها كام يوم بقول للشباب وعارف  
إن ولا واحد هيصدقني «متفكروش يا شباب إن السفر راحة، ومتزعلوش  
يا شباب لو قلنا بصراحة، إن السفر عمره، عمره ما كان راحة» 😊.

عموماً بلاش نتشائم واخلونا نشوف الأيام الجايه هيكون فيها إيه، أكيد  
هتبقى أحسن إن شاء الله وأكيد المشاكل هتبدأ تتحل، دعونا نستبشر خيراً،  
دعونا نعمل في صمت 😊.






## وتتوالى الاختبارات

بدأت أتأقلم مع الشغل والشركة وبدأت آخذ شغل بسيط في الأول  
عشان أكون ملم بالبرنامج اللي هشتغل عليه. كان برنامج إدارة العقارات  
من حركات بيع وشراء وإيجار وسداد أقساط وعقود وشيكات وحججات  
تانية كثير.

أنا مكنتش اعرف أي حاجة عن العقارات وأنا في مصر غير إعلان مدينتي  
واحجز شقتك وخدها بعد 30 سنة ولو مت هنديها للورثة، يعني مجال جديد  
بالنسبة لي 😊 فكان لازم اتعلم مفاهيمه وأساسياته بالإضافة للشغل اللي  
كان بينطلب مني أعمله.

عدى أول أسبوع على خير والمدير سافر عمان الجمعة ورجع يوم الاربعاء  
بالليل وكانت الأمور مستتبة والحياة فلة والحمد لله لا يشوبها إلا هاجس  
العقد اللي لسه متمضاش.

يوم الخميس كان عنده أكثر من اجتماع واليوم خلص من غير ما نقعد مع  
بعض ولا نناقش أي شيء وقاللي هنتقابل الجمعة الساعة 10 صباحًا عشان



نتكلم على رواقه واشوف شغلك واديك شغل للأسبوع الجاي. طبعًا واحد هيسأل هو يوم الجمعة مش أجازة؟

المفروض إن الجمعة والسبت أجازة لكن عشان الظروف اللي انت جاي فيها وضغط الشغل وعشان لازم تكون ملم بالبرنامج في أقل وقت لإن آرون المسئول عن البرنامج عاوز يمشي ومقدم استقالته وانت اللي هتمسك مكانه وهتكون مسئول عن كل حاجة، فكان لازم تشتغل السبت.

دي كانت الإجابة النموذجية اللي كنت بسمعها لما أجيب سيرة إن السبت المفروض يكون أجازة. أما بالنسبة للجمعة؛ فلان المدير بييجي من عمان يوم الأربعاء بالليل وعادة يوم الخميس بيكون عنده اجتماعات كتير مع عملاء للشركة فمبيلحقش يشوف شغل الأسبوع اللي خلص ويديني شغل الأسبوع الجديد فعشان نلحق نعمل دا كله بنروح الجمعة من الصباح لحد العصر وهو بيروح بعدها على المطار على طول. طبعًا دا كان اختبار ليا إني هعترض على الشغل في الأجازات ولأهسكت واكل عيش، وطبعًا أنا مش جاي من مصر أعمل مشاكل وأعترض وخصوصًا إني مبقتش ذا قيمة وخبرة بالنسبالة عشان أقدر اتكلم واتناقش واعترض.

يوم الجمعة وصلت الشركة على 10 الصبح، طبعًا الطريق فاضي والمواصلات مفيش أحسن من كدا.

جه المدير وقعدنا مع بعض وقال هديك المره دي تاسك كبيرة شوية. أي حاجة في الشغل بنسميها تاسك Task، فيه واحد بدأها وانت هتكملها ولازم تخلص قبل ما اجي عشان فيه عميل جديد مشترط إنها تكون في





## يوميات مُغترب

البرنامج عشان يشتريه. التاسك عبارة عن نظام العمولات العقارية، يعني لو شركة العقارات عندها شقة وعازية تبيعها وجه سمسار جاب مشتري بياخذ عمولة من الشركة ولو الموظف هو اللي جاب المشتري وأقنعه إنه يشتري الشقة هياخذ عمولة ولو الموظف والسمسار اشتركوا في المشتري هما الاتنين حياخدوا عمولة ولو شركة العقارات مش المالك للشقة يبقى هي هتاخذ عمولة من مالك الشقة وتدي عمولة للموظف والسمسار، يعني الشركة هتبقى سمسار واللي جاب المشتري هيبقى سمسار ثاني. وبعدين قلّي: أنا عارفك مش هتفهم حاجة دلوقتي، هبعثلك ملف يشرح حلك التاسك أول ما اوصل عمان ولو ليك أي أسئلة أبقى ابعتها لي وأنا هرد عليها.

بيني وبينكم أنا تهت وبلّمت ومفهمتش حاجة أصلاً ومردتش عليه، بس رديت في سري، إيه العبط ده؟ موظف إيه وسمسار إيه وعمولة إيه؟ هو انا لسه عرفت حاجة عن البرنامج عشان تديني شغل متوقف عليه بيع البرنامج لعميل جديد؟! دا انت كده بتحطني في وش المدفع، منك لله يا جمال يا مروان.

خلص اليوم والمدير سافر على عمان وبعثلي شرح التاسك، ملف وورد مكون من صفحة واحدة مفهمتش منها أي حاجة. إيه شغل السريعة دا؟ الواحد في مصر كان متعود لما ياخذ تاسك جديدة يقعد مع المدير ويفصصوا التاسك وتحليل كامل على الورق من طقطع لسلامو عليكو وبعد كذا نبدأ في الشغل. وانت باعتلي شرح تاسك بالصعوبة دي في صفحة واحدة.

قرأت التاسك مرة واثنين وثلاثة وبدأت اشتغل على اللي فهمته وأطلسم




فيها كدا ولما يبقى ييجي آخر الإِسبوع من عمان يقعد معايا ويشوف أنا عملت إيه.

دا الإِسبوع الثاني ليا في الإمارات، عدى حوالي 10 أيام والمفروض إني أكون مضيت العقد بقى عشان نلحق نخلص إجراءات الإقامة، سألت دينا إيه هو موضوع العقد هيطول ولا إيه أنا بقالي 10 أيام هنا؟ قالتلي المدير مستني لما يشوف شغلك !!

قلتله يعني بعد ما اسيب شغلي في مصر واجي هنا يقول لما اشوف شغله! امال كان باعتلي تاسك في مصر ليه؟ وحسستها إني مضايق ومش مطمئن من الطريقة دي. قالت أنا هكلمه وارد عليك. وبعد كدا كلمتني وقالت لما ييجي المدير آخر الإِسبوع هيحدد معاك كل حاجة.

طبعا هيحدد على أساس التاسك اللي أنا شغال فيها دلوقتي، يعني لو فشلت فيها، يبقى انسى، ولو خلصتها، يا عالم هيحصل إيه.

إِنَّ غَدًا لَنَاظِرُهُ قَرِيبٌ



## تاسك تفوت ولا حد يموت

المدير جيه يوم الأربعاء الصبح على غير عادته لإن كان وراه شوية مواعيد وقاللي هخلص الاجتماعات واقعد معاك. حاول تخلص نظام العمولات وتعمله تيسر كويس Test وتوريهولي عشان العميل الجديد هيشوفه بكرة الصبح.

فضلت اعمل تيسر على العمولات كلها والحمد لله كانت شغالة زي الفل وفي سري عمال أقول يارب استر، عدي اليومين دول على خير، ذا أول اختبار حقيقي، يارب استر.

المدير جيه على الساعة 5 مساء وبدأت أشر حله الشغل وعملت كذا وكذا وخلصت كذا وكذا. قاللي أوكيه سييلي الجهاز شوية كذا. وبدأ هو يعمل تيسر وهوووووب البرنامج ضرب إرور.. إرور Error وهوووب ولا حاجة شغالة، أنا لسانني اتعقد عن الكلام ووجهي احمر وبدأت أشك في نفسي، الحاجات كانت شغالة كويس والله، هو البرنامج بيخاف منه ولا إيه.



طبعا الحاجات دي بتحصل معانا كلنا، يعني مثلاً جهاز الكمبيوتر بتاعك يعطل ولما تروح بيه لمركز كمبيوتر، تلاقيه شغال زي الحلاوة، أو مثلاً يبقى عندك مغص شديد وأول ما تروح للدكتور تلاقي نفسك زي الحصان. حد حصل معاه كدا؟

المدير عمل حاجة أنا مكتتش عامل حسابها خالص، ضربت الشغل كله.. أقوله والله كانت شغالة كويس يضحك بمكر ويقول وريني، آجي اوريه مش راضي يتورى 😊.

طبعا هنا الاختلاف في الخبرة كيزنس وإدارة وكفهم لسوق العقارات واحتياجات العميل يختلف عن شخص لسه جاي، عنده رهبة من كل شيء، بيئة مختلفة، مجال جديد، دا غير أن التاسك نفسها غير واضحة بالشكل الجيد، كل دا كان سبب لي حصل دا.

قلت للمدير أنا مفهمتش التاسك بالشكل دا ومحدث قاعد معايا يوضحلي الحاجات دي قاللي مسألتيش ليه، منا موجود على أنت طول الوقت. إنت مقرأتش الدوكيومنت Document اللي بعتھولك كويس، أنت الكومينكيشن سكيلز ضعيفة Communication Skills... إنت قلتلي من وانت في مصر إنك تقدر تسد وإني أقدر اعتمد عليك وقلت إن عندك كومينكيشن سكيلز عالية.. إنت... إنت... وادهملي مذبوظين لما بقيت حاسس إني ولا حاجة.

طارق اللي كان سنيور في مصر واللي المدير كان يشكر في شغله طول الوقت بقى طارق اللي ضحك على المدير وقاله إنه كويس لحد ما جابه



## يوميات مُغترب

الإمارات. شكلي كان وحش قوي ويجد اليوم دا كان من أسوأ الأيام اللي شفتها في الإمارات.

المدير قاللي خلاص أنا هعمل الشغل بنفسي، قتلته لأ أنا فهمت كويس وهكمل الشغل، مهو لو كنت سبته يكملها معناها إن بكرة الصبح على بيتك يا برنس. يومها فضلت شغال لحد الساعة 2 الصبح عشان أعدل البرنامج عشان هيعرض البرنامج على العميل الساعة 10 الصبح. خلصنا جزء كبير منه وقاللي خلاص كفاية كدا، إنت روح نام شكلك تعبت وتعالى براحتك الصبح وابقى كمل الشغل.

وصلت البيت 2 ونص وعملت حسابي أصحى على 11 واروح على 12 كدا.

تاني يوم الساعة 10 الصبح لقيت السكرتيرة بتتصل بيا

- Tarek ,where are you?
- on the bed. why?
- hehe ,Sir Amr asking about you ,he asked me to call you to come
- ok ,i'll take shower and come
- ok ,dont late. babye

أوووووووووف إيه القرف ده، وإيه الرجل الـ... ده، هوه مش قاللي

نام وتعالى براحتك، يا ترى حصل إيه تاني!

صحيت وخذت شاور ولبست ونزلت خدت التاكسي ويا دوبك 25

دقيقة وكنت هناك.



أول حاجة قاهالي أول ماشفني، أنا مش عارف جالك نوم إزاي والشغل  
مش خلصان! كلمة أثرت فيَّ جدًّا، بيتهيا لي لو مكنش مصري عمره ما كان  
هيقول كدا، قال وانا كنت مبسوط إن مديري مصري. مردتش ولا بكلمة،  
من عادتي أسكت أسكت أسكت، أعبي أعبي أعبي وبعد كدا أفرغ سمي  
بس على الهادي جدًّا ودا اللي هيحصل بس بعدiiiiiiiiiiين.

طبعًا هو برده مش هيقتولي كدا إلا لو كان حصل معاه حاجه، اللي حصل إنه لما راح للعميل جهازه مشغلش فاتصل على المكتب عشان يدخل من جهازي ريموت أكسس (Remote access) بس ملقنیش في المكتب فكان منظره مش كويس قدام العميل فجيه طلعهم عليا.


قالى قدامك لحد الساعة 4 تخلص التاسك عشان العميل هيجي  
الساعة 5 يشوفها لو مش هتقدر تخلصها قولي عشان اتصل بالعمل ميجيش  
وسيبها لي وأنا هبدأها من الأول وهخلصها في يوم واحد.

إيه الفذلكة دي؟ قلت ماشي وبدأت اشتغل وأنا ماسك أعصابي بالعافية  
وبين اللحظة والثانية كنت عاوز اقوله خلاص أنا هتزل مصر.

كرهت دبي والشركة والمدير واليوم الي فكرت فيه آجي دبي. دا غير الوحدة،  
قاعد لو حدي في السكن ومش لاقى حد اكلم معاه وافضفضله، الواحد لما بيكلم  
مع حد بيرتاح شوية وأنا صحابي كلهم في مصر، فحسيت كأني في سجن.

على الساعة 5 جيه اثنين من شركة العميل الجديد وشافوا الشغل والحمد لله عجبهم وطلبوا بعض التعديلات. خدت ليها كام يوم كمان.. والحمد لله خلصت. يعني التاسك خدت ليها حوالي 10 أيام مع إن الملف اللي كان بعتهولي






### إبسطها يا باسط

بعد انتهاء أول تاسك كبيرة. خدتها وما صاحبها من تخطيط ومشاكل ترتب عليها اهتزاز ثقة المدير في قدرتي على الإمساك بزمام الأمور بالسرعة الكافية.

قبل كذا كلمته عن واحد صاحبي، مبرمج كويس وكان بدأ يدرس الموقف فعلاً وسألني عليه أكثر من مرة وكنت أقولله على ضمانتي لكن بعد الموقف دا، ممكن أقول على جشتي لكن مظنش إني أقدر أقول على ضمانتي 😊.

قبل نهاية التاسك بأيام بسيطة، دينا أخذت الاجازة السنوية بتاعتها وسافرت تتفصح في تايلاند، يعني الحطة الحلوة في المكتب طارت، فضلت أنا وآرون الهندي وسجريد الفلبينية ووردة الهندية. عشان محدش يفهم غلط، أنا لما كنت أعوز اتكلم عن العقد أو أي حاجة مش عجباني، كنت بكلم دينا لأنني عارف إنها بتنقل كل كلمة تتقال في المكتب للمدير بصفتها المساعدة بتاعته والمسئولة عن المكتب ودي كانت من الأسباب اللي خلته يثق فيها ثقة عمياء. فلما مشيت هكلم مين على العقد، آرون؟





## يوميات مُغترب

أي حد قرأ الموضوع من الأول لحد السطور دي هيحس إن الحياة صعبة والمواقف أصعب ويمكن الكثير يكره الشغل والسفر برة مصر، لكن الموضوع مش كدا، بالعكس.. الشغل والسفر له مميزات كتير مهما يكون فيه مواقف صعبة.

أنا بعرض الأحداث بالتسلسل زي ما حصلت بالتفصيل بغرض إن الشباب قبل ما يسافر يكون فاهم كويس إيه اللي ممكن يحصله أو يمر به فميتصد مش ويكون مهياً نفسياً.

وعشان محدش يصاب بالإحباط، هنتكلم عن المشاكل اللي قبلتني من أول ما سافرت وازاي اتحلت والحمد لله.

بالصدفة اكتشفت إن صديق ليّا من أيام الكلية والمدينة الجامعية، دكتور تحاليل، موجود في الإمارات، اتصلت بيه واتفقنا إنه يبجي يقضي معايا الخميس والجمعة، يوم الخميس فضلت احكيه عن اللي شفته والظروف والمشاكل والأسعار.....و.....و.....

قاللي أنا عندي ليك حل لمشكلة الأسعار، قلت الحقني بيه أبوس إيدك، قاللي معاك فلوس؟ قلت أيوه قال خلاص بكرة هنروح مشوار وهظبطك، بس هتفد اللي هقولك عليه بالحرف الواحد، قلت ماشي وربنا يستر. وطبعًا عشان أنا بشتغل الجمعة، سبته في البيت ورحت الشغل ورجعته على العصر كدا.

وبعد المغرب نزلت انا وهو وخذنا تاكسي ورحنا على مكان في الشارقة اسمه مدينة الأغذية بجوار أنصار مول، كان قريب من سكني لاني ساكن في النهدة.



## هذا ما رأيت في دبي

لقيت الأسعار النص بالنسبة للسوبر ماركت. ما صدقتش نفسي ومخلتش حاجة إلا لما جبت منها، أنا أختار وصاحبي يحط في الأكياس، منجا، تفاح، موز، برتقال، خيار، بطيخ، عنب، خس، بصل، طماطم، ليمون، خربتها وقعدت على تلها.

رحت على الكاشير عشان احاسب، فضلت باصص للجهاز اللي بيعسب الأسعار، 10، 20، ...، 100، ...، 150، ...، قلبي، ...، 250، ...، الحقني يا وليد، 300، ...، ...، منك لله يا وليد، ... 450 درهم.

كدا يا وليد، تعمل فيا المقلب دا؟ وليد صاحبي قعد يضحك وقال لي ياعم هي شبكة دبوس أول الشهر، وحاجاتك تبقى في ثلاثتك وخلاص، ولا كل يومين رايح السوبر ماركت ولا حاجة. قلت: طب ياللا شوفلنا تاكسي، قال تاكسي إيه لسه مجبناش الرز والزيت، ياللا على أنصار مول، قلت يا نهار ابيض روح يا شيخ منك لله.

رحنا على أنصار مول، جنب مدينة الأغذية على طول، حطينا الحاجات اللي اشتريناها في الخزانة برة ودخلنا اشترينا باقي المستلزمات، لانشون، جبنة فيتا، جبنة قديمة، فول معلبات، لبن، برجر، فراخ مجمدة، لحمة مفرومة مثلجة، رز، خبز، زيت، سفن أب، عصير بودرة، ياللا ما هي خربانة خربانة.

وكلا كيت تاني مرة على الكاشير، وادفع ياعم طارق، وصوتي ياللي متيش غرمانة.

خدنا الحاجات في الترولي اللي اشتريناها من مدينة الأغذية واللي

## يوميات مُغترب

اشتريناها من أنصار مول ووقفنا تاكسي وفضلنا نخط الحاجات في الشنطة لما اتملت، حطينا الباقي في الكرسي اللي ورا. وسواق التاكسي عمال يبصلنا وكأنه عاوز يضربنا.

وصلنا الشقة، في الدور ال 14 ولما طلعلنا الحاجات من الأصانير، الحاجات ملت الطريقة قُدام الشقة وقبل ما نفتح الباب لقيت باب الشقة اللي قصادنا بيتفتح وبيطلع منه بنت فلبينية كانت خارجة، أول ما شافت الحاجات قالت، وااااو، أووووه ماي جaaaاد Wow, Oh My God

هي شافت ما لا يقل عن 25 كيس مالمين الطريقة اتبهلت وقالت

- She: Hi
- Me: Hi
- She: How many persons in your fla. 2 only ?
- Me: No, Only me ,he is my Friend visiting me.
- She: Ouh, and all these items for you Only.
- Me: Yes
- She: Oh my god
- Me:.. dont like to make shopping too much,so. make it one time every motnth and. have big fridge, thats why
- She: Ahaa, Ok, that's nice,
- Me: Ya
- She: See you
- Me: See you

سي يو يا بنت ال.... يام عين.....



## هذا ما رأيت في دبي

وقرأت قل أعوذ برب الفلق وقل أعوذ برب الناس، العملية مش ناقصة حسد، وحسد إيه مش مصري، دا فلبيني.

وليد صاحبي دخل معايا الحاجات وقاللي أنا همشي بقي عشان اتأخرت، قتلته ماشي ياريس ومتشكرين على أفكارك اللي تخرب البيت. قعدت يومها ساعتين أو ساعتين ونص اضبط الحاجات في الثلاجة، بس تظبط بمزاج، بفلسوسي يا....، على رأي هريدي صبحي. وكله بالمستندات ومعايا السي دي، على رأي المستشار.....

وبكدا اكون ارتحت من أول مشكلة بتاعة الأسعار، بقيت اشترى الحاجات مرة واحدة في أول الشهر وخلاص وزى ما يقولوا ضربة واحدة في الراس وخلاص.

طبعاً أنا متأكد وأكاد أجزم إن نص الناس افكرت إني بخيل، خصوصاً لما دخلت السوبر ماركت أول ما جيت الإمارات ومطلعتش منه إلا بقرازة ميه، دا إن مكنش كلكم افكر كدا فعلاً، مكنش العشم بردو.

عشان كدا لم أنس أن ألتقط بعض الصور الفوتوغرافية لهذا المشهد التاريخي الذي لم يحدث من قبل. فقد كلفني هذا المشهد من المال الكثير ومن جهدي ووقتي الثمين ما لا يمكن تعويضه (قال يعني).


جيه دور الصور والسي دي الي عند المستشار، أكيد كلكم عاوزين تشوفوها، بس الأول قولوا ورايا

﴿قُلْ أَعُوذُ بِرَبِّ الْفَلَقِ ۝١ مِنْ شَرِّ مَا خَلَقَ ۝٢ وَمِنْ شَرِّ غَاسِقٍ إِذَا وَقَبَ ۝٣ وَمِنْ شَرِّ النَّفَّاثَاتِ فِي الْعُقَدِ ۝٤ وَمِنْ شَرِّ حَاسِدٍ إِذَا حَسَدَ ۝٥﴾ (سور الفلق).





هذا ما رأيت في دبي



## دبي يا اسطه

المواصلات، وما أدراك ما المواصلات، وزحمة المواصلات، تقف ساعة أو ساعة ونص عشان تلاقي تاكسي، ولما تلاقي التاكسي ويقفلك وتقولله دبي!! يا عالم هيرضى يوديك والّا لأ.

السواق في الشارقة مكنش بيعب يروح دبي الصبح، لأن الموضوع بيعجي عليه بخسارة، الطريق بياخد على الأقل ساعة ويسوق كأنه سايق سلحفاة من الزحمة مع إن الطريق بياخد 20 دقيقة بالكثير لو مفيش زحمة.

طبعا العداد كدا كدا بيعد سواء ماشي بسرعة أو ماشي ببطء، لكن طريقة الحساب بتختلف، يعني لو المسافة 40 كيلو، المفروض ياخذها في 20 دقيقة وتكلفتها 35 درهم لو مفيش زحمة. لكن لو فيه زحمة ممكن ياخذها في ساعة وتكلفتها هتكون 50 أو 55 درهم. دا غير إنه هيرجع فاضي من دبي. فلو اشتغل داخل إمارة الشارقة نفسها أفضله، مفيش زحمة وممكن يعمل في الساعة دي أكثر من مشوار فيكسب أكثر.

واحد يقوللي طب هو السواق هيخسر إيه لو الطريق خد ساعة أو أكثر؟



## يوميات مُغترب

معظم السواقين يكون مرتباتهم حسب نسبة الدخل. وغالبًا تكون 30 % لو دخل في الشهر 10 آلاف درهم أو أكثر، لو أقل من 10 آلاف درهم يكون مرتبه 25 % فلازم السواق يبذل مجهود جبار عشان يعدي الـ 10 آلاف درهم في الشهر.

واحد تاني هيسأل ويقول، طب ليه ميحملش زبون وهو راجع من دبي، أقوله لإن قوانين الإمارات بتمنع إن التاكسي ياخذ زبون من إمارة غير الإمارة بتاعته وهو راجع، يعني لو التاكسي من الشارقة ورايح دبي، لازم يرجع من دبي فاضي، ميحملش إلا من الشارقة وبس. لو التاكسي من دبي ورايح الشارقة، لازم يرجع من الشارقة فاضي وإلا ياخذ مخالفة 500 درهم.

تخيل نفسك واقف ساعة في عز الحر ومش لاقى تاكسي وكل شوية يعدي عليك تاكس فاضي رايح المكان اللي انت عاوز تروحه (دبي) بس ميقدرش ياخذك عشان هو تاكسي دبي وانت واقف في الشارقة فلازم تركب تاكسي الشارقة.

### مشكلة المواصلات مرت معايا بمراحل:

المرحلة الأولى: كانت الوقوف وانتظار التاكسيات

المرحلة الثانية: كانت الركوب مع بعض الأشخاص اللي بيكونوا رايحين دبي وبيصعب عليهم وقفتي في الشمس ومشاورتي للتاكسيات، فيسألوني رايح فين، واللي بيكون طريقه زي طريقتي بيخدنني معاه أو يخدنني لأول دبي ومنها اركب تاكسي لمكان شغلي.



المرحلة الثالثة: كانت عربية بتقف تسألني رايح فين، أقول رايح المكان الفلاني، يقول لي هوديك بس اخذ مبلغ معين، تقريبًا يكون نفس أجرة التاكسي، أو زيادة 10 دراهم، على حسب. العربية بتكون ملاكي مش أجرة، بس صاحبها بيعمل سبوبة على الصبح يعني. اتعرفت على أكثر من واحد وكنت بتتصل بيهم لو حد فاضي أو قريب من المكان اللي أنا فيه بيعجلي ويوديني.

طبعًا دا كله وأنا رايح الشغل، إنها وأنا راجع، فكنت بتأخر في الشغل زي مانتو عارفين فمكتش بتأخر كثير عشان الاقي تاكسي، وفي بعض الأحيان كنت بتصل على شركة دبي تاكسي، واديها العنوان وهي تبعتلي تاكسي، شغل جي بي إس وحاجات حلوة كدا. كانت بداية العداد بتكون أغلى 4 دراهم لو طلبت التاكسي من الشركة.

المرحلة الرابعة: اتفقت مع واحد من اللي عرفتهم يوديني الشغل ويجبني بعد الشغل كل يوم وياخذ في الشهر 900 درهم، كل أسبوع 250 درهم ودي اسمها كار ليفت (Care Lift). ناس كثير كانت بتقولي دا مبلغ كبير على الكار ليفت، لكن بالنسبالي كانت أرحم بكثير، لأنني لقيته بعد 3 أسابيع من العذاب مع التاكسيات، ومش هتصدقوا لو قلتكم صرفت في الـ 3 أسابيع دول أكثر من 1700 درهم. وبالتالي الـ 900 درهم في الشهر رحمة على الأقل مش هتتظر كل يوم ساعة عشان ألاقى تاكسي.

الراجل دا كان باكستاني وكان عايش قصة حب، عمره ما وداني أو جابني إلا لما يكون بيتكلم في التليفون، طول الطريق حاطط الساعة ونازل رغي وطبعًا أنا مش فاهم حاجة، بيتكلم أوردوا، زي الأفلام الهندي كدا،



## يوميات مُغترب

لكن كنت بفهم حاجة واحدة، صوت القبلة كان بيخرق وداني ويصحيني من النوم، كان لما يحس إني نايم بيستغل الظروف ويبعت قبلات حارة في التليفون، يابن الدين، مز ياعم براحتك، مين قدك، ناس تمز وناس تكع.

لكن تأتي الرياح بما لا تشتهي السفن، بدأت مواعيد الراجل تبوظ، يوم يتأخر ويخليني أستناه اكر من نص ساعة، أتصل بيه يقولي 5 دقائق وجايلك، وخمسة في خمسة في خمسة ألاقيني منتظريجي نص ساعة. والأمر زاد لدرجة ان فيه أيام مبيعجيش، أرن عليه ميردش مرة واتنين، أعرف إنه مش جاي، أروح مدور على تاكسي، والاقية جاي يخذني ويعتذر، كان عندي ظروف مش عارف إيه، وظروف مش عارف إيه.

قلتله أي يوم هتغيبه هخصمه منك، وبالفعل، آخر الأسبوع رحت خاصم منه الأيام إالي نفضلي فيها. إضايق جدًا وراح عامل فيا مقلب طلع من عيني.

بعد ما دفعت لروميو السواق فلوس الأسبوع ناقصة الأيام إالي غابها، التزم معايا الأسبوع إالي بعده، قلت في نفسي أيوه كدا، العقاب بيحيب فايدة ولما خلص الأسبوع وجيت ادفعله فلوس الأسبوع، قاللي معلش أنا هشتري عربية جديدة ومحتاج فلوس فلو ممكن اخذ فلوس الأسبوع الجاي دلوقتي، قلت: مفيش مشكلة ودفعته فلوس الأسبوع مقدم.

طبعا أنا مدتش خوانة، وبالفعل تاني يوم جه وصلني عادي، لكن تالت يوم فضلت مستنيه مجاش، أرن عليه ميردش، قلت هو رجع تاني للحركات دي؟ يعني لازم أخصم منه تاني، مبيحرمش. والّا هو عشان خد فلوس





الأسبوع مقدم يبقى خلاص؟ طب يصبر عليا الأسبوع الجاي. ورحت أشوفي تاكسي يوصلني للشغل، هعمل إيه.

اتصلت بيه بالليل عشان ييجي يخذني من دبي مردش خالص، الله، إيه اللي حصل، الواد مات والا إيه؟ أتصل من تليفوني، من تليفون المكتب، تليفونه يرن ومحدث يرد، قلت خلاص كدا مش هيجي، توكلنا على الله، ورحت متصل على خدمة التاكسي عشان يبعثولي واحد، هي خربانة خربانة.

تاني يوم الصبح، الواد مجاش، إيه دا بقى، دا استهبال، اتصل على الموبايل، مغلق، هي حصلت، دا كدا فيها إنه، وعشان متفضلوش تتصلوا معايا كثير كل يوم، هقولكم الحقيقة المرة، الواد أخذ الناقة وشرخ، خد فلوس الأسبوع مقدم وهرب وفضلت كذا يوم اتصل بيه مبردش.

كدا يا روميو، تسرقني وتسبني، هُنت عليك، دا انا غلبان، ورجعت ريماء لعادتها القديمة... تاكسيات تاني وانتظار تاني، فينك يا روميو، طب ارجع ومعتش هخصم منك، طب ارجع ومش عاوز فلوس الأسبوع اللي أخذتها. ياللا الحمد لله وعسى أن تكرهوا شيئاً وهو خير لكم.

في الفترة دي وبعد ما روميو هرب، حصلي شوية مواقف هذكر منها موقفين على سبيل المثال لا الحصر.

الموقف الأول: كان الصبح، وكنت رايع لعميل في عجمان، وأي تاكسي لو قتلته عجمان ميقبلش لأ، لأن الطريق كويس مش زحمة زي دبي، لمحت تاكسي فاضي ماشي في صف زحمة شوية عشان يعمل يوترن أو دوران ويرجع، المسافة حوالي 30 متر، بس فيها حوالي 20 دقيقة عشان يعمل الدوران دا



## يوميات مُغترب

فقلت بدل ما اروح اركب التاكسي والعداد يعد عليا الـ 20 دقيقة دول، ما استناه الناحية الثانية، ومفيش حد واقف غيري، فضلت مستني، مستني، مستني، مستني لحد ما جيه الناحية الثانية ولقيته بيركن قبل ما يوصلني، روحته وقلته عجمان. قاللي لا سوري. الشفت خلص، الحين يصير نوم، قلت نعم. تنام ما تقوم يا بعيد بقي أنا مستني بقاللي 20 دقيقة في الجو النار دا وبعدين تقولي الشفت خلص. شفت إيه اللي انت جاي تقول عليه؟

الموقف الثاني، كان في دبي، طبعًا زي ما فيه زحمة موصلات في الشارقة الصبح، فيه زحمة موصلات في دبي بالليل، الناس اللي بتعمل زحمة في الشارقة الصبح، شكلهم هما اللي بيعملوا زحمة في دبي بالليل. فاكرين التاسك بتاعة العمولات، والعميل اللي طلبها، كان عندي اجتماع هناك عشان اشرح ليهم البرنامج وانزله على الأجهزة كنسخة تجريبية أسبوع.

العميل دا في دبي في شارع اسمه شارع البنوك، عشان فيه بنوك كثير، خلصت من عند العميل على 6 ونص المغرب، طلعت من عنده أدور على تاكسي، ولا الهوا، ملمحتش ولا تاكسي، لقيت ناس ماشية، قلت يمكن فيه محطة قدام، مشيت وراهم.

كان يوم خميس وكنت صايم، المغرب ادن، دخلت سوبر ماركت قلت اجيب بتاعة بيبيي أشربها لما اروح، كلها نص ساعة واكون في البيت.

خرجت من السوبر ماركت ومشيت شوية وبعدين وقفت استنى تاكسي وجيت افتح الكانز، الفتاحة بتاعتها اتكسرت، يادي النيلة ولا عارف أشرب منها ولا قادر ارجع للسوبر ماركت ثاني، الواحد صايم وهفتان،



بقيت اشرب كأني بشرب من شاليمو من غير شاليمو. كان شكلي عامل زي الشحاتين صراحة ههههه.

لما مجاش تاكسي في الحطة اللي أنا واقف فيها، مشيت شوية، وفضلت على كدا، أقف شوية وامشي شوية، تاكسي ييجي وأنا واقف ياخذ بنت تكون واقفة قدام شوية وتكون جاية بعدي بفترة ويمشي، أروح أقف في المكان اللي هي كانت واقفة فيه، تيجي واحدة تانية تقف بعدي وبعد شوية ييجي تاكسي وياخذها ويمشي، إيه يا ولاد الـ... هنلعب قط وفار بقى؟

أمشي كمان شوية ألاقى إشارة وواقف فيها تاكسي أجري عليه، تكون الإشارة فتحت والتاكسي يمشي، مينفعش يقف والإشارة مفتوحة، يا إشارة يا بنت الـ.

يارب تاكسي، يارب تاكسي، فضلت على النظام دا، من 6 ونص مساءً لحد 9 ونص مساءً، ولك أن تتخيل صعوبة الموقف من أصوات التلاكسات والأضواء والمشى والوقوف والمناظر اللي ماشية على الأرض ☺، جالي يومها صدام فظيع من كل الحاجات دي.

على الساعة 9:30 مساءً، وقف تاكسي بعد مني بشوية رحت طالع جري وراكب قدام، وراح اتنين بنات من جنوب إفريقيا راكبين ورا، وجت واحدة رابعة هندية تتخايق معاهم وتقول أنا اللي وقفت التاكسي، وهما يقولوا إحنا ركبنا الأول والسواق يقول مليش دعوة، أنا أقف واللي يركب الأول، وبعدين أمشي، دا كله بالإنجليزي، وأنا ولا كلمة، فاصل شحن.

البنت الهندية تقول لهم إنتوا مش محترمين، أنا اللي موقفة التاكسي.







## هَذَا مَا رَأَيْتَ فِي دُبَيِّ

وهي بتقولي معندكش مكان تنام فيه، حسيت إني هضيع يا وديسييع، بس الحمد لله كان معانا السواق.

بعد ما نزلوا، وحاسبوا التاكسي، السواق صفر العداد، وبدأت أنا رحلتي وانطلق بينا على البيت والحمد لله وصلت، واستلقيت على السرير وكأني طالع من مغامرة عقلة الإصبع أو كابوس.

تاني يوم الجمعة بحكي للمدير اللي حصل، قعد يضحك وقاللي مفيش حاجة هنا بالساهل، قلت فعلاً، الغربية مش سهلة، كفاية البهدلة اللي فيها.

كرهت العميل دا مع إني هروحله تاني يوم الاثنين عشان اشوف لو محتاجين أي شيء، بس هعمل إيه، الشغل شغل ولازم اروح، المهم رحت يوم الاثنين وقعدت مع الشخص المسئول هناك عن البرنامج، واحنا بندردش قتلته على اللي حصلي المرة اللي فاتت وعلى مشكلة المواصلات، قاللي أنا كمان كان بيحصلي كذا لإني كنت ساكن في الشارقة بس لقيت كار ليفت Car Lift كويس كان بيوديني ويحييني، لحد ما طلعت رخصة ودلوقتي معايا سيارة، قتلته طيب ما تديني رقم الكار ليفت دا، راح مديني رقم واحد وقال دا بيروح المنطقة اللي انت ساكن فيها، قتلته خلاص هكلمه واشوف وخلصت عندهم على الظهر ورجعت على الشركة.

أول ما وصلت الشركة رحت متصل على الكار ليفت، لقيته بيتكلم عربي مكسر، قتلته أنا ساكن في الشارقة، في النهضة، وشغلي في الجرهود في دبي وعاوزك توصلني كل يوم، قاللي ما في مشكلة، قتلته كام بياخد، قاللي نفر

## يوميات مُغترب

واحد 500 درهم، قلت يا فرج الله، فينك من بدري؟ أحبك أنا، قتلته أولك موافق، قاللي امتي ييجي اليوم ولا بكرة؟ قتلته يا سلام هتعرف تيجي تخدني اليوم، قاللي ما في مشكلة، كام رقم تليفون إنت؟ إديته الرقم، قاللي هرن عليك الساعة 6 وخمسة، إنت ينزل تحت بناية. قتلته أولك.

رن عليا الساعة 6 وخمسة، نزلت جري، بس انا مش عارف شكله، والعربيات كتير، والبنات كتير، أجنب، ولبناني، ومغربي، طب هبص على مين، على السواق والأعلى الـ....، محدش يفهمني غلط، قصدي على السواق والأعلى العربيات.

اتصلت بيه، وين انت؟ قال: أنا جدام جدام، إنت وين، قتلته وأنا قدام قدام، لقيت واحد بيشاورلي، طارق جلي جلي، قتلته حاضر حاضر. جلي جلي، يعني بسرعة بس بالهندي.

أنا كنت عمال ابص على العربيات الملاكي، مفكر إن دا واحد زي روميو كدا، طلع باص بياخد حوالي 20 شخص من الشارقة لدبي كل يوم، الموضوع طلع كبير، شركة كاملة ليها باصات وبشتغل في موضوع الكار ليفت دا، تتفق مع 15 أو 20 شخص يكونوا في نفس المكان وتوديعهم وتجبهم.

قلت مفيش أحسن من كدا، دا بقى ولا هينفض يوم، ولا هياخد الفلوس ويهرب. الحمد لله كنت مبسوط لدرجة إني مش مصدق إن هرتاح من مشكلة التاكسيات خالص وخصوصاً بعد موضوع أنت معندكش مكان تنام فيه دا 😊. فعلاً وعسى أن تكرهوا شيئاً وهو خير لكم، لوروميو دا مكش هرب، مكش اتعرفت على بهرام.



## هذا ما رأيت في دبي



سواق الباص كان اسمه بهرام، باكستاني بس بيعرف عربي مكسر، بيتصل على كل واحد قبل 20 دقيقة من المكان اللي هياخده منه. فيه أكثر من مكان زي نقطة تجمع كذا، والناس بتقف فيهم يستنوه لكن في دبي بيوصل كل واحد لمكان شغله. كان يتحرك من المنطقة بتاعتي الساعة 20 و7 صباحًا، وكان بيرن عليا الساعة 7، المفروض إني أكون لابس وجاهز ومستنيه يرن، أروح نازل لأنني بتمشى حوالي 10 دقائق لحد نقطة التجمع. فكنت أصحى حوالي 25 و6 دقيقة، يا دوبك عشان آخذ شاور والبس وافطر تكون جت 7 بالضبط.

ضربت معاه صحوية وكنت بجيبه شيكولاتة وكراملة من اللي كنت وخذهم معايا من مصر، وكان دايمًا يقوللي، شكرا صديق، انت نفر وايد زين، يعني شخص كويس جدًا، أكيد يعني مش بديله كراملة ملوكي 😊.

الصحوية دي كانت مظبطاني، لأنني أوقات كنت بتأخر فكان بيتصل بيا اقله 5 دقيقة ويستناني ومكنش بيعمل كذا مع حد، فكنت بحس في عيون اللي معايا في الأتوبس غل وحقد كذا وكأنهم عايزين يضربوني.

مرة رن عليا وكنت لسة نايم، وفي لحظة صحيت وخذت شاور ولبست ونزلت ويومها استناني ييجي 20 دقيقة ودا عمرها ما تحصل مع حد، حسيت وانا بركب الباص، مجموعة كبيرة من الـ (أووووف) بتتحدف على قفايا.

في يوم كنت بدردش معاه وسألني كثير عن مصر وإنه بيعجبها. قتلته تعالى أجوزك من مصر. قال: لالالا.

• بهرام: كثير مشكلة واجد.

• أنا: ليه مشكلة واجد؟



## يوميات مُغترب

• بهرام: حرمة كثير فلوس يريد عشان نكاح.

• أنا: كيف كثير؟ ما في فلوس حرمة ياخذ.

بهرام: كيف، وايد ياخذ، شو ذهب كثير، شو شقة كبير، شو أثاث كثير،  
منين فلوس شباب يجيب، واجد مشكلة، واجد، إنت فيه زوجة؟

أنا: لا ما فيه زوجة، فشل واجد. ههههه

بهرام: الله كريم صديق، بكرة يحصل واحد زين.

أنا ممسكتش نفسي من الضحك، معظم الباكستانيين مبيتكلموش عربي،  
إلا قليل بيبقوا متعلمينه في دبي فتلاقي العربي بتاعهم مكسر وحلو كدا، تحس  
بمتعة وأنت بتكلمهم.

وطبعًا الغرض من الكلام دا، رسالة شديدة اللهجة للبنات، «حرمة كثير  
فلوس يريد»، خفوا على الشباب شوية، ارحموا من في الأرض يرحمكم من  
في السماء.

وبكدا يبقى تاني مشكلة اتحلت والحمد لله، المواصلات، تكلفة معقولة،  
مواصلات ثابتة ومنتظمة، دا غير انا مبقتش اتأخر في الشغل، لأن فيه  
مواصلات هتتحرك الساعة 6 ولو هتأخر، الشركة هتدفعلي حق التاكسي.

معلومات إضافية:

تعتبر مشكلة المواصلات في دبي اتحلت بنسبة كبيرة مع افتتاح مترو دبي،  
يوم 2009.9.9 الساعة 09:09:09 مساءً، توقيت لا ينسى في تاريخ دبي،  
معظم الناس بقت تستخدم المترو، وبالتالي التاكسيات بقت متاحة أكثر.






## هَذَا مَا رَأَيْتُ فِي دُبَيِّ

هيئة تنظيم المواصلات أصدرت قرار بزيادة تعريفة فتح العداد من الشارقة لدبي أو العكس من 2.5 درهم إلى 20 درهم، يعني لو تاكسي رايح من الشارقة دبي، العداد يفتح على 20 درهم، دا شجع سواقين الشارقة إنهم يروحوا دبي في أي وقت، وشجع المطحونين يدوروا على طرق تانية يروحوا بيها دبي.

الطريقة الأسهل لمعظم الناس اللي معندهاش كار ليفت بعد موضوع الـ 20 درهم تعريفة، إنه بياخد تاكسي يروح بيه محطة الأتوبيسات، ومنها يركب أتوبيس دبي بـ 5 دراهم ومن محطة الأتوبيسات في دبي ياخذ تاكسي لمكان شغله (ودي مكنتش اعرفها لاني كنت جديد).

بس خلاص.




## طيرانت

بيقولوا الحب والزواج قسمة ونصيب، زي ما الشغل قسمة ونصيب، يعني ممكن الواحد يفضل يحب في وظيفة سنة أو سنتين (قصدي بنت) وميحصلش نصيب بعد ما يعدي الإنترفيو (قصدي يقابل أهلها) ويكون مستني اتصال من الشركة. قصدي ابوها. يقولله تعالى استلم الوظيفة أو هو اللي يتصل بعد إسبوعين لما محدش يعبره وبعدين الشركة تقولله مفيش نصيب.

أو ممكن الواحد بيعت السي في لشركة ومن غير إنترفيو يقولوله معندناش وظائف خالية، زي ما الواحد بيعت ناس عشان يخطبوا واحدة ويكون الرد معندناش بنات للزواج أو مش هتجوز دلوقتي.

أو ممكن الواحد يقدم في شركة ويقبلوه وهما عارفين إنه لسه مدخلش الجيش، بس عشان مؤهلاته حلوة وموافق على كل شروطهم يوافقوا عليه ويقولوله إنك حتى لو دخلت الجيش هنستناك وعمرنا ما هنستغنى عنك لكن أول ما يستدعوه في الجيش، فيه شركات محترمة بتفضل عند كلمتها



## هذا ما رأيت في دبي

ويفضل له مكان لحد ما يخلص الجيش وفيه شركات محترمة تانية بتقوله،  
آسفين منعطلكش.

أو ممكن الواحد يقدم في شركة ويقبلوه عشان محدش غيره اتقدم للوظيفة دي  
أو خافين إن محدش تاني يتقدم ليها لكن لو اتقدم حد أفضل منه بيعوه في لحظة.  
أو ممكن الواحد يعمل إنترفيو وينجح فيها ويشغل وبعدين ميحسش إن  
دي الوظيفة المناسبة فيسبها، زي ما الواحد يتقدم لواحدة ويقعد معها كام  
مرة وبعد كذا يحس إنهم مش متفاهمين.

أو ممكن الواحد بعد ما يشتغل سنة أو ستتين ويبقى عنده خبرة، يبدأ  
يدور على شغل وقت إضافي أو بارت تايم عشان يزود الدخل، بس لو المدير  
مش هيرحمه، مش هقول زي الزواج عشان محدش يفهمني غلط ☺.

أو ممكن بعد كام سنة شغل في شركة، يتنقل لشركة تانية بمرتب ومركز  
أحسن زي ناس كتير أول ما ربنا يفتحها عليهم، يغيروا البيت واللي في البيت  
عشان المستوى الاجتماعي الجديد معدش يسمح.

حد فاهم حاجة؟ أكيد لأ، دي استعارات مكينة حيث شبه الوظيفة  
بالعروسة أو البنت أو الزوجة.

إحنا خلصنا من مشكلة المواصلات، ومشكلة الأكل والأسعار، لسه  
مشكلة العقد. الأيام بتمر والزيارة هتخلص طب وبعدين، أعمل إيه أجيب  
ورد واقعد أقطع ييحبني، مبيحبنيش، قصدي هيمضي العقد مهيمضي،  
والا استنى لما الزيارة تخلص وبعدها يقولي شكراً أخ طارق، مصر محتجالك  
أكثر من دبي.

## يوميات مُغترب

أنا قعدت مع نفسي أفكر وقلت لو سألته أنا همضي العقد إمتى؟ ممكن يقوللي بعدين أو ممكن يرد رد مش كويس أو ممكن يقوللي إن مستواك كان وحش الفترة اللي فاتت وأنا لسه مش متأكد منك، وفي كل الحالات دي مش همضي العقد لأن موقفني ضعيف ومش هقدر أرد ساعتها وأنا أصلاً مبحبش ألح في الطلب أو اطلب الحاجة أكثر من مرة، طيب تعمل إيه يا طارق؟ تعمل إيه يا طارق؟ الجيش قالك اتصرف. صح؟

قلت لنفسي فلنفرض إن وظيفتك دي هي البنت اللي بتحبها وانت عاوز أبوها المدير يوافق عليك تعمل إيه.

- أتجوزها عرفني وأحطه قدام الأمر الواقع؟ أستغفر الله العظيم دا هيبقي الأمر الوقح مش الواقع.

- طب أطلع عليها إشاعات عشان أبوها يحس إن مفيش حد هيتقدملها غيري فيبوس إيدي عشان اوافق اتجوزها. إيه ياعم الأفكار الوحشة دي؟ 😊. فاكرين فيلم. وش إجرام. لما هريدي هنيدي «طه» كان عاوز يطفش الواد بتاع كمال الأجسام اللي كان جاي يخطب البنت اللي بيحبها (رحاب)، لما «بو حسن جيه متأخر»؟

أنا قلت مفيش غير الحل دا. أبوها يحس إن مفيش حد هيتقدملها غيري فيبوس إيدي عشان اوافق أتجوزها.

لو تفتكروا أول ما اشتغلت واتكلمت على الناس اللي في الشركة وقلت إن فيه واحد هندي اسمه آرون وإنه عايز يسيب الشركة بس المدير قالله اصبر شوية لما أجيب شخص يمسك الشغل بتاعك، والمفروض الشخص دا



يبقى أنا. أنا قلت في عقل بالي لو آرون ساب الشركة... المدير عمره ما هيفكر  
يمشيني لإن مش هيبقى فيه غيري، هو دا كان الكارت اللي لازم ألعب بيه.  
آروون، طير انت.

قربت من آرون وبدأت أدرش معاه، عشان اعرف هو عايز يمشي ليه  
واعرف عيوب الشركة عشان ابقى واخد بالي من اللي هيحصلي ومنها أزن  
عليه عشان يسبب الشركة والزن على الودان أشد من السحر.

قاللي انه جايله عرض بـ 10 آلاف درهم وإنه كلم المدير اكر من مرة  
عشان يمشي وكل مرة يطلعله بحجة مرة يقولله استنى لما اجيب حد ومرة  
يقولله حللي المشاكل اللي في البرنامج الأول ومرة يقولله أول الشهر الجاي  
لما طارق يشد حيله ويفهم البرنامج كويس وهكذا....

آرون كان مشتت الفكر بين الشركة والمشاكل اللي عاوز يخلصها في  
البرنامج وبين العرض اللي هيصيغ منه لو فضل المدير يأجل الموافقة على  
إنه يمشي. ودا كان بيأثر على شغله، فكان لما يحل مشكلة يحصل مشكلة ثانية  
ودا كان مضايق المدير جدًا لأنه حاسس إن آرون قاصد يعمل كدا عشان  
يمشي ودا بيخليه يعاند أكثر ويقولله مش هتمشي وكان بيعاقبه ويخصم  
من مرتبه. والحقيقة إنه كان يشتغل كثير ويروح للعملاء ويعطي تدريب  
وبعدين يشتغل برمجة وكان مرتبة 4000 درهم وملوش سكن ولا أي حاجة.  
يعني من الآخر كان المدير مستغله أسوأ استغلال.

بدأت اتكلم معاه وقلتله إنت اللي عملت في نفسك كدا، إنت اللي  
مبتطالبش بحق كويس وبتسكت لما ينخصم منك وبتخليه يزعلك، إنت



## يوميات مُغترب

طلبت تسبب الشركة من زمان ولما يقولك اصبر شوية بتصبر، لكن لو جيت قتلته أنا ماشي أول الشهر وخلاص بلا تردد ولا رجعة، مش هيقدر يتحكم فيك ولو قعدت هيبقى منك، مش أمر منه. وعلى فكرة أنا مرتبي أكثر من مرتبك، دا غير إن سكني على الشركة ودا عشان قبل ما اجي كان شرطي إن السكن يكون على الشركة، أنا قاعد لوحدي في شقة على حسابه وانت سكنك على حسابك، مش مكسوف من نفسك؟

إوعى يا آرون تضيع الفرصة دي من إيدك، إنت بتقبض 4 آلاف درهم، والعرض 10 آلاف درهم، المدير هيعمل إيه يعني؟ ولا حاجة، ملوش عندك حاجة.

وفضلت أسخن فيه، كل يومين أسخنه شوية لحد ما استوى، بس كان ناقص حد يقولله. طير انت. وهيطير على طول ☺.

في يوم كان المدير بيشرحلي أنا ودينا جزء عن الحسابات في البرنامج واكتشف مشكلة كبيرة ويومها كان آرون غايب من الشغل لأنه تعب. لما المدير اكتشف المشكلة اتصل بيه مردش.. قال لدينا اتصلي بيه إنتي مردش بردو. بعته رسالة لو مجتش الشركة خلال ساعة مخصوم منك 14 يوم.

أنا قلت إيه الهبل دا مخصوم منك 14 يوم، هو الشهر فيه كام 14 يوم. وبردو آرون مجاش ولا رد على التليفون.

تاني يوم مجاش، ثالث يوم مجاش، رابع يوم مجاش، يتصلوا بيه مبردش، معقولة يكون طارارارار.

يارب يكون طارار، يارب يكون طارارار.



## هذا ما رأيت في دبي

في اليوم الرابع واحنا شغالين سمعنا صوت ماكينة الفاكس، غريبة، لا غير العادة إن حد بيعتلنا فاكس من غير ما نبقي عارفين من مين.

أوبيااااا دا فاكس من شئون العمل والعمال، شكوى مقدمة من السيد  
آرون ضد الشركة ومطلوب حضور مديرها يوم السبت القادم الساعة  
العاشرة صباحًا.

أحمدك يارب... أحمدك يارب... أخيرًا الهرم إتحرك. وهشوف فيك يوم  
أيها المدير.

خلاص مبقاش إلا أنا وانت يا إكسلانص، وهتعملي العقد ومن غير ما اطلب منك 😊.

العمل والعمال ده زي وزارة القوى العاملة في مصر وبتبقى مختصة بالعمالة والعقود والتزاعات بين الكفيل والموظف والحاجات دي.

المدير راح السبت على العمل والعمال لقي آرون مقدم شكوى إنه طلب الاستقالة وهو مش عايز يوافق له عليها وإنه بيستغله ويخصم من مرتبه بدون وجه حق.

المدير قال للعمل والعمال إن آرون مقدمش طلب استقالة رسمي،  
يا راجل، رايح تضحك على الحكومة، أنت فاكّر نفسك فين؟

آرون كان ذكي، كان طابع كل الإيميلات والمحادثات الي دارت بينهم والي طلب فيها الاستقالة وخصوصًا المحادثات على Gtalk لأن فيه خاصية جميلة إنه بيحفظ الشات كله. الإيميل يعني متقدرش فيه، عشان كذا العمل والعمال خد بيه كمستند وحكم لآرون بالاستقالة وكل مستحقاته المالية.


## يوميات مُغترب

الموضوع كان صدمة للمدير، مكنش معتقد إن الموضوع هيخلص بالسهولة دي، لكن هناك الحكومة مبتهزرش، حقي وحقك وكله في السريع.

وطبعًا أنا كنت فرحًا انا، تسخيني جيه على فايدة، وآرون مشي وخذ حقه كمان والمكان فضيلي.

لكن دايمًا الجزاء من جنس العمل، بعدها شوفت اللي مكنتش عامل حسابه ولا جيه في بالي إنه هيحصل، وفضلت أقول يا ريتني مكنت سختك يا آرون، يا ريتني مكنت قلتلك «طير انت»..






## وجهات نظر

صوابك مش زي بعضها، زي ما فيه ناس هتوافقك على رأيك، ناس هتختلف معاك فيه وزي الحكمة ما بتقول: لولا اختلاف الآراء لبارت السلعة.

عارف إن فيه ناس اختلفت معايا من موقف آرون «طيرانت» وفيه ناس متفقة معايا في اللي حصل. كلها وجهات نظر وعشان نحكم على موضوع لازم نشوفه من زوايا مختلفة، عشان كذا هناخد موضوع آرون من كل الزوايا اللي في الشركة.

آرون شغال في الشركة من 3 سنوات ويعتبر من مؤسسي البرنامج اللي المفروض أنا هشتغل عليه وابقى مسئول عنه بعد كذا، البرنامج دا لإدارة المؤسسات أو الشركات العقارية.

هو والمدير صاحب الشركة. كانوا يشتغلوا فيه كبرمجة وتصميم وكل شيء وكان بيعجي ناس بس ميكملوش شهر أو شهرين، يا إما شغلهم مش كويس أو مبيعجبوش المدير.



## يوميات مُغترب

زي ما قلنا قبل كذا المدير كان شغال في عمان وكان بيرجع آخر الإِسبوع عشان يتابع ويراجع الشغل مع آرون. وكان بيراجع كل حاجة، الموضوع في الأول كان لسه صغير لكن لما الشركة كبرت شوية والبرنامج بدأ يتباع لشركة واتنين وخمسة وعشرة وبدأ فيه دخل كويس، المدير فتح فرع في عمان وبدأ يسبب حاجات كتير في الشغل لآرون بدون ما يراجعها ودا عشان ضيق الوقت وكثرة المهام سواء في دبي أو في عمان.


آرون كانت إمكانياته محدودة، المدير قاللي كذا وآرون نفسه قاللي إنه من ساعة ما دخل الإمارات وهو مفتحش كتاب ولا زود معلوماته عشان مفيش وقت والشغل واخذ كل وقته. وبالتالي مفيش تحديث وتأقلم مع كل ما هو جديد في تكنولوجيا المعلومات.

‘ آرون كان طيب وغلبان، والمدير كان بيستغل النقطة دي وكان بيشغله كتير حتى معظم أيام الجمعة وكان بيتأخر في الشركة لمنتصف الليل. ودينا كانت نفس النظام، بتشتغل كتير، كانت بتروح الساعة 8 مساء، وأول ما توصل البيت، تفتح اللاب توب وهاتك يا شغل والمدير دخلها شريكة له في الشركة بمجهودها وطبعًا دا كان ذكاء شديد منه لأنها فعلاً كانت شايلة الشركة، هي اللي بتقابل العملاء وتخلص احتياجات الشركة طوال الأسبوع دا غير إنها بتنقله دبة النملة في الشركة. لو طارق خرج 10 دقائق، المدير بيعرف ☹️.

عيب آرون إنه مبيركزش، يعني ممكن يحل مشكلة فيسبب مشكلة ثانية ولأن المدير معدش بيراجع الشغل قبل ما يروح للعميل، الدنيا بتبوظ عند







العميل، فلابزم آرون يروح للعميل بسرعة عشان يصلح المشكلة، تكون ظهرت عند عميل ثاني يروح يحلها وهكذا دواليك.

آرون قاللي إنه اشتغل بعد ديناب 6 شهور وهما الاتنين بدءوا بمرتب متقارب لكن هي دلوقتي بتاخد 9 آلاف درهم وشريكة في الشركة لكن أنا باخد 4 آلاف درهم ومرمطون في الشركة.

المدير بياخد دينا معاه في أي اجتماع أو أي مقابلة مع شركة ثانية وعلى طول يقوللي يا ريتك نص دينا، دينا بتشتغل في الشركة وأول ما بتروح بتشتغل من البيت ويوم الجمعة كمان بتشتغل من غير ما اقولها، بتشتغل من نفسها لأنها بتحب الشغل.

هو عاوزني أبقى زيها لكن أنا مش زيها، أنا بشر عايز اشتغل وعايز اخرج اتفسح وعايز اقعد مع صحابي وأعيش حياتي. الحياة مش شغل وبس، لكن هما حياتهم كلها شغل.. دا كله على لسان آرون..

قلتله يا ضنايا يا بني.. كمل كمل 😞.

قاللي أنا لو غلطت أي غلطة في البرنامج بيخصم مني ولو اتأخرت بيخصم مني وعمره ما خصم من دينا حاجة، الأجازة اللي فاتت كان ليا عمولة 5 آلاف درهم وقاللي لما ترجع هتخداهم وبعد ما سافرت بأسبوعين اتصل بيا وقاللي تعالى عشان فيه شغل كثير ومتعطل. جيت على طول ومدنيش بدل أجازتي اللي اتقطعت وكماني مدنيش عمولتي.

قلت يا نهار أبيض... فينا من كدا؟؟؟ إلا الفلوس، أنا ممكن اسكت عن أي حاجة إلا فلوسي.



## يوميات مُغترب

قال أنا جايلي عرض من شركة بـ 10 آلاف درهم، شركة كبيرة ومدة العرض شهرين عشان اروح ليهم. وقلت للمدير وقاللي هجيب واحد تدريبه وبعدين امشي، يعني بعد شهرين هتمشي عدّي 3 شهور كل لما اقولله عاوز أمشي يقول مش لاقى حد ييجي مكانك ولما أنت جيت قاللي هتمشي بعد شهر، قتلته ابقى قابلني، عدّي 3 أسابيع وأنا لسه معرفتش ربع البرنامج.


### وجهة نظر المدير:


المدير كان دايمًا يقوللي آرون دا أغبي واحد شفته في حياتي، كل العملاء يشتكوا منه، العملاء دلوقتي بيخافوا من أي تعديل نعملوا في البرنامج لأنهم عارفين إن آرون بيصلح حاجة ويوظ حاجة ثانية.

مستهتر.. مش منظم.. بيضيع وقته.. الحاجة ممكن تخلص في ساعة بتاخذ مئة 4 ساعات.. أنا نفسي يسبب الشركة من بكرة.. بس انت لما تشد حيلك في البرنامج شوية.. وهو يحل المشاكل بتاعته مع العملاء.. أنا لو متابعتش كل حاجة بنفسي هو هيخرب الشركة.. أنا بخصم منه عشان عارفه بيحب الفلوس فلما يغلط ويتخصم منه تاني مرة هياخذ باله ☺

### وجهة نظر دينا :

دينا بتقول آرون مش كويس... مهمل... مبينظمش شغله... وبينسى هو عمل إيه. فيضطر يعمل الحاجة اكر من مرة.. بيروح لأي عميل عشان يحل مشكلة يقوم يسبب مشكلة ثانية... العملاء بتخاف لما يروح عندهم كلام دينا والمدير متقارب ودا لسبب مهم جدًا، إن المدير بيكون وجهة نظره





بناء على وجهة نظر دينا، يعني لو دينا قالت عن حد وحش، يبقى الحد دا وحش في نظر المدير حتى لو عمل له البدع.

ودينا هي اللي اكتشفت إن آرون جايله عرض من شركة ثانية، قالتلي هو في يوم نسي العرض بتاعه على المكتب وأنا بالصدفة لقيته.. واخدين بالكو بالصدفة، والصدفة كانت بتعمل معاها حاجات كثير ☺.

### من وجهة نظري:

سواء آرون كويس أو وحش، هو دلوقتي معاه عرض من شركة ثانية ولو استني أكثر من كدا العرض ممكن يضيع عليه، وهو مقدم استقالته أكثر من 3 شهور ومن حقه يمشي قانونيًا بعد مرور شهر من تقديم الاستقالة، لكن المدير مستغل إنه معندوش جرأة ومخلهوش يمشي لحد دلوقتي وكمان بيضغط عليه في الشغل.

أنا مكنش عجبني الظلم اللي كان بيتعرضله آرون ومرضاش إن دا يحصل، فكنت بديله نصائح إنه مينفعش يسكت والمفروض يعمل إيه، لكن بصراحة عمري مكنت أتوقع إن رد فعله هيكون بالسرعة دي، كنت متوقع إنه هياخد شهر أو أكثر، أو هياخد الكلام من هنا ويطيره من هنا.

مظنش إن كلامي بس هو اللي خلى آرون ياخذ قراره، أكيد كان بياخذ آراء ناس ثانية لكن كان مستني الفرصة الصبح واللي جت لما المدير بعثله رسالة وقاله مخصص منك 14 يوم عشان كدا مجاش الشركة تاني وراح قدم شكوى ضد الشركة في العمل والعمال. وخلال أسبوع العمل والعمال حكموا بقبول استقالة آرون.



## يوميات مُفترب

من الآخر آرون راح للعمل والعمال وقالهم «أخاف ألا أقيم حدود الله». على طول حكموله بالخلع، طبعًا أكيد مش أنا محامي الخلع ☺. ما بعد آرون:

في أول رد فعل، الشركة بعثت رسائل لكل العملاء بعدم التعامل مع الموظف آرون من تاريخه لأنه ترك الشركة، وأي تعامل معاه على مسئولية العميل.

قبل كداء، لما كانت مشكلة تظهر عند عميل، كان يتصل على موبيل آرون، وآرون يروح يحلها، لكن دلوقتي العميل يتصل على تليفون الشركة، وكنت أنا أو دينا اللي بنرد على التليفونات وطبعًا ولا دينا فاهمة حاجة ولا أنا فاهم حاجة من مشاكل العملاء.

وظهرت أكبر مشكلة، آخر إصدار من البرنامج غير موجود في الشركة، كل التعديلات والتحديثات اللي عملها آرون للعملاء خلال آخر 20 يوم غير موجودة على الجهاز الرئيسي للشركة.

المدير جه يلومني ويتفذلك ويتنرفز عليا، إنت إزاي مخدتش التعديلات دي من آرون، أمال أنت قاعد في الشركة كل يوم بتعمل إيه. قلت وأنا أعرف منين، حضرتك مقولتليش آخذ منه حاجة، أنا أي تعديلات بعملها بحطها على الجهاز الرئيسي أول بأول، لكن معرفش إذا كان آرون بيحط ولا لا.

رد عليا وقال، آرون ضحك عليك ولبسك الطاقة وسرق البرنامج، قتلته لا ملبسنيش حاجة، أنا معايا الكاب بتاعي ☺، أنا لسه جديد في الشركة، طبعًا فهم من كلامي إنه هو اللي لبس الطاقة ☺.




## هذا ما رأيت في دبي

المدير راح رفع قضية على آرون إنه سرق البرنامج وأضر بالشركة. بس طبعا القضية لازم يتحدد ليها جلسة وإخطار ويبحث يعني الموضوع هياخد وقت على الأقل شهر.

المدير قعد معايا نفكر إزاي هنعدي الفترة الانتقالية بسلام ونسلم البرنامج لسلطة مدنية (ليا طبعا 😊). قاللي هتتصل على آخر عميل وهتاخذ منه نسخة من قاعدة البيانات وتقارنها بقاعدة البيانات اللي موجودة في الشركة عشان تحدد الفرق بينهم وأنا هديك تقرير بكل الحاجات اللي آرون عملها خلال الـ 20 يوم اللي فاتوا (من التقرير اليومي بتاع آرون) وإننت عليك تخط خطة تنفيذ.

طارق، الفترة دي صعبة، ودا اختبار حقيقي ليك، ولازم تثبت نفسك. حاضر يا بشمهندس، إن شاء الله، وابقى قابلني (في سري طبعا).





## الفترة الانتقالية

بعد الاجتماع العظيم الي عملناه عشان نرسم خطة للفترة الانتقالية وبعد القبول الجبري لاستقالة الحكومة السابقة (قصدي آرون). قرر المجلس العسكري (قصدي المدير) تكليفي بتشكيل حكومة جديدة مني أنا بس. تتولى زمام الأمور وتكون عليها المسؤولية الكاملة لإدارة شئون البلاد (قصدي البرنامج). وطبعًا زي ما كل الناس عارفة، لما يحصل مشكلة، الحكومة الي بتشيلها، فيقرر المدير يقبل استقالة الحكومة ويكلف شخص تاني بتشكيل حكومة جديدة.

المدير سافر على عمان عشان يهتم بالشئون الخارجية للبلاد، وأنا بدأت تظهر لي المطالب الفئوية للشركات الي بتعامل معاها (مشاكل بتقابلهم في البرنامج)، وطبعًا مفيش استجابة فورية للمطالب، لإني لازم أعمل دراسة كاملة للمطلب دا وتأثيره على البرنامج ككل، ودا كان بيخلي الشركات تعتقد إن مفيش استجابة لهم فيقوموا بتصعيد الموقف وعمل إضرابات واحتجاجات منها قطع أي مصادر للدخل والاتصال المباشر بالمدير، ودا كله كان بيجي على راس العبد لله الي لسه أول مرة يمسك حكومة وعاوز يثبت إنه يقدر يعدي الفترة الانتقالية بسلام وأمان.



المدير طول الأسبوع في عمان وكل أمّا أسأله على حاجة يقول لي جمع المشاكل والحاجات الي هتقف معاك ولما آجي آخر الأسبوع هنعمل اجتماع ونناقش المشاكل دي كلها.

طيب ما كل حاجة واقفة أصلاً، يعني هفضل طول الأسبوع أجمع أجمع في مشاكل واستني المدير. هيجي يقول أmaal إنت اشتغلت في إيه طول الأسبوع لما كل حاجة واقفة معاك، وبردوا هيجي على راسي.

مكنش قدامي إلا إني أحاول مع نفسي في المشكلة عشان أفهمها جت ازاي، وساعات كنت بتصل على العميل أسأله المشكلة جت ازاي، وافضل أجرب لحد ما المشكلة تحصل معايا ومنها بعرف العيب فين وأحله، طبعاً كنت بموت في الموضوع دا، لكن الحمد لله المشاكل كانت بتتحل ببركة دعاء الوالدين، كنت بروح كل يوم على 12 بالليل ولوروّحت بدري بفضل اشتغل بردوا لإني عاوز أفهم كل حاجة وعاوز أكون ملم بالبرنامج في أقل وقت.

المدير كان بيعجي آخر الأسبوع وميكنش فاضي خالص، معظم الوقت يا في البيت يا وراه اجتماع وميقعدش معايا أكثر من ساعة يكلم كلمتين وينخلع ويسبني مدبس ولا ألحق أناقشه في أي حاجة، ولو جيت كلمته لما يسافر يقول منا كنت عندك مسألتيش ليه. من الآخر حاوريني يا طاطا.

اتعلمت البرنامج كله لوحدي، يا إما بالتجربة، يا من ملفات الشرح القديمة، يا إما من العملاء أنفسهم، لأن العميل اللي كان بيحصل معاه مشكلة، كان بيشرحها لي المشكلة حصلت ازاي ومنها بفهم الجزء دا.

لما آرون مشي مكنش أعرف العملاء وكنت بتلخبط حتى في أسمائهم لما

## يوميات مُغترب

حد يتصل في المكتب، لكن لما بقيت مسئول عن الفترة الانتقالية عرفت كل العملاء والمهندسين كمان. وضربت صداقة مع المسئولين عن البرنامج في معظم الشركات، وكنت بحس كل واحد إنه أهم عميل عندي، طبعًا دا مهم جدًا، لما تصاحب العميل بتاعك هيساعدك حتى لو عنده مشكلة هيقولك عليها ويصبر عليك لما تحلها مش هيوصل الموضوع لصاحب الشركة أو الإدارة بتاعته على طول ويكبر الموضوع، فيه ناس كثير بتعمل كدا، عشان تحسس المدير بتاعها إنه شغال وكله بيعجي على راس المسكين اللي هو أنا.

موقف من المواقف النادرة مع المدير بتاعي كان الحسابات، الجزء الخاص بالمحاسبين في البرنامج أنا مشتغلتش في برامج حسابات قبل كدا بس كان عندي أساسيات عنها، المدير كان قعد معايا أنا ودينا عشان يشرح لنا الحسابات، فاكرين يوم ما بعت رسالة لأرون قاله لو مجتش مخصوم منك 14 يوم واللي من ساعتها أرون مدخلش الشركة. هو كان يوم ملوش نهار.

قعد معانا حوالي ساعة ونص يتكلم عن أساسيات الحسابات، الدائن والمدين، والحسابات اللي أساسها دايين والحسابات اللي أساسها مدين. دينا قالتلي بعديها إنه شرح لها الموضوع دا أكثر من 5 مرات وبتطلع كل مرة ولا الهوا بس بتعمل نفسها فاهمة عشان ميزعقش ليها.

حتى دينا سألته يومها، هي ليه الأصول في الحسابات مدينة. قال هي كدا، طبيعتها كدا، ينفع أسألك انت ليه بنت؟ أنا اتصدمت من الرد وهي ازبملت، فعلاً إجابة مقنعة جدًا.

الحاجات اللي كان بيقلها كانت أساسيات وكنت عارفها كلها، وهو



— طبعًا مفكر نفسه يقول درر وكنوز وطبعًا أنا لازم أحسسه إني بستفيد، المدير بتاعي هعمل إيه.

دي نصيحة لأي حد، إوعي عمرك تحسس مديرك إنك مبتستفدش منه أو تعرف أكثر منه، لأن دا هيبقى له آثار سلبية عليك، وخصوصًا لو إنت جديد. لكن يارتني مكنت حسسته إني فاهم لإني كنت كل أمّا اسأله في أي حاجة في الحسابات، يقولي إنت مفهمتش المحاضرة اللي إنت إديتها سعتين. وانت لما مكنتش فاهم مقلتش سعتها ليه. ويعمل عليا أسطوانه كدا وفي الآخر يقولي شوف كتاب في الحسابات اقرأه ولما أرجع آخر الأسبوع هعمل اختبار فيه !!! إيه ياعم دا. إنت بتكلم طالب في الثانوية. هعمل اختبار. وفي الآخر مبيدنيش عقاد نافع.

في مرة اكتشفت إنه فيه شاشة في الحسابات فيها غلط، فضلت أكثر من ساعة عشان أفهمه اللي أنا عايز اقوله، لأنه مبيدنيش فرصة أكمل كلامي، أول ما ادخل في موضوع الحسابات يروح داخل شمال !!! إنت مفهمتش المحاضرة اللي شرحتها ساعتين. أنا قلتلك اقرأ في الحسابات مقرأتش ليه؟ إنت مبتسمعش الكلام !!! إنت إنت إنت... وبعد ساعة لما يفهم إن فيه مشكلة يقولي. دي زبالة من زبالات آرون.. وحاول تصلحها.. ماشي ياعم المدير، شكرًا، جبت التايهة.

حالتي النفسية تعبت جدًا، لأنني لوحدي في الشغل ولوحدي في السكن، مفيش حد أكلمه. ولما الواحد يكون مضايق أو مخنوق بيبقى عايز حد يتكلم معاه. فترة كانت صعبة جدًا. (صعبت عليكمو صح).



## يوميات مُقْتَرِب

بعد مرور شهر من العذاب، الحمد لله بقيت شايل البرنامج كله وفاهم كل جزء فيه لكن حجم التعديلات وطلبات العملاء كانت كثير وكان لازم حد ثاني ييجي عشان يساعدني.


بدأت أكلّم المدير عن صاحبي المبرمج اللي في مصر عشان ييجي يساعدني ويشيل عني شوية. قاللي ماشي، بس هنجيبه زيارة الأول كتجربة. يعني ياخذ أجازة من شغلة وييجي شهر ولو لقيته كويس زيك كدا هيكمل معانا، ملقتوش كويس يبقى يكمل الشهر وياخذ مرتبه وتذكرة سفره ويرجع على مصر.

أنا اتبسّطت صراحة، لما قال كويس زيك، أول مرة يقوللي إنت كويس، بس معجبنيش الطريقة اللي هيحبيب بيها صاحبي، قتلته حضرتك مينفعش واحد يسافر ويسيب شغله وأهله يعرفوا إنه مسافر يشتغل بره ويرجع بعد شهر، حضرتك إعمله إنترفيو أو اختبارات زي ما انت عاوز ولو اقتنعت بيه يبقى نجيبه لأنه لازم يقدم استقالته ولازم يخلص أوراقه في الشركة عشان العقد اللي ماضيه هناك، لو حضرتك مقتنعتش بيه يبقى هو موجود في شغله هناك. قاللي خلاص هشوف، بس هييجي زيارة زيك وبعدين هعملك إنت وهو الإقامة مع بعض، قلت مفيش مشكلة. طبعًا إنتوا فاكرين إني لسه على زيارة 😊. بس ولا فارق معايا، زيارة زيارة، مهو مفيش غيري دلوقتي، يعني ميقدرش يعمل حاجة 😊.





هَذَا مَا رَأَيْتَ فِي دُبَيِّ



## هريدي

المدير قرر فجأة إنه ينزل مصر عشان يقابل ناس عشان بيزنس خاص بيه،  
المهم قاللي هات رقم هريدي صاحبك عشان أقابله في مصر وأعمله إنترفيو،  
إديته الرقم واتصلت على هريدي وقتله أجهز للإنترفيو وقتله على معظم  
الأسئلة اللي ممكن المدير يسألها.

وبالفعل نزل المدير مصر واتصل على هريدي واتقابلوا وهريدي فضل  
يتكلم معاه عن نفسه وعن خبراته وصولاته وجولاته ومفيش أحسن من  
الكلام وحد هيسأل حصل ولا لا 😊.

المدير اتبسّط من هريدي زي مكان مبسوط مني قبل ما آجي الإمارات  
وقاله إنت معايا إن شاء الله وأنا ناوي أفتح فرع في مصر ولو محبشي تكمل  
شغل في دبي، ممكن تنزل تمسك فرع مصر.

إيه دا ياعم الحج، نفس الكلام اللي اتقاللي أول ما سفرت، هو كل  
الموظفين في الشركة هينزلوا يمسكوا فرع مصر اللي لسه متفتحشي أصلاً.  
وانتهت الإنترفيو بدون أي اختبار تقني سواء عملي أو نظري لهريدي.



## يوميات مُغترب

يعني هريدي يعتبر هيجي على ضماني ودا اللي مكتش عاوزه، كنت عاوز المدير يختبره زي ما هو عاوز عشان لو اتكلم بعد كذا أقول حضرتك اختبرته. بعد ما المدير رجع من مصر بأسبوع، قال لي خلي هريدي يشوف أقرب وقت يقدر يسبب الشركة اللي هو شغال فيها عشان اعمله زيارة وييجي. طبعا كنت مبسوط جدا وقلت لهريدي: «الملم خلاتك عشان هتدلى طوالي على دبي».

هريدي علي، أو هريدي، اسم الشهرة، مبرمج، أكبر مني بسنة، شغال في شركة كبيرة في مصر، بس كان مخنوق منها شوية، مرتبه مش مناسب وطلب زيادة كذا مرة وطلبه إترفض بحجة إن الزيادة بتبقى سنوية ومينفعش يزيد دلوقتي فقرر إنه يسبب الشركة وكلمني كذا مرة من أول ما سفرت عشان ييجي يشتغل معايا. طبعا أنا مفهم هريدي طبيعة الشغل والظروف اللي أنا مريت بيها، عشان ميجيش ويتفاجأ بس هو كان موافق لأنه حسب تعبيره «إتخنى» من الشركة اللي هو فيها.

أول ما قلت لهريدي، راح طابع استقالته. كان مجهزها ومستني الفرصة ☺ وسلمها للمدير بتاعه.

المدير قاله، ليه يا هريدي بتستقيل، قاله حضرتك عارف المرتب مش كويس وأنا طلبت زيادة كذا مرة واتفضت وأنا جايلي عرض في الإمارات وهسافر آخر الشهر إن شاء الله.

حصل اجتماع في الشركة وهيصة وقالوله، هنزودك ألف جنيه لو سحبت الاستقالة، قاهم إزاي. هيا الزيادة مش سنويه، قالوله دي هتبقى ليك إنت بس، زيادة استثنائية بس ثابتة يعني هتاخذها على طول، وهنسفر في أقرب فرصة السعودية أو الكويت.





شركة هريدي ليها فروع في قطر والكويت والسعودية ولبنان واوقات  
بتسفر المبرمجين 63 شهرًا أو شهور أو سنة حسب احتياج العملاء في الخارج  
وطبعًا مش أي مبرمج بيسافر، لازم يكون خبرة كويسة وقديم في الشركة  
لأنه بيقبض في الخارج بالساعة وبال دولار، دا غير مرتبه اللي في مصر ماشي  
زي ما هو، يعني بيقبض مرتين، المرتب المصري ومرتب بالدولار، الله يبارك  
للجميع، إحنا مبنحسدهش، إحنا بنقرر ررر بس 😊.

الشيطان بدأ يلعب في راس هريدي، ما كدا كويس، ألف جنيه زيادة  
وأنا في بلدي، الناس كلها بتقول دبي غالية... ومش هتوفر حاجة يبقى ليه  
أسافر واتغرب واتبهدل مع طارق، وكمان هما هيسفروني في أول فرصة...  
وووو.....وووو.....وووو.....وووو.

ناس كتير قالت لهريدي إن المرتب اللي هتاخده في دبي وحش ومش  
هتوفر منه حاجه وهتصرفه كله.

هريدي بدأ يفاتحني في الموضوع، قاللي الوضع كذا كذا، وأنا شايف كدا  
كويس، وأكمل في الشركة أحسن والناس كلها بتخوفني من السفرية ديه،  
وبيقولولي مش هتوفر.

أنا سبته يكلم لحد ما خلص خالص، وكنت ماسك نفسي على الآخر  
وأول ما خلص، رحلت داخل فيه شمال، إنت بتهرج يا هريدي، يعني أنا من  
أول ما سفرت وانت عمال تقوللي شوفلي فرصة، وأنا من وقتها عمال أقنع  
في المدير وبعد ما اقتنع ووافق وقال كلمه عشان نطلع له الفيزا، جاي تقوللي  
أصلهم زودوني وأنا شايف كدا أحسن.



## يوميات مُغترب

مش هي دي الشركة اللي كنت عمال تلعب فيها وإنهم بيضحكوا عليك وبيدوك مرتب وحش ورفضين يزودوك، دلوقتي بقوا كويسين، وإيه ضمنك إن بعد شهرين ثلاثة يلغوا منك الزيادة، وقتها مش هتقدر تكلم، لأنهم قالوا لك دي مش هتنضاف للمرتب الأساسي، والفرصة هتكون راحت عليك.

إنت عارف إني أنا لوحدي هنا، وفيه أكثر من واحد يتمنى يبجي، وأنا عايز أجيبك إنت الأول، دلوقتي بتبيع عشان زودوك وتخرجني قدام المدير، إنت عارف إني إتحقت من الوحدة ومفيش حد اتكلم معاه ويشاركني المواقف اللي بعيشها ويشيل عني شويه، إيد على إيد تساعد بردو والوضع مش هيفضل كدا على طول وأي يوم بيعدي على الواحد هنا بيزداد خبرة في البلد.

عمومًا ما دام إنت قررت إنك متجيش، ربنا يوفقك ويسهلك وأنا هتصرف.

هريدي إتأثر بالكلام وحس بالذنب، طبعًا ما أنا أستاذ في الدراما 😊. وقال خلاص ياعم أنا مش راجع في اتفاقي معاك وإن شاء الله هاجيلك بعد شهر ومش هسحب الاستقالة.

طبعًا المفروض يمشي بعد شهر من تاريخ تقديم الاستقالة بس هو عشان علاقته حلوة هناك بالناس وكان ليه رصيد أجازات، خلص خلال أسبوعين. قلت لهريدي، بدل ما تستنى أسبوعين في مصر، تعالى قبل ما الشهر يخلص، هتخدلك مرتب أسبوع يكفيك مصاريف الشهر، قاللي ماشي، كلم المدير وأنا جاهز من أول الأسبوع الجاي.

كلمت المدير إن هريدي جاهز، وأول ما رجع من عمان على آخر الأسبوع



طلب مني صورة جواز السفر بتاع هريدي وصورة شخصية له... ويبيعهم على الإيميل ضروري خلال ساعتين عشان يلحق يقدم على الزيارة قبل ما الجوازات تقفل.

هريدي مكنش معاه صورة لجواز السفر على الكمبيوتر، قتلته خدها  
بكاميرا وابتعتها وانجز، راح ضربها بالموباييل بتاعه نوکيا إن 73 وبعثها ليا  
على الإيميل.

[illegible]

المدير قال إيه الصور دي، دي متاخدة بكاميرا مش إسكندر. كان موقف  
لا أحسد عليه ولا يحسد عليه هريدي، المدير قاللي إديني رقم هريدي وراح  
متصل عليه، أيوه يا هريدي إزيك، معاك المدير، إنت صورة الجواز اللي إنت  
بعتها دي خدتها ازاي، إنت عارف إن الصورة دي هتروح الجوازا، إنت  
بتهزر، ولا مش عارف إنت بتعمل إيه. مفيش تفكير خالص. وزعقله شويه  
وفي الآخر قالله أنا مش عارف إنتوا بتفكروا ازاي وراح قافل السكة 😊.

هريدي إتاثر جدًا وحس إن شكله بقى وحش قوي، تخيل أول موقف بينك وبين مديرك الجديد ويقولك إنت مش عارف إنت بتعمل إيه، مفيش تفكير، يا حلولي، يا حلولي ☺.

هريدي راح دور على كافي نت وعمل إسكان للجواز بتاعه وبعث الصورة  
ولما كلمني على النت بعدها فضل يلوم فيا، ينفع كدا ياعم طارق، مش إنت  
اللي قايللي خدها بكاميرا، طب إنت لما شوفتها مش واضحة مقولتليش ليه،  
قتله والله مخدت بالي وبعدين أنا مصور بكاميرا كانون ديجيتال مش موبيل



## يوميات مُغترب

نوكيا 😊. والحمد لله إنه مكنش اكتشف إني كنت مصورها بكاميرا، كانت فضيحتي هتبقى بجلاجل.

المهم ربنا سهّل والموضوع خلص والفيزا طلعت وجينا عشان نحجز لهريدي على طائرة ملقناش ولا كرسي فاضي لمدة أسبوع، كل الرحلات مليانة، كان جاي قبل رمضان بيومين أو ثلاثة، وبالصدقة دينا لقيت مكان فاضي لواحد كانسل السفر بتاعه، اتصلت بهريدي وقالتله روح احجز حالاً على طائرة بكره المغرب، في واحد كانسل الحجز بتاعه.

هريدي كان وقتها في القاهرة وراح على طول حجز لكن ملحقش ينزل بلده في الشرقية عشان يسلم على أهله، يا دوبك اشترى شوية مستلزمات عشان السفر وظبط شنطته لأنه ساكن في القاهرة مع صحابه عشان الشغل. حصل مواقف طريفة في مجيء هريدي:

الموقف الأول: الحاجة والدتي كانت مستنيه تعرف اليوم اللي هريدي مسافر فيه، ومجهزة الأكل المصري، شوية بط وشوية فراخ وسمنة بلدي، عتاد للمغربين 😊.

ربنا يباركلي فيها يارب، طول عمرها والله، حتى أيام الكلية وأنا ساكن في المدينة الجامعية، كانت نص الشنطة بخدها ملابس ونصها الثاني أكل 😊.

اتصلت على والدتي وقلتله إن هريدي هيسافر من القاهرة إنهاردة المغرب ومش هيعرف يقابل حد ومش مهم بقى الحاجات اللي هتبعثوها. والدتي قالت مش ممكن هريدي يسافر إلا لما ياخذ الحاجات، دا أنا بجهز فيها من أسبوع.

أحمد أخويا اتصل على هريدي وقالله إنت فين عشان هجبلك حاجات



## هذا ما رأيت في دبي

طارق القاهرة ووالدي حطت الحاجات كلها في شنطة وقفلتها قفلة محترمة  
عشان متفتحش إلا في الإمارات.

كان فيه حاجات كنت طلبتها من أحمد اشتراها وهو في الطريق، وإداها  
لهريدي عشان الشنطة متقفلة ومفيش مكان فلهريدي حطها في الهاند باج  
بتاعته من غير ما يعرف إيه الحاجات دي.


هريدي قبل ما يطلع على الطائرة وهو بيعدي من الجهاز ومعاها الشنطة  
الهاند باج، الجهاز صفر، قالوله إنت معاك إيه في الشنطة، في معاك شيء حاد،  
قال ممعايش حاجة، قالوله طب تعالى هنا وفتشوه تفتيش ذاتي ودقيق وفتحوا  
الشنطة وفتشوها، طلّعوا منها علبتين أمواس حلاقة هههههه.

قالوله إنت واخد أمواس حلاقة على الطائرة ليه. هتخلق شنبك هناك.  
هريدي ميعرفش عنهم حاجة، دي من ضمن الحاجات اللي أحمد أخويا  
ادهملي وحطهم في الهاند باج على طول 😊.

بس لو قال إنهم مش بتوعي هتبقى مصيبة، ممكن يشكوا فيه، وسعتها  
ابقى قابلني لو حد عرف مكانك. الأمن المصري ما شاء الله عليه في الحاجات  
دي، ممكن يظبطوه تظبيطة محترمة.

هريدي استعبط وقال أنا معرفش إن الحاجات دي ممنوعة، أنا أول  
مرة أسافر، وفي هزار كذا قال، بس أنا مسامح فيهم، خدوهم هدية مني،  
فضحك الأمن وضحك هريدي وضحك الجمهور وتعالى الضحك في  
أركان المطار وضحك الطيار وعمل تخميسة بالطيارة وعدي هريدي والأمن  
خد الأمواس وأنا محلقتش 😊.

الموقف الثاني والأشد: المرة الجاية إن شاء الله



## هريدي في دبي

لما هريدي قاللي: إنه خلص كل الإجراءات ومستني الطائرة كان الوقت حوالي الساعة 6 مساءً بتوقيت دبي، كنت بخلص شغل والمفروض إني أروح بقي، لكن عشان أنا ساكن في الشارقة فقلت أستني في المكتب وكلها 3 ساعات بس وأروح على المطار ☺، محدش ضامن ظروف المواصلات في البلد دي. قلت أقضيها إنترنت ولا أي حاجة والوقت هيعدي بسرعة.

وأنا قاعد كدا في أمان الله، لقيت صوت ضئيل جاي من الموبايل بتاعي، أكيد عرفته، البطارية ضعيفة، يا هنااا أبيض، ضعيفة مين، دا الراجل لسه هيوصل بعد 3 ساعات ونص وعشان يطلع من المطار فيها ساعة عشان أول مرة وزيارة، يعني الموبايل هيكون فصل شحن.

نخبش عليكموا، الموبايل كان صيني، أول ما نزلت الموبايلات الصيني، أول إصدار، أنا اشتريته، كان بـ 700 جنيه وقتها، بس كان تحفه وفضل معايا أكثر من سنة ونص دون أن يشتكي وطبعًا كان أكثر حاجة بتميزه الصوت المزعج والمنبه اللي يصحي القليل والتليفزيون، ويا سلام بقي لما الواحد



يطلّع إريال التليفزيون الي في الموبايل وأنا راكب في التاكسي، وألاقي سواق التاكسي يبصلي كدا ولسان حاله بيقول «الواد دا عبيط ولا إيه». كان بيسليني في وحدتي، لكن شكله هيعملها معايا إنهارده وهيفصل شحن، ربنا يستر.

طلعت على المطار في حدود الساعة 9 مساءً عشان انتظر هريدي باشا قادمًا من أرض الوطن، وقلت أفصل الموبايل عشان البطارية متفضاش خالص ولما الطائرة توصل أبقى أشغل الموبايل تاني.

الطيارة وصلت حسب ما أعلن المطار، قلت الحمد لله، جيت أشغل الموبايل منطقتش، ياعم الحج اشتغل أبوس إيدك، نام للأبد، طب أنا مش أطلع رقم هريدي على ورقة عشان أرن عليه من موبايل أي حد واقف، مجتش في بالي الفكرة دي، على أساس إن موبايلي مش هيعمل معايا كدا.

مكنش قدامي إلا إني أقف أبص على الناس الي خارجة من المطار واحد واحد، ودا طبعا عذاب لأن مطار دبي الدولي بيبقى زحمة جدًا، وطبعًا عشان هريدي ميعديش مني، مكنتش بسيب حد خارج إلا لما أتأكد منه، سواء بنت أو ولد، إفرض متخفي مثلاً، معرفوش أنا ويتوه مني، ولا إيه؟ ☺.

وقفت ورا الفاصل بين مكان الانتظار، وبين الممر الي بيخرج منه المسافرين أو القادمون، قلت عشان أبقى قريب ولو شفته ونديت عليه، ممكن يسمعني.

ومن بعيد وبخطى هادية لمحته، شابا في مقتبل العمر، مش وسيم ولا حاجة أنا أو سم منه. يرتدي بدلة ويضع القليل من الكريم على شعره المجعد (شعري أحسن من شعره كتيبيير)، يدفع ترولي عليه شنطتين، إحداها

## يوميات مفترب

شنطة سفر صغيرة والأخرى شنطة يد، ينظر يمنة ويسرة، وكأنه يبحث عن شيء ما. ترى على ماذا يبحث؟! هل فقد شيئاً، أم أنه منبهرب بما يشاهده من الجنسيات المختلفة؟ فهذا كوري وهذه فلبينية، وهذا هندي وهذه روسية، وهذا مصري، وهذه مغربية، هذا يرتدي بنطلوناً وهذه ترتدي، احم احم، يا هريسيديسيديسيدي، أنت يابني، أنا هنا، أنا هنا، قابلني عند الباب. وطلعت من صالة انتظار القادمين عشان أقابله قدام باب الخروج الي هيطلع منه، وأول موصلت ملقتهوش، إيه دا، الواد اتخطف؟، المكان زحمة والناس كثير، هندور من تاني ولا إيه، المفروض يستناني هنا، هيروح فين يعني. والـف شمال يمين، أدخل صالة الانتظار، أقول يمكن جالي على هناك، أبص على المكان الي المسافرين بيطلعوا منه تاني، مفيش، فص ملح ودااااب. طبعاً لو الموبايل مكنش فصل شحن مكنش هبقي في موقف زي دا، فضلت رايح جاي، رايح جاي من البوابة الرئيسية لصالة الانتظار حوالي ساعة إلا ربع وهريدي ملوش أثر.

طب أعمل إيه دلوقتي. أروح وأسيه عقاباً له. ولا أروح أشحن الموبايل وأرجع عشان أكلمه. دا هما يا دويك ساعة ونص ولا حاجة وارجع. ولا أروح أجيب ميكروفون من العتبة وأمشي أنادي عليه. عيلة تايهة تايهة يا ولاد الحلال. منك لله يا هريدي، هو أنا ناقصك.

قلت أمشي شوية على طول يمكن يكون شاف بنت حلوة ومشي وراها، وألاقي هريدي واقف ورا العمود، وعمال يزن علياً، يعني بقالي ساعة وربع بدور وبينني وبينه حوالي 15 متر وهو من ساعة ما وقف ورا العمود





## هكذا ما رأيت في دبي

متحركش، طبعا أنا لو مكتتش في مكان عام ومسكت نفسي، مكتتش هعمل حاجة بردو.

أنا: ياعم والله حرام عليك يا هريدي في حد يقف ورا عمود؟!  
هريدي: ياعم أمال أقف فين، أنا عمال أرن على موبايل مبردش؟!  
أنا: أنا مش قيلك قابلني على الباب، دا الباب؟

هريدي: أنا طلعت لقيت الناس ماشية مشيت معاهم، وبعدين وقفت هنا استناك.

أنا: شاطر ياخويا، يلا عشان إتأخرنا وهنيجي على الشغل بدري بكرة.  
المفروض تاني يوم هريدي هيروح معايا الشغل، كان يوم خميس عشان يقابل المدير قبل ما يسافر عمان، إنتوا عارفين إنه بييجي الأربعاء ويسافر الجمعة.

خدنا تاكسي وطلعنا على البيت، وطول الطريق بيحكيلي على اللي حصله في المطار وتفاصيل اليوم الأخير في مصر لحد ما وصلنا البيت، حمد الله على السلامة يا هريدي، خش برجلك اليمين، إتمخري يا حلوة يا زينة يا وردة من جوة جنينة، لولو ولولولي ☺.

طبعا عملت انقضاخ على الشنطة اللي جوالي من مصر لما تحتويه من خيرات بلدنا، إتعشنا عشاء مصري 100 في المية وأخلدنا للنوم.

صحيت الصبح 6:15 كالمعتاد بالنسبة لي، طبعا الأول مكتش حد معايا، الشقة كلها تبغي، لكن دلوقتي، لازم كل حاجة بالمواعيد، وأهم حاجة،

## يوميات مغترب

الحمام، لازم يكون بالمواعيد، عشان محدش يتأخر فيأخر اللي بعده، لو عارف نفسك هتأخر في الحمام، يبقى إصحي بدري يا حلو، وعشان أنا عارف نفسي، صحيت بدري 😊. أنا فيا عادة من أيام الدراسة، أحسن أفكار بتجيلي وأنا في الحمام، بحب افكر وأتشاور مع إبليس ههههه. وأنا في الدراسة كنت تراجع اللي بذاكرة في الحمام، أهو بدل ما تقعد فاضي 😊.

نزلنا من الشقة على 7:10 الصبح، وصلنا المكان اللي الاتوبيس هيتحرك منه 7:15 والاتوبيس جه في ميعاده 7:20، مفيش أحسن من كدا ولا تعب مواصلات ولا أي حاجة، طبعًا فاكرين موضوع المعاناة اللي شفتها في المواصلات سواء من الناحية المادية أو الحر الشديد في انتظار التاكسيات.

هريدي باشا، محسش بحاجة، يا دويك وقفنا من 7:15 لحد 7:20 لما الاتوبيس جه، وكان عمال يقول، إيه الحردا، أووف، قتلته يابني أنت في نعمة، أنت ما شوفتش ولا هتشوف حاجه من اللي أنا شوفتها، ضحك ضحكة شريرة وقاللي. طبعًا. ما انا لازم استفاد بكل يوم أنت قضيتته في الإمارات قبلي، قتلته معاك حق، قول أوووف براحتك، من حقك.

وصلنا الشركة وبدأت افرج هريدي على البرنامج في السريع واقوله النقاط اللي المدير ممكن يكلم معاه فيها، وممكن يسأله في إيه وأول مقابلة بيني وبينه كانت إزاي، دا غير إني لما جيت وبدأ يشوف طريقة شغلي أو تفكيري، كان بيعترض على حاجات وهو لما يشوف حاجة متعجبوش بيفضل يتكلم فيها بالساعة لحد ما يحسس اللي قدامه إنه ولا حاجة. ويفضل يعيد في الكلام. البرمجة في مصر برمجة سوق، والمبرمجين بيقوا كثير، وكل واحد بيكتب اللي

## هَذَا مَا رَأَيْتَ فِي دَلِي

عايزه، والطريقة اللي هو عايزها، ومحدث بيراجع وراهم الكود، وبتبقى هيصه، لكن هنا لأ، هنا كل حاجة بحساب، وكل حاجة بتتراجع.

ساعات الواحد بيضايق من كتر الكلام، بس لازم يتقبل الوضع والتغير، ولازم يمشي على نظام المكان اللي هو فيه. أنا بقول الكلام دا كله لهريدي عشان ميقعش في نفس المواقف اللي أنا وقعت فيها.

كان لسه محدش جه الشركة، السكرتيرة ساجريد سافرت الفلين لأنها كانت على زيارة وكان لازم تسافر لما يخلصوا الإقامة بتاعتها، وآرون انتوا عارفين مشي، ووردة كانت سابت الشركة بعد مانا جيت بحوالي 15 يوم تقريبًا. يعني حاليًا إحنا 4 فقط. أنا وهريدي والمدير ودينا.


وأنا قاعد بشرح لهريدي، دينا جت، هاي طارق، هاي هريدي كيفك، حمدًا لله السلامة وراحت على المكتب بتاعها في الأوضة الثانية ورجعت بعد دقيقتين بالضبط، بصت في الأوضة وبعدين قالت:

هريدي!! أنت قاعدع الكرسي بتاعي، ممكن تشوف كرسي تاني عشان عايزة الكرسي دا؟

هريدي، بصيلها كدا مزبلاً ومندهشاً ومنصدمًا وراح قايم وهي خدت الكرسي ومشيت.

قاللي إيه ده، مفيش كسوف، قوم من على الكرسي بتاعي، كدا وش، قتلته عادي متستغربش، أنت مش في مصر، قال ماشي ياعم بس بردووو، دا أنا لسه أول يوم، تقول الكرسي بتاعي؟

قتله. ما قلنا أنت مش في مصر، إنسى بقى.



## هريدي والتاكسي

هريدي وصل الإمارات يوم الإثنين بالليل 25 أغسطس، جه معايا الشغل يوم الثلاثاء الصبح، أكيد 26 أغسطس ☺، شرحته شوية في البرنامج ونظام الشغل وإديته تاسك بسيطة كدا يتسلى فيها وعدى يوم الثلاثاء عادي وروحنا مع بهرام، سواق الأتوبيس اللي بياخذنا.

يوم الأربعاء، المفروض هريدي هيقابل المدير، هريدي كان قلقان وخصوصاً بعد موقف جواز السفر اللي كان صورته بالموبايل. المدير جه آخر النهار كدا وسلم عليا، إزيك يا طارق عامل إيه وسلم على هريدي، إزيك يا هريدي، حمد الله على السلامة، أخبار مصر إيه؟ أهلك وحشوك ولا لسه؟ وقال تعالوا على غرفة الاجتماعات، هريدي قاللي، هو المدير عرف إن اسمي هريدي إمتى أنا مكتبتوش في السي في، قلتله من أول يوم وأنا بقول هريدي مش بقول هريدي خالص، قاللي ناصح، مش كفاية في مصر الناس نسيت اسمي هريدي وبتقوللي هريدي.

رحنا على غرفة الاجتماعات، المدير بدأ يتكلم مع هريدي، وطبعاً الكلام هيبدأ بالمقدمة. أنت عارف إني جبتك من غير ما أعملك إنترفيو ولا أي



حاجة، أنا جيتك على ضمانة طارق، فلازم تثبت نفسك في الشغل، طارق  
جه في ظروف صعبة وأثبت نفسه إنه يقدر يتحمل الشغل، أنا جيت ناس قبل  
كدا لكن مكنوش كويسين ومكنوش بتوع شغل، فبمجرد الفيزا بتاعتهم ما  
خلصت، قتلهم انزلوا مصر خدوا خبرة كويس وبعدين فكروا تسافروا تاني.  
طبعا أنا رحت ساند ضهري للكرسي وحاطط رجل على رجل ودورت  
على المشط بتاعي عشان أظبط شعري بس ملقتوش، فتنحنحت كناية على  
إثبات وجودي والموافقة على ما قاله المدير 😊.

بعد كدا المدير اتكلم عن نظام الشغل، نفس الأسطوانة اللي قاهالي أول  
ما جيت، نظام الشغل هنا غير نظام الشغل في مصر، هنا كل حاجة بنظام  
وبحساب، شغلك لازم يكون منظم، إحتيالية الخطأ لازم تكون ضعيفة أو  
معدومة ولازم تتعود على كدا، لازم تكون يقظ، لازم تجتهد، لازم تثبت إنك  
جدير بالثقة.

الكلام دا لما اتقالي أول ما جيت، كنت بسمع واهز راسي وأقول ماشي  
وحاضر، ودا اللي المدير عايزه، السمع والطاعة حتى لو مش هتنفذ، بس  
قول حاضر 😊.

لكن هريدي كان مختلف شوية، الموقف معداش بحاضر وماشى، رد على  
المدير وقاله: منا كنت شغال في شركة كذا (كذا دا كناية عن اسم الشركة  
😊) ودي شركة كبيرة وفيها نظام بروفيشنال وواحدة الأيزو، يعني تخطيط  
ومتابعة وكل حاجة بتعمل بحساب.. ووو... ووو.

المدير إضايق من كتر الكلام، وأنا عن نفسي إضايقت، ودي كانت أول  
غلطة لهريدي مع المدير في دبي، كونك ترد على مديرك في كل كلمة يقولها فدا



## يوميات مغترب

مش كويس ومش هيزود قدرك، هو يحبك لما تقول حاضر وماشي وتطبق دا على شغلك، مش ترد عليه وتقول أنا ومش أنا.

أنا ومش أنا دي قبل ما تيجي الشركة، بتبين قدراتك ومواهبك، لكن بعد ما جيت الشركة الكلام خلص، بين شغل بقى.

في وسط الحوار، المدير حب يختبر هريدي في سؤال، وكان السؤال دا موضوع نقاش طويل بيني وبين المدير، وكنت قايل لهريدي عليه عشان يعمل حسابه لو اتسأل فيه، هو كان سؤال فني في البرمجة، فهريدي إجابته حاضرة وقبل ما المدير يكمل السؤال كان هريدي بيجاوب، لكن من سرعة هريدي في الرد، قلب خطوتين مكان بعض، ودا ييوظ الدنيا خالص، فطبعا لو المدير أخذ باله منها كانت هتبقى مصيبة، وهيدخل معاه في تفاصيل أكثر وسعتها ممكن هريدي يتلخبط وإحنا مش عاوزين مشاكل من أولها، فأنا رحت داخل بسرعة وبضحك قلت أنا قتلته على السؤال دا، وقلت المدير هيسألك فيه، فالمدير وهريدي ضحكوا، لكن هريدي حس بالإحراج.

في آخر الاجتماع، المدير قال لهريدي، أنا هبدأ أدبك شغل من بكرة وأنت هتروح لوحدك إنهارده عشان أنا وطارق هنروح المطار كمان ساعتين، هيجيلكم ضيف جديد، سامح، مبرمج دوت نت. فأنت روح ظبط الشقة، أو ظبط عشاء، عشان الضيف اللي هيجي دا، أكيد هيجي تعبان وعاوز يتعشى أو عاوز ينام.

لما خلصنا الاجتماع ورحنا الغرفة الثانية أنا وهريدي، قال لي يعني كان لازم تقول إنك قتلتي على السؤال دا، ما كنت تسيبني أجابيه، قتلته عشان



أنت بتكلم كثير من غير ما تفكر واللي بيتكلم كثير بيغلط، وأنت بتجاوب عكست جزء في الكود مكان جزء ثاني ولو المدير لاحظ كان هيبقى موقفك وحش، فأنا قلت كدا عشان ألحقك وأقفل الموضوع وأنت تسكت. هريدي قال، طب كويس، مش عايزين مشاكل من أولها. قتلته وبعدين حاول متكلم مش كثير، يعني مش لازم تعلق على كل كلام المدير، هو بيكلمك على النظام هنا كذا وكذا، مش تقوله أنا كنت شغال في شركة وكان فيها نظام والشركة واخدة الأيزوو هو ماله ومال الحاجات دي. ما دام شركة واخدة الأيزوو، سبتها ليه، كنت خليك جنب الأيزوو.

قاللي أنا دايمًا أكتيف Active وأحب تكون ليا شخصية وارد على الكلام، مش اسمع وبس، قتلته أنت حر، بس خلي بالك، دا مش كويس وممكن ييجي على راسك بعد كدا.

جت الساعة 6 وبهرام بتاع الباص رن عليا عشان أنزل، إتصلت بيه وقلته أنا مش هاجي معاك، بس صاحبي هيجي معاك هتنزله نفس المكان، فقاللي أوك بس بسرعة أنا واقف تحت، قلت لهريدي يلا إنزل بسرعة الباص واقف تحت وممكن يمشي لو اتأخرت، هريدي قال ماشي وبدأ يقفل جهازه وشنطته ونزل. شوية لقيت هريدي بيرن عليا، إتصلت بيه من تليفون الشركة، قاللي مش لاقى الباص، قتلته إزاي، قاللي أنا واقف من 5 دقائق ومش لاقيه، قتلته طيب إستنى هتصل بيه.

• إتصلت ببهرام

• أنا: ألو حبيبي، وين أنت؟

## يوميات مغترب

- بهرام: أنا يمشي، صاحب مال أنت يتأخر.
- أنا: حبيبي ما في تأخير، هو ينتظر تحت.
- بهرام: أنا خلاص مشيت.
- أنا: ما ينفع يرجع تاني، هو يسوي انتظار تحت بناية.
- بهرام: ما بيصير والله صديق، فيه واجد زحمة وايد.

اتصلت على هريدي وقتله إن الباص مشي، حاول تاخذ تاكسي وتروح بقي. طبعاً أنا عرفت بهرام عمل كداليه، عشان أنا مكلمتوش عن هريدي ولا اتفقت معاه على ثمن المواصلات بتاعته وخصوصاً إنه جاي في آخر الشهر وبهرام ملوش دعوة أول الشهر ولا آخر الشهر، واحد هيركب معايا لازم يدفع.

هريدي أول مرة هيركب تاكسي في دبي، ومش أي وقت، دا وقت الذروة، يعني صعب إنه يلاقي تاكسي، هريدي فضل ساعة مش عارف يوقف تاكسي، وأول ما وقف تاكسي طلع يجري عليه، قاله الشارقة، السواق قاله نووووووووو... شارقة إذ أبج برويلم،

- No Shar ☺a is a big problem

وراح التاكسي ماشي، بعد ربع ساعة وقف تاكسي تاني، الشارقة؟

قاله نووووووووو... شارقة إذ أبج برويلم،

تاكسي، اتنين، ثلاثة، أربعة، ونفس الرد، قاله نووووووووو... شارقة



## هذا ما رأيت في دبي

اذ أبج بروبلم، هريدي بدأ يشغل مخه، وقال لنفسه الناس دي مش عاوزة تروح الشارقة، لكن لو أنا عرضت عليه بونص، فلوس من تحت لتحت، رشوة من الآخر، يمكن يوافق.

وقف تاكسي، الشارقة، نووووووووو... شارقة إذ أبج بروبلم

- No Shar ☺a is a big problem
- Haridy: I will give you bonus

هديك بونص، سواق التاكسي قاله كام؟ How much?

هريدي شاور بإيده كأنه بيعمل خمسة وخمسة وقاله خممممسة درهم Fiiiiivvvee Dirhams، طبعًا هريدي لسة في الأول وموضوع الـ5 دراهم. 7.5 جنيه شغالة في دماغه، سواق التاكسي راح بصصله باستحقاق وقفل شباك التاكسي وراح ماشي ☺.

أنا لو مكان سواق التاكسي مش هسيبه وأمشي لو عرض عليا كدا، أنا هقوله لف واركب من الناحية الثانية، وأول ما ييجي قدام التاكسي، هدوسه، 5 دراهم يا مفتري.

تاكسي واتنين وتلاتة وهريدي مفكرش يزود الـ5 دراهم بدرهم واحد، لحد ما الساعة عدت 8 ونص، يعني فضل في الشارع يدور على تاكسي حوالي ساعتين ونص.

لقي تاكسي ومن غير بونص، ما خلاص الوقت بقي متأخر والعملية فكت شوية ووصلت البيت على 9 بالليل كدا لكن كان في عداد الأموات من التعب، يا دوبك في السريع جهاز سرير لسامح، ورن عليا، إتصلت بيه وكنت

## يوميات مغترب


لسه في الشركة وقال أنا هنام، مش قادر أتحرك، إبقى هات عشاء معاك وأنت جاي.

فاكرين، لما هريدي إضايق من تأخر بهرام وقال مواعيده مش مضبوطة، إتاخر 10 دقائق أوزبع ساعة وإحنا في الحر، تاني يوم بهرام إتاخر وهريدي شايفه من بعيد جاي، قال براحتك يا بهرام، براحتك يا أسد، احنا نيجي بدري وأنت تدلع علينا براحتك، من حق الكبير يدلع، من حق بهرام يدلع 😊.

أنا مت من الضحك وقلتله، دا من تأثير يوم واحد بس مع التاكسي، أنا فضلت كدا شهر ونص كاملين، عشان محمد ربنا. قاللي مهما كنت تحكي مش زي ما تعيش الموقف. فعلاً اللي يشوف غير اللي يسمع. الكلمة دي لسة هسمعها تاني من واحد صاحبي تاني، رأفت، بس دا لسه قدام شوية، لما أخلص على هريدي الأول 😊.







## انتظار في المطار

على الساعة 10 ونص، انطلقت أنا والمدير إلى مطار الشارقة الدولي، لنتظر المبرمج الجديد المدعو سامح، حيث إن الوقت المفترض لوصول طائرته هو الحادية عشرة.

مكناش عارفين شكله، هي صورة الجواز ومتعرفش منها الشخصية كويس، طبعنا ورقة مكتوب عليها اسمه عشان نقف بيها قدام بوابة الخروج، ولما يشوف اسمه هيعرفنا.

لما وصلنا المطار سألنا على الطائرة، قالولنا الطائرة لسه موصلتش، واحتمال تتأخر شوية.

المدير كان كريماً، عزماني على العشاء في ماكدونالدز، لما الأكل إتخط على التراييزة، إفتكرت هريدي الغلبان، اللي إترمط لحد ما لقي تاكسي، اللي قاللي أنا تعبنا وإبقي هات عشاء معاك، مكنش ليا نفس للأكل، مقدرش أكل من غير صاحبي، لازم يكون عندي أحاسيس، بس صراحة، الساندوتش كان مغري، والبطاطس كانت سخنة، قلت هو أكيد في سابع نومة دلوقتي، ولم





قلت للمدير ركز على اللي لابس بدلة، قاللي في الصيف دا، لا مظنش هيبجي ببدة، قتلته طيب هنشوف، أنا خبرة في المواقف دي، منا كنت جاي في عز الحر وكنت لابس بدلة، يمكن الوحيد في المطار اللي لابس بدلة، والناس من الحر مش لابسة حاجة 😊.

المدير شاف واحد وسيم كدا وشكل العلم بيبخ منه ومسكين، قال هو دا، أنا حاسس، رفع الورقة في وش الواد، إنه يشوف إسمه، مفيش، قاللي نادي يمكن يكون نظره ضعيف 😊، قلت يا ساااااامح، ولا حد معبرنا خااالص.

بعد عدة محاولات وعدة أشخاص نعتقد أنهم سااامح، لقيت واحد لابس بدلة وبيتلفت كثير، خدت الورقة من المدير، ورفعتها ناحيته، لقيته بيقرا الاسم، قتلته سامح، قال أيوه، قلت تعال يا راجل، إنت فين، بالأحضان، وقلت للمدير، مش قلتلك هيبقي لابس بدلة، المدير ضحك، وخذنا سامح وانطلقنا إلى الشقة.

لما وصلنا الشقة، كانت الساعة حوالي واحدة ونص بالليل، المدير قالنا ناموا براحتكوا ولما تصبحوا بكره تعالوا.

الموقف دا عدى عليا قبل كدا، فاكرين لما المدير قاللي روح نام ولما تصحى براحتك ابقى تعالى، والساعة 10 ونص لقيت السكرتيرة بتتصل بيا ولما وصلت الشغل قاللي إنت جالك نوم إزاي والبرنامج فيه مشكلة. مواقف لا تنسى !!!

ظبطت منبهي على ميعادي الساعة 6:20 الصبح، نمت حوالي 4 ساعات،

## يوميات مُغترب

وصحيت الصبح أنا وهريدي ورحت أنا دي على سامح... ولا هوهنا، سامح...  
سامح، اخخخخخخخخخ... سامح... سامح، خووخوخوخوخوخوخو،  
سامح... سامح، خاو خاو خاو خاو، سامح... سامح، تراخ تراخ تراخ  
تراخ. قلت لهريدي دا ميت، عمره ما هيقدر ييجي معانا، كتبته العنوان على  
ورقة، وخذت موبيل هريدي وحطيته جنبه وكتبته رقمي وقلتله لما تصحى  
البس وتعال على العنوان ده، لو معرفتش، رن عليا.

وصلنا المكتب، لقيت دينا بتتصل بيا على 9:30 الصبح.

- دينا: الو.
- طارق: ألو سلام عليكم.
- دينا: كيفك طارق؟
- طارق: الحمد لله...
- دينا: إنت وين؟
- طارق: بالمكتب.
- دينا: سامح معاكم.
- طارق: لا.
- دينا: مجبتوش معاكم ليه؟؟؟
- طارق: كان تعبنا ومقدرش يصحى.
- المدير راح وأخذ منها التليفون...



## هذا ما رأيت في دبي

- المدير: أبوه يا طارق.. إنت إزاي يا بني تسييه ومتجشوش معاك؟
  - طارق: كان تعب، ومقدرش يصحى!!
  - المدير: قاللي كنت حاول معاه تاني هيجي إزاي دلوقتي؟
  - طارق: أنا سبتله تليفون هريدي والعنوان كمان وقلتله لو معرفتش تيجي اتصل بيا.
  - المدير: كنت جيبه ويمشي العصر لو تعب، كنا عايزينه يحضر معانا الاجتماع، طيب يلا سلام.
  - طارق: قلت سلام يا بن ال.....
- بقى إمبراح تقولنا ناموا وتعالوا براحتكوا، ودلوقتي تقوللي مصحتوش ليه، الحمد لله إني جيت، كان زمني متشروح دلوقتي 😊. وإنت مش بروفيشونال، أنا روح بعدك وجيت بدري، عشان أنا همي على الشركة، لكن إنت مش همك. الشركة، والأسطوانات بتاعة أصحاب الشركات اللي الواحد حفظها، ومسجلها عشان لما يفتح شركة إن شاء الله يقوللها لموظفينه.
- كان يوم خميس وكان المفروض هريدي هياخد أول تاسك من المدير، لكن اليوم خلص والمدير مقعدش معايا ولا مع هريدي، قضى اليوم مع دينا وسامح، كانوا وخذين مشروع جديد، في حكومة دبي، حاجة زي بوابة إلكترونية كذا، شغل ويب.
- المدير قالنا خلاص هنقعد بكره مع بعض، وهديكوا التاسكات الجديدة بكره دا اللي هو الجمعة.

## يوميات مُغترب

طبعًا انتوا عارفين ليه بنروح ليه، عشان المدير بييجي آخر الأسبوع ومبيقعدش معانا كثير فبنضطر نتقابل الجمعة ساعتين تلاتة، وعلى كلام المدير، إحنا بنشتغل السبت عشان الضغط وعشان العملاء مطالبهم كثير، بس إن شاء الله، إن شاء الله، أول ما الموضوع يتعدل هيبقى الجمعة والسبت أجازة.

وكلام الليل مدهون بزبدة يطلع عليه النهار مش يسبح بس، دا يختفي، ويتبخر، ويقولك: من أنتم؟

لأن الكلام دا بيتقال من أول ما جيت، وآرون لسه شغال، ولما آرون مشي، الضغط زاد مش قل، وعمر الضغط ما هيخف، لأن عمر المشاكل ما تنتهي، ولا عمر المطالب هتخلص، يعني مهما تخلص شغل، هتلاقي شغل جديد جايلك، ومهما تخلص تاسكاتك هتلاقي تاسكات جديدة، لكن بردوا لازم تضحك على الموظف عشان تديله شوية حماس والأمان حلوة والأجازات حلوة.

زي الزواج بالضبط، عمر مراتك ما هتبطل تقوللك هات، وكل مرة هتقول المرادي بس، عشان خاطري الحاجة دي بس، حبيبي حبيبي، آخر مرة صدقني، طيب مش عاوزة خلاص وزحلانة منك، وطبعًا لازم تصالح ولازم تدادي، ولا عمرها هتبطل تطلب ولا هتسيبك إلا لما يجيلك الضغط، والسكر، والزايده، ممكن أملاح، لكن فيه أمل وأمان إنها في يوم تقوللك خد مش هات.

خد شيل الواد شوية، إعملك شغلة في البيت بدل مانت قاعد كدا، خد غير أنبوبة البوتجاز، أو خد في إسنانك، عادي يعني.

طبعًا مش كل الزوجات كدا، دي قلة مندسة، ربنا يجعل كلامنا خفيف





عليهم، ملناش بركة إلا هم، بيأكلونا ويشربونا، ويبغسلولنا، ويكولنا  
الهدوم، هنفترى يعني، يا مفتريين، يا وحشيين.  
المهم يعني ولا الجمعة ولا السبت خدناهم أجازة خالص، من ساعة ما  
اشتغلنا.

في يوم قبل ما هريدي ييجي، عرفت إن واحد صاحبي إسمه وليد، من  
أيام المدينة الجامعية في دبي، إتصلت بيه وجيه زارني وبيت معايا الخميس،  
وسبته في الشقة يوم الجمعة ورحت الشغل ورجعته العصر. فاكرين وليد،  
بتاع التلاجة، مقال إبسطها يا باسط ☺.

رحنا يوم الجمعة وهريدي خد أول تاسك ليه والمفروض إنه هيشغل  
فيها لحد ما عمر يرجع يوم الأربعاء. وهيتواصل مع المدير زي ما كلنا  
بتتواصل معه عن طريق الإيميلات أو عن طريق مسنجر جوجل Gtalk. دا  
غير إن كل واحد بيعت تقرير يومي للمدير بالشغل اللي خلصه، عشان يبقى  
متابع معاه، طبعًا هو في أوقات كتيرة مبيصش على أي تقرير، بس لو كل يوم  
الصبح ملقاش الإيميلات، بيعمل هيصة، وإحنا مش ناقصين.

تاسك هريدي خدها بصورة عامة من المدير، لكن تفاصيلها إنا اللي  
هشرحها، يعني هقولله يعمل كذا وكذا وفي إنهي مكان في البرنامج وبعد ما  
يخلص، أنا اللي هعمل تيست أو اختبر الشغل بتاعه قبل ما المدير يشوفه. يعني  
لو المدير مسك في شغله غلطة، مش هو بس اللي هيتعاقب، أنا كمان، لأنني أنا  
اللي اختبرت الشغل ومكتشفتش الغلطة، دا إيه الحلاوة دي. طبعًا أي حاجة  
تقف قدام هريدي، طارق.. طارق..، طبعًا مش هقدر أقوله مشغول، ولا

## يوميات مُغترب

مش دلوقتي، دا صاحبي مهما يكون، دا غير اللي كان بيحصل معايا... كنت أجبي أقول لأرون أي حاجة، مرة يقوللي ومرة يقوللي بعدين أنا مش فاضي بعد شوية، فكنت أستنى لما يخلص شغله عشان يقوللي على اللي أنا عاوزة.

ومن السهولة اللي هريدي لقيها، سواء في التاسك أو الشرح والمساعدة، بدأ يستصغر حجم الشغل وحجم البرنامج، وحجم الشركة، دي شركة صغيرة، ودا البرنامج ميجيش حاجة جنب شغلي في مصر، دا البرنامج بتاع الشركة في مصر كبير والواحد كان مسئول عن حاجات كتير.

قلتله ياعم الحج أحمد، ربنا، إنت لسه في الأول وإنت مش في مصر، وبكرة الشركة هتكبر وهتبقى مسكلك فرع ولا حاجة، مفيش أحلى. الأحلام، إحلم يا هريدي، إحلم 😊.

وبعدين إنت مالك البرنامج كبير ولا صغير، إنت أهم حاجة هتاخذ شغل، خلصه وإنت ساكت وانت مش سايب مصر وجاي عشان برنامج كبير ولا صغير، إنت جاي عشان توفرلك قرشين وتاخذ خبرة من البلد ممكن تنفعك في المستقبل وممكن تتعرف على ناس أو تلاقي شغل أفضل والحياة تمشي معاك.

هريدي وسامح مكنش ليهم إيميلات على موقع الشركة، فكانوا بيعتوا التقرير اليومي عن شغلهم من الإيميل الخاص بيهم، المدير بعد ما سافر بيومين عمل لكل واحد إيميل وبعثهم لدينا عشان تدبهم للشباب، دينا وسامح كانوا في اجتماع عشان الموقع اللي بيعملوه، فقالت لسامح، أنا هديك إيميل وإيميل هريدي، أول ما ترجع الشركة، إديله الإيميل والباسورد.



سامح نسي يدي الإيميل لهريدي، فلهريدي آخر اليوم بعث التقرير بتاعه من الإيميل الشخصي، يومين ورا بعض ومن الإيميل الشخصي، فالمدير قاله إنت بعثلي من إيميل شخصي ليه؟ مبتستعملش إيميل الشركة ليه. قال أنا مليش إيميل على موقع الشركة !!

المدير راح مكلم دينا على الشات، إنت إديتي هريدي الإيميل بتاعه. قالت أيوه من يومها.

المدير راجع لهريدي وقاله دينا بتقول إنها إدتك الإيميل، فلهريدي رد قال:

- She is. Lair
- anything she didn't give me

• كذابة مدتنيش أي حاجة

فما كان من المدير إلا إنه أخذ الكلام نسخ ولصق وعلى الشات مع دينا وقال:

- what is your answer on that ?

إيه ردك على الكلام دا.

موقف بدأ بسيط، بس مع واحد كوبي وإثنين بيست بقى كبير قوي.

لهريدي رد بكل جرأة وقال إنها كذابة، طب دينا هيكون رد فعلها إيه على الكلام دا وخصوصًا إنها قالت للمدير، أنا اديتهوله من يومها؟

هل هتقول الحقيقة، إنها إديت الإيميلين لسامح ومتعرفش إيه اللي حصل

## يوميات مُغترب

بعدها. بس دا هيعتبر خطأ ثاني منها لأنها المفروض متديش الباسورد بتاع إيميل هريدي لسامح !!


هل هتحاول تنتقم من هريدي عشان قال عليها كذابة، وهتألف أي حاجة تطلع هريدي غلطان وتبرأ نفسها؟

هل الموقف هينتهي على كدا ولا هيبقى له تبعيات. وتأثير على شغل هريدي؟

وإيه موقعي أنا من الدور دا، بصفتي شاهد مشفش حاجة؟

انتظرونا في المقال القادم ☺.





## هريدي والمدير .. الجزء الأول

لما هريدي قال على دينا إنها كدابة والمدير خد كلام هريدي نسخ ولصق على الشات مع دينا،

هي متذكرتش إنها إدتهم لسامح، فكانت عايضة تدافع عن الموقف ومطلعش نفسها غلطانة، فلازم مين اللي يطلع غلطان. أكيد هريدي!! قالت: إن هريدي دايا سرحان وإنها أكثر من مرة تنادي عليه وميردش، ولا يسمعها، وقالت إنها أصلاً بتحس إنه نايم مش بيشتغل.

- he is. sleepy guy
- and always out of mind ,
- many times. talk to him ,he doesn't hear or get me

دينا بتخاف من المدير جدًّا، وبتخاف تطلع غلطانة في أي حاجة، بتحب تظهر دايمًا في دور اللي مبيغلطش لأن المدير عندنا لما يلوم حد أو يوبخه «زي ما هنشوف بعد كذا كثير 😊» بيحسسه إنه ولا حاجة. غير إنها حست بالإهانة من كلمة هريدي فحبت تظبطه، وطبعًا المدير هيصدق مين. أكيد يعني مش هيصدق هريدي لو فضل يحلف للصبح.



## يوميات مُغترب

المدير قال اتصرفوا مع بعض ومحدث يبعثلي أي إيميل ثاني إلا من إيميلات الشركة.

بدأت دينا تكلم هريدي وسامح، تستفسر، فسامح رد وقال: أنا نسيت أدي الإيميل لهريدي، دينا قالت إمم، طيب إديهوله دلوقتي والموقف خلص على كدا، لكن نظرات هريدي لدينا ونظرات دينا لهريدي كانت تحمل الكثير، كنت أري بعيوني البريئة مخالب الأسد في عيون هريدي تريد أن تنقض على دينا فتفتك بها، وأري سم الثعبان يتطاير من عيون دينا يريد أن يقضي على هذا الكائن الهاريدي.

طبعًا هريدي كدا خد كارت أحمر من دينا، أي غلطة، أي كلمة، أي نفس هيتنفسه أكيد هيوصل للمدير، والصراحة مكش هريدي بس، كان أي حد فينا إحنا الثلاثة، أنا وهريدي وسامح يعمل أي حاجة كانت توصل للمدير، وأوقات كانت بتحط شوية بهرات من عندها مع إدراج حسنة النية 😊 فقررنا نحن الثلاثة «طارق وهريدي وسامح». إطلاق لقب الثعبان Snake على دينا، حيث إنها تستحقه بجدارة. وزى ما قتلوكوا قبل كدا، أنا كنت بستغل طبيعة دينا الثعبانية لما يكون عاوز أوصل حاجة للمدير، سلوك أو انطباع، ضيق أو ضجر، كنت بكلم معاها كأي بدردش وأقوللها على فكرة دينا أنا محبش كذا، على فكرة الحاجة دي بضايقني، على فكرة أسلوب المدير معايا في الحتة دي مكش كويس، ومبتعديش ساعة بالكثير إلا والمدير يكون عارف، ويتناقش معايا بطريقة أو بأخرى في الحاجة دي، قال يعني حس بيا مش هي اللي قالتله. الموضوع مكش خوف إني أقول للمدير بنفسي، بس الحقيقة إن أي مدير مبيحبش الموظف يتكلم معاها بصراحة زائدة، أو يغلظه في حاجة،





المدير مبحش يظهر إنه غلطان. لكن في بعض الأوقات لما كان بيحصل مشكلة كبيرة بيني وبين المدير، مكتش بستني، كل واحد بيطلع الي عنده بقي وإلي يحصل يحصل وهنشوف الموضوع دا قدام شوية.

في يوم عميل اتصل وهريدي رد عليه، بس معرفش يكلمه كويس لأن الإنجليزي بتاع هريدي كان لسه بعافيه شوية والكلمات كلها مكسرة، لسه جاي من مصر ودا طبعي، فقاللي تعالى شوف العميل دا عاوز إيه، طبعًا مين كان معدي جنب الغرفة بتاعتنا، حذر فذر، أكيد عرفتوها، شوطاااااااا، إنها دينا، متكلمتش خالص، تلاقيها كانت فرحانة عشان الموقف دا حصل قدامها، وأكيد قبل ما تتحرك، شغلت الثعابين بتوعها وبعثت الإشارة للمدير، هريدي ميعرفش يرد على العملاء.

يومها أنا قلت لهريدي، مكش المفروض ترد على التليفون، أهو زمان المدير عرف إنك مبتعرفش تكلم العملاء، دايمًا مدبسنًا في مشكلة وبس، ربنا يستر، المدير جاي يشوف شغلك آخر الأسبوع، حاول بقى تظبط نفسك، عشان تقضي على مفعول الإبر الصينية بتاعة دينا. وأنا رويحت لدينا أدرش معاها شوية، وإتكلمت عن هريدي وحاولت أوضح ليها إنه من النوع الي بيركز في شغله ومبيحسش بالناس الي حواليه وهو بيشتغل وجبت موضوع التليفون وكأنها ماخدتش بالها يعني وقلت إنه لسه جديد وأي حد بيعجي جديد بيبقي الإنجليزي بتاعه ضعيف، لكن هو عاوز يتعلم ويعرف يتعامل معاهم كويس. نيجي بقي لشغل هريدي نفسه، هريدي أول ما بدأ يشتغل تعرض لأكواد مين. مستر آرووووون وكلايت تاني مرة بدأ هريدي يتذمر ويدعي على آرون،

## يوميات مُغترب

زي مانا كنت بعمل أول ما اشتغلت وراه، لكن هريدي ميتوصاش في الكلام، يشتغل شويه وألاقيه يقطع تركيز الواحد ويقول «والله ياعم آرون دا متخلف».

أنا أقولله: هريدي إشتغل وإنت ساكت، خلىنا نركز، يقول طيب

شوية وألاقيه قاطع تركيزنا تاني. الله يلعن اللي علمك برمجة يا آرون.

يا هريدي إرحمنا، يقوللي، يا طارق متخلف، والله متخلف، مش عارف هو بيكتب أكواد إزاي، هو آرون دا كان مبرمج ولا المدير جايبه من أي حته كدا ومعلمه شوية برمجة.

طبعا وضع هريدي كان مختلف عني، لما كان يعمل الحركتين دول، كنت بروح أقعد معاه وأفهمه الأكواد ماشيه إزاي، لكن أنا لو كنت فضلت أدعي على آرون سنة، مكنتش حد هيسمعني، كنت وحيد، بين أربع جدران في غرفة، مكنتش بسمع إلا صدى صوتي وأنا بدعي عليه 😊.

وهريدي كل ما حاجة تقف معاه يدعي على آرون عشان اروحله، وأشوف إيه اللي واقف معاه في الشغل بتاعه وأفهمه عشان ميوظش حاجة تانية وبردوا كان في حاجات هريدي بيعملها تبوظ شغل عندي، لأن كل حاجة مرتبطة ببعضها. ودا كان وارد يحصل من هريدي عشان هولسه جديد في الشغل. فكنت لما بعمل تيسست أو تجريب للشغل بتاعه، أي حاجة أحس إنها هتبوظ شغل في حته تانية كنت بروح أصلحها بنفسي.

المهم جه المدير ووصلنا اللاب توب بتاع هريدي بشاشة العرض، يلا يا عم هريدي شغل لنا أي حاجة فرفشة كدا، قصدي اتفضل ورينا شغلك 😊.



## هذا ما رأيت في دبي

بدأ هريدي يثني على نفسه وعلى مجهوده العظيم في العمل على أكواد  
آرون وطبعًا أنا والمدير خلاص هنفرقع، هريدي إبدأ يلا بأول شاشة وإنجز  
عشان المدير مش فاضي.

بدأ هريدي يشرح ويكلم، وبدأ المدير يسأله ويقولله طب جرب كذا،  
طب لو عملنا كذا هيحصل إيه. وهريدي يجاوب مرة، ويغلط مرة، ووشه  
يحمّر مرة. المدير راح ماسكه بقى، قاله إنت كدا مش فاهم اللوجيك كله  
كويس (أساسيات البرنامج) وأكيد فيه حاجات هتغلط فيها، حاول تركز  
زيادة ومتسرحش وإنت شغال ولو حاجة وقفت معاك إسئل طارق أو  
إسئلني.

أوباللا، حاول متسرحش، دي كلمة دينا، الكلام علق مع المدير، إنت  
اللي جيبته لنفسك يا هريدي، شاطر عمال تثني على نفسك، طب لما تتأكد إن  
كل حاجة سليمة الأول إبقى قول اللي إنت عاوزه.

الحمد لله الموقف عدّى على خير وشغل هريدي كان كويس مش وحش،  
لكن المدير حب يزقه ويغلطه عشان ميحسش إنه جامد يعني ومش كل  
شويه يكلم عن نفسه كثير.

بعد عرض شغل هريدي قعدنا مع المدير عشان يدينا الشغل الجديد بتاع  
الأسبوع الجاي، ونتفق على مواعيد رمضان، طبعا مواعيد رمضان غير الأيام  
العادية، يعني المفروض الشغل من 9 صباحًا إلى 3 عصرًا، يا سلام إيه الدلع  
دا، بعد ما كنا بنروح مرة الساعة 6 ومرة الساعة 12، هنروح الساعة 3، دلع  
عيني دلع، مرحتى مرحتى.

## يوميات مُفترب

لكن المدير كان له وجهة نظر ثانية، قللنا إنتوا مش هتعرفوا تروحوا من الزحمة، الساعة 3 دي البلد كلها هتبقى في الشارع، كله مروح، يعني ممكن توصولوا الساعة 9 بالليل، فالأفضل انكم تقعدوا في المكتب لبعد المغرب تفطروا وتصلوا وتروحوا، ودا أحسن ليكوا عشان متعبوش في المواصلات، لأن الواحد مبيستحملش المواصلات وهو صايم، وأنا هشارك معاكوا في الأكل وناخد ثواب إفطار صائم منكوا.

طبعا فكرة حلوة وجميلة، طيوب خالص المدير بتاعنا دا، بيشيل همنا وكمان هيساعد في إفطارنا ويأخذ أجر إفطار الصائم، واغرو رقت عيناى من طيبته، وظللت أكرر في سري، بارك الله فيك، وأكثر من أمثالك، وجعلك للضعفاء نصيرا، وللغلبة اللي زينا مفطرا، وهوا اللي مفطرننا هوا، هوا اللي مدلعنا هوا، هوا اللي مظبتنا هوا، هوا اللي عاوز يطلع روحنا هوا.

مردناش على المدير وقتها، قلنا لازم نرجع لرجل المستحيل بتاعنا، بهرام، سواق الباص، ومع بهرام مفيش مستحيل. وإحنا مروحين، كلمت بهرام وسألته على مواعيد الباص في رمضان، قاللي إنه هيتحرك من دي الساعة 4 والطريق بياخد ساعتين تقريبا عشان الزحمة يعني هتوصل الساعة 6، هيبقى لسه نص ساعة على المغرب، قتلته متأخر قوي يا بهرام، قاللي ما في مشكلة صديق، فيه واحد باص تاني تبع الشركة مال أنا هيتحرك الساعة 3، بعطيك رقم وتروحوا معاه، قتلته حبيبي يا بهرام، أي لاف يو، أي لاف يو، ضحك وقاللي مشكور مشكور، قلنا خلاص الصبح بنروح معك، ونرجع مع الباص التاني بعد الشغل، قال ما في مشكلة.



للتوضيح بهرام كان شغال في شركة نقل خاص، مكنش هو صاحب الأتوبيس، يعني لو روحنا معاه أو روحنا مع الثاني، مش هتفرق بالنسبالة حاجة، لكن هتفرق بالنسبالنا، يعني في الساعة دي ممكن نجهز فيها الإفطار، ممكن حد ينام ساعة يرتاح.

اتفقت مع سامح وهريدي إننا هنقول للمدير إن الأتوبيس هيتحرك الساعة 3 وهيوصل على الساعة 5 ومش هنجيب سيرة الأتوبيس بتاع الساعة 4 وإلا هيقوللنا اقعدوا للساعة 4 ودا مش كويس.

قلنا للمدير، قال أوك مفيش مشكلة بس طبعًا كان بيقوللها من غير نفس خالص.

وبدأ الشهر الفضيل، معظم الأيام كنت بروح أنا وهريدي في الباص الساعة 3 وسامح ودينا كانوا بيتأخروا عشان المشروع اللي شغالين فيه كبير وفيه موعد تسليم قريب، ودينا كانت بتوصله بالعربية بتاعتها لأنها ساكنة في الشارقة. كان أوقات بيوصل في أذان المغرب وأوقات المغرب بيأذن عليهم في الطريق وأوقات كان بيروح معانا. وقبل ما يخلص أول أسبوع من رمضان، المدير اتصل بيا من عمان في يوم الساعة 5 ونص كدا، كنا لسه واصلين الشقة أنا وهريدي وسامح.

• المدير: الو إزيك يا طارق عامل إيه. وصلتوا الشقة ولا لسه؟

• أنا: آه الحمد لله، لسه واصلين حالًا.

• المدير: طيب حمد الله على السلامة.

## يوميات مغترب

• أنا: الله يسلم حضرتك.

المدير: بص يا طارق، أنا ملاحظ إن البرفورمانس (الأداء) بتاعكوا قل جدًا وموضوع الساعة 3 دا مش هينفع خالص، أنا مش جيبكوا من مصر وواحد لكوا شقة بالشية الفلاني عشان تيجوا تشتغلوا 3 ساعات وتروحوا، إحنا مزنوقين وإنت عارف دا كويس، فيا إما تفضلوا في المكتب وتمشوا بعد المغرب، يا إما تشتغلوا من الشقة بعد الإفطار وكل واحد معاه اللاب توب بتاعه، فكروا في الموضوع ورد عليا إنهارده، أنا مستني منك إيميل يلا سلام.

قلت في سري أيوه كدا إظهر على حقيقتك، إظهر وبان عليك اللعنة مش الأمان. اللي مزنوق يا خويا يروح الحمام، ولو إنت مزنوق على طول، هاتلي حمام متنقل، بس متقرفناش كل شويه، دي أيام مفترجة، يعني ممكن أحلق شعري زيرو واقعد أدعي عليك طول الليل.

قررت عمل اجتماع طارئ مع هريدي وسامح، عشان ناخذ قرار شجاع، نوقف به جبروت المدير، ونعطيه درسًا لا ينساه في التعامل مع الشباب المصري المكافح اللي زينا، واتخذنا القرارات التالية:

- 1 - الموافقة على العمل بعد الإفطار وأمرنا الله ﷻ.
- 2 - توحيد الدعاء على المدير وقت الأذان، عسى أن يستجيب الله لنا ويريحنا منه.
- 3 - أن يقوم المدعو طارق بتجهيز الإفطار ثلاثة أيام في الأسبوع في حين أن يكون المدعو هريدي «مأنتخ ونايم».






4 - أن يقوم المدعو هريدي بتجهيز الإفطار ثلاثة أيام في الأسبوع في حين أن يكون المدعو طارق «مأنتخ ونايم».

5 - أن يقوم المدعو: سامح بغسيل الأطباق يوميًا قبل وبعد الإفطار لعدم وجود خبرة مسبقة في تجهيز الإفطار.

6 - يظل المجلس في حالة انعقاد دائم لمتابعة كل ما هو جديد، والله الموفق.  
وبدأنا نشتغل بالليل، وإلي بطنه ملانه ومش قادر يشتغل، وإلي يدخل الحمام وميطلعش منه، وإلي ياخذ اللاب ويقعد على السرير شويه، وياخذ اللاب في حضنه وينام شويه، وضع كان صعب الصراحة.

لكن هل الوضع هيستمر على كذا، نشتغل بالنهار ونروح نجهز الإفطار ونقعد نشتغل بالليل زي البطريق؟ وهل المدير هيعتبر موافقتنا على الشغل بالليل دي ضعف وهيحاول يستغلها أكثر؟ يا ترى مين هيعمل مشكلة مع المدير؟ يا ترى مين هينزل مصر قبل نص رمضان.

انتظرونا في المقال القادم ☺.



## أسبوع من العذاب

بعد اجتماع مجلس إدارة الشقة، وصدور البيان رقم (1) الموجه إلى المدير، بدأنا في التنفيذ العملي، بقينا نروح الشغل الصبح، نرجع قبل المغرب، نفطر ونروح نصلي العشاء والتراويح وبعدين نروح نشتغل، فيه مننا اللي كان بيصلي التراويح كاملة وفيه اللي بيصلي 4 ركعات ويتسحب زي الحرامي. وبعد كذا كل واحد يلزم جهازه ويشغل لحد الساعة 11 أو 12 وتاني يوم الصبح يبعث التقرير اليومي بشغل النهار وشغل الليل.

المدير كان حاسس إنه ممكن يستغلنا أكثر من كدا، أصل موضوع الشغل بالليل دا مش مضمون. أكيد الشباب بيقعدوا يهزروا أو يلعبوا أو يخططوا لحاجات، ودا مش في صالحه، فاستنادًا للبيان رقم واحد وهو الموافقة على العمل ليلاً، أي بعد الإفطار، وحيث إن البيان لم يحدد المكان الذي سيتم العمل فيه سواء في الشقة أو في مكان آخر، قرر المدير.... تخليه عن منصب «المروءة والشهامة» وتكليف أعضاء مجلس إدارة الشقة. طارق وهريدي. بالعمل ليلاً عند العملاء. ومحدث يفهم غلط.



بصوا يا شباب، إحنا هنحاول نستغل فترة رمضان وإن العملاء المهمين بتوعنا الشغل عندهم خفيف بالليل، ونروح ننزل آخر نسخة من البرنامج عندهم، ممكن يحصل لخطبة شوية عشان الشغل اللي آرون نزلوا عند العملاء دول ومعندناش نسخة، فانتوا هتشوفوا الفرق وتعملوه عند العميل وبعدين تنزلوا النسخة، تمام كدا. كان هذا الحديث على لسان المدير في أول اجتماع بعد البيان الأول.

نظرت إلى هريدي نظرة حزن واغرو رقت عيناى بالدموع ثم هممت بإجابة على المدير: أوكي إن شاء الله.

• المدير: هتروحووا عند كل عميل وتعملوا تقرير عن حالة النسخة اللي عنده، وإيه الاختلافات بينها وبين النسخة الأخيرة بتاعتنا وحتحتاج وقت قد إيه عشان تعمل وتبعثوها لي وأول ما تخلصوا التعديلات دي، هتنزلوا نسخة تجريبية عند العميل، يجربوها لمدة يوم، بعد كدا تأخدوا موافقة كتابية من العميل قبل ما تنزلوا النسخة على كل الأجهزة، لازم الموافقة قبل ما تنزلوا النسخة، عشان لو حصل مشكلة منرو حش في داهية.

• طارق: إن شاء الله.

هريدي في سره، شوفتها في عنيه: روح يا شيخ، داهية تاخذك إنت ودينا في يوم واحد.

أنا من عنيا لهريدي: يارب يا هريدي يارب، بس حرام دينا، دي طيو ووبة خالص 😊.

كان عندنا عملاء في دبي والشارقة وعجمان لكن العملاء المهمين اللي



## يوميات مُفترب

المفروض نعمل عندهم الشغل دا كانوا حوالي 4 عملاء، عميل في دبي، و3 عملاء في عجمان.

عميل دبي كانت شركة كبيرة، والبرنامج عندها بقاله ثلاث سنين فكمية البيانات اللي في البرنامج كبيرة جدًا، كذلك فيه عميل في عجمان نفس النظام، والباقي عميل من سنة أو سنتين.

بدأنا بعميل دبي، روحنا أول يوم من الصبح، عشان مش هيتفع نروح الشقة في الشارقة قبل الإفطار ونرجع ثاني دبي بعد الإفطار.

المستول عن الكمبيوتر هناك، اسمه «راشد»، باكستاني، استقبلنا وظبط مكان ليا أنا وهريدي، وقاللي تعالى أعرفك على مدير الحاسبات مصري زيك، قلت بجد. طب الحمد لله، مصريين زي بعض وهنفهم بعض أيوه كدا، دنا مصري وأبويا مصري، قهووة المصريين، قهووة المصريين، الله يرحمك يا عوكل، كنت محظوظ بشروق وأنا محظوظ بدينااا 😊.

- Rashid: Mr.Ahmed, this is Mr.Tarek ,Software engineer coming to install new version.

• أحمد: أهلا وسهلاً، أنت اللي مكان آروون، بص بصراحة، أنا مش عاوز أي تعديلات، آرون كان بيعجي ينزل نسخة عشان يصلح مشكلة، يسيب لنا 30 مشكلة، وكله بيعجي فوق راسي أنا، النسخة اللي عندي زي الفل، عارف مشاكلها فين وعارف بحلها إزاي، أنا مش ناقص والله.

الله الله، هي من أولها كدا، والمدير عملي البحر طحينة، وهتنزل نسخة تجريبية، ويوافقوا عليها ولازم يمضوا قبل ما تنزل النسخة، وهما مش طايقين حد أصلاً، روح يا شيخ منك لله.





• طارق: يا أستاذ أحمد، شغل المصريين غير شغل الهنود وانت عارف كدا، وبعدين لو ظهر أي مشكلة، إديني رنة هتلاقيني عندك، وأنا هنزلك نسخة على جهازك تجربها الأول، متخفش والله، إحنا جيين نظبط مش نبوظ.

• أحمد: يا سيدي أهلاً وسهلاً ومعلش إن كنت إتكلمت معاك كدا وإحنا أول مرة نتقابل، بس بصراحة آرون كان مورينا الويل، أنا لو مسكته والله لأعلقه على باب الشركة لما يبانله صاحب، دا كان بيعجي يستخبي مني.

• طارق: ربنا يستر، أنا الحمد لله طويل ومش هتعرف تعلقني ☺.

• أحمد كان طويل قوي، أطول مني، وآرون كان من القريين من الأرض، حاجة صغيرة كدا.

خلصت مع أحمد كلام على أمل إن النسخة الجديدة تعجبه ورحنا على المكان اللي راشد ظبطهولنا، وخذنا نسخة من البرنامج اللي عندهم وبدأنا نقارن بين النسختين.

المفروض إن لكل عميل بعض الإضافات والتقارير الخاصة بيه وإلي بتختلف من عميل لآخر والحاجات دي كانت مع آرون، فلما ساب الشركة ومشي خد الحاجات دي معاه ومكنش معانا نسخة منها. فشغلتنا الأساسية إننا نظبط الإضافات دي تاني عشان العميل ميحسش إن فيه حاجة ناقصة.

بدأنا نكتب الملاحظات وظبطنا التقرير للمدير وقلنا إن التعديلات هتاخذها يوم ونص عشان تخلص، رد علينا في الإيميل وقال متمشوش إنهارد إالا لما تخلصوها عشان إحنا مضغوطين ومفيش وقت وإبقى تعالوا بكرة نزلوا النسخة التجريبية على طول.



## يوميات مُغترب

طب أدعي عليك بإيه وإحنا في شهر مفترج، يعني كدا مش هتروح إلا في آخر الليل.

المهم فضلنا نظبط في البيانات ومشاكلها وطبعًا كل الموظفين مشيوا الساعة 3 ما عدا بتاع الكمبيوتر، راشد وواحد زميله، فضلوا معانا، قاعدين على النت وإحنا عمالين بنت. والمغرب أذن وطبعًا مش معنا فطار، فجبولنا كل واحد بتاعة زيادي لحد ما نروح، لأن مفيش مطعم قريب ولو طلب دلوقتي ولا حد هيعبرك، مين هيجبلك دليفري المغرب في رمضان.

هريدي: على آخر الزمن أفطر زيادي؟

طارق: معلش يا هريدي، إحمد ربنا، لو عاوز بتاعتي كمان خودها وخليني أخلص شغل عشان نروح.

صلينا في الشركة المغرب والعشاء وكأنا مش في رمضان وفضلنا شغالين لحد 11 ونص بالليل، الصراحة شكلنا كان يصعب على أي حد، مساكين كدا، نزلنا من الشركة ولقينا تاكسي على طول، الوقت كدا متأخر وممكن تلاقي تاكسي بسهولة والطريق بيبقى فاضي وصلنا البيت في ثلث ساعة وكنا مقتولين، وأول ما دخلنا الشقة، بصينا على غرفة سامح لقيناه نايم، قلنا يا بختك يا سامح، بصينا للمطبخ وبعدين بصينا لغرفتنا، إيه دا، سرير يا هريدي، آه سرير يا طارق، طب إجري إلحقه قبل ما يهرب، إجري. سرير.. سرير.. سرير.. أحمدك يارب.

وكل واحد اترمى على سريريه زي اللي بيغرق كدا وأول ما يوصل الشاطئ يترمي عليه زي المقتول. وفي لحظة كنا في سابع نومة ومن غير إفطار، على





أمل إننا نعوض دا في السحور، ولكن من كتر التعب والإجهاد محسناش إلا والفجر بيأذن. يعني ولا إفطار ولا سحور. وبدل ما نقول دعاء الاستيقاظ، الحمد لله الذي أحيانا بعد إذ أماننا وإليه النشور، قلنا حسبي الله ونعم الوكيل فيك يا عامر. المدير).

روحنا الشغل الصبح في الباص ومن هناك خدنا تاكسي على العميل بتاع دبي، نزلنا نسخة تجريبية من البرنامج على جهاز مدير الحسابات وقلنا هنرجعلك بكرة تكون جربتها عشان ننزلها على كل الأجهزة. مدير الحسابات بصلي باستغراب كدا وقاللي بلهجة استنكار، بكرة مين ياعم الحج، هو سلق بيض، أنا عاوز على الأقل أسبوع، قال بكرة قال.

إيه ياعم المدير اللي من بولاق دا، أنا حاسس إني مش في دبي خالص وممكن بعد شوية ألاقه بيضر بني. قتلته أوك، هكلم المدير بتاعي وأتصل بيك إن شاء الله، قاللي أوك ماشي.

ورجعنا على الشركة بتاعتنا بعد الظهر وبعث إيميل للمدير باللي حصل، رد عليا وقاللي خلاص كل يومين اتصل بيه وشوفه وصل لحد فين. وقاللي بعد الفطار ابدءوا في عملاء عجمان.

عملاء.. عملاء.. عملاء..، إيه ولاد الخونة دول مش ورانا غيرهم 😊. المسجد كان قصاد العمارة اللي إحنا ساكنين فيها، يعني لو بصين من شباك الغرفة بتاعتي، بشوف المسجد.

فطرنا وروحنا صلينا العشاء في المسجد وقبل صلاة القيام ما تبدأ، طلعت أنا وهريدي وخدنا تاكسي وروحنا على أول عميل في عجمان، ومن حظنا

## يوميات مُغترب

كان فيه مسجد جنب الشركة، روحنا جري عشان نلحق اللي باقي من صلاة القيام.

بعد ما القيام خلص، روحنا على العميل ونفس الخطوات، خدنا نسخة من البرنامج وعلنا مقارنة، وكانت الاختلافات بسيطة خلصناها يومها ونزلنا النسخة التجريبية وطلعنا من عند العميل الساعة 12 ونص بالليل، ونفس النظام وصلنا الشقة مقتولين، وأول ما دخلنا الشقة، بصينا على غرفة سامح لقيناه نايم، قلنا يا بختك يا سامح، بصينا للمطبخ وبعدين بصينا لغرفتنا، إيه دا، سرير يا هريدي، آه سرير يا طارق، طب إجري إلحقه قبل ما يهرب، إجري.. سرير.. سرير.. أحمدك يارب.

وبردوا مقدرناش نصحي نتسحر، فضلنا 3 أيام ورا بعض منتسحرش لما خلاص كنا هنموت بجدة، قمة الإرهاق، مفيش إحساس خالص إنك في رمضان. الوضع مع سامح كان قريب مننا، بس كان أفضل شويه، يعني كان بيروح على الساعة 9 أو 10 بالليل من المكتب ولما يروح يكمل شغل لحد الساعة 12 وبعدين ينام.

الحاجات دي كلها كانت في تاني أسبوع من رمضان، هريدي كل يوم يتزمر ويتخفق من الوضع أكثر وأنا كنت مضايق جداً وسامح كان مضايق جداً جداً، فقررنا عمل اجتماع لمجلس إدارة الشقة لتناقش حول الوضع الراهن والمشتعل.

• طارق: إيه يا جماعة، الوضع كدا مش كويس خالص، إحنا قربنا نموت، دي مش شركة، دي سخرة.



• هريدي: أنا بفكر أدخل في المدير شمال ومعنديش مشكلة إني أنزل مصر،  
دا ذل ياعم الحاج.

• سامح: وأنا معنديش مشكلة إني أرجع مصر، إيه المشكلة يعني.


• طارق: مش كدا يا جماعة، إحنا سبنا شغلنا في مصر وسفرنا عشان نعمل  
حاجة، يعني المفروض منخدش قرار زي دا بسهولة كدا، لأن دا هيبقى  
فشل، ويا عالم هنعرف نرجع شغلنا في مصر ولا هنروح شغل تاني  
ولا هنعمل إيه. إحنا نستحمل شوية، مش حلوة لما أهلنا ولا أصحابنا  
ولا حد يقول علينا فشلنا في الغربية ورجعنا.

وفي نهاية الاجتماع اتخذنا القرارات التالية:

أن نصبر ونحتسب، فلم نأت إلى دبي لكي نمرح ونلعب وإنما جئنا لكي  
نكون أو لا نكون.

أن نتحدث مع المدير لتخفيف العمل في الأيام المتبقية من شهر رمضان.  
والله الموفق.

لكن هذه القرارات لم تكن كافية بالنسبة لهريدي، وكان يوجد شيء ما  
بداخله، لم يفصح عنه إلا في الاجتماع مع المدير وأمام الجميع، كان تصرف  
غير مقبول بالمرّة، صدمني وجعل المدير يتخذ قرارًا لم يؤثر فقط على هريدي  
بل أثر علينا جميعًا.



## مائدة الرحمن

شوفنا مع بعض أسبوع من العذاب، وقد إيه كانت أيام صعبة، كنا بنختار بين النوم أو الأكل، الفطار اللي المفروض يكون الساعة 6 ونص، لكن عشان ظروفنا بيكون الساعة 12 بالليل أو واحدة ومعظم الوقت بنفضل النوم ودمج الفطار مع السحور ودا مبيحصلش عشان مبنصحاش للسحور أصلاً من التعب.

بعد كدا الموضوع بدأ ينتظم شويه وبدأنا نفطر في الشقة وبعدين نروح لعمل بعد صلاة العشاء، فكان واحد منا يجهز الفطار، وفقاً للبيان رقم واحد، يا طارق، يا هريدي، وسامح بيغسل.

اليوم اللي كنت بجهز فيه، هريدي بينام أول ما يوصل من الشغل لحد الفطار، والعكس لو هو اللي بيجهز، أنا بنام لحد الفطار.

في يوم هريدي قاللي، هو مفيش موائد رحمن هنا زي مصر، ونريح نفسينا من موضوع تجهيز الفطار دا، قتلته لا ياعم مظنش، إنت في الإمارات، الحاجات دي في مصر بس، قاللي ياعم متسأل يمكن يكون فيه، قتلته معرفش حد هنا عشان أسأله، وعدّي الموقف على كدا.



وفي يوم كنت انا اللي بجهز الفطار، وبعد ما طبخت الرز والفراخ وعملت السلطة، وكان لسه يبجي نص ساعة على المغرب كدا، فتحت جهازى وقلت أقعد على النت شويه، لكن عشان معندناش شبكة، فكنت بقف باللاب توب في الشباك، أسرق أي شبكة ويرلس مفتوحة ☺.

وأنا واقف في الشباك بظروفاها ببص على المسجد لقيت أعداد غفيرة من الناس، خير اللهم اجعله خير، ليكون حد مات، دا لسه نص ساعة على المغرب، والاقى ناس ماشيه ورايحه على المسجد، وناس بتقعد، إيه دا؟  
هرررررريدي، مدد يا هرررريدي، مدد دد يا هرررريدي، إصحي يا هرررريدي.

• هريدي: في وضع نُحْل، حاضن المخدة، إيه يا طارق يا أخي، سيبني أنا، هو المغرب أذن؟

• طارق: إصحي يا سامح، قوم يا هريدي بقولك مدد، مائدة رحمن في المسجد بتاعنا.

• هريدي: زي ما يكون تكهرب، انتفض من على السرير، وبص من الشباك، مش قلتلك يا معلم، بس مش مشكله إنهارده إنت طبخت خلاص، نبقى نروح من بكرة.

• طارق: وأنا بلبس هدومي، بكرة مين، يلا يا عم، الأكل بتاعنا مش هيطير، نبقى نتسحر بيه، يلا البس بسرعة، يلا يا سامح، البس بسرعة.

وفي خمس دقائق كنا تحت العمارة، مسرعين الخطى نحو المسجد، وأول

## يوميات مغترب

ما وصلنا، ملقناش ولا مكان فاضي، وقفنا كدا دقيقة نبص حوالينا، وفجأة ظهر شاب، شعره طويل شاييل أكل ويوزعه على الناس اللي قاعده، وباصلنا كدا وقال، إنتوا جيين متأخرين ليه، قلنا معلش أول مرة، قال طب تعالوا، كان شاب مصري سكرة كدا زي ☺.

خذنا على مكان قاعد فيه مصريين وقال معلش خدوا الشباب جنبكوا وأنا هجيلهم أكل، ووسعولنا مكان، وهو دخل جوا المسجد، وجاب أكل زيادة لينا، وعصير وتمر ولبن اسمه «لبن اب Laban Up» على وزن سفن أب.

طبعا أول مرة أشوف اللبن دا، ملناش في الحاجات دي، فسامح بيستلني على أساس إني أقدم واحد فيهم، إيه «لبن اب. دا، قتلته مش عارف لبن أم، دا لبن أب، واضحة يعني ☺، كان ماسك العلبة في إيده، راحت واقعة من إيده، قتلته هات، إنت مش وش نعمة ☺.

الأكل كان عبارة عن رز برياني، وفراخ، زي اللي في الصورة، رز بسمتي وعلية حاجات كتيرة كدا معرفهاش، بس طعمه جميل. وكان يوم لحمة ويوم فراخ، بيدلعوا الناس، الله يكرمهم.

أذن المغرب، كلنا تمر وشربنا عصير، ولسه هنبدا ناكل، إيه دا فين الملاعق، هناكل إزاي، لقيت الناس شغالة بإيدها، هريدي بصلي وأنا بصيت لسامح وسامح كان عاوز يقوم، مفيش حد فينا بيعرف ياكل بإيده كدا ولا عمرنا جربناها أصلا، قتلتهم بصوا، زي ما الناس بتعمل اعملوا.

وبدأنا نمدا إيدنا زي الناس نضغط على الرز عشان نطلع بيه في إيدنا





مبطلعش، إمال الناس دي الرز بيطلع في إيدها إزاي، كنا عاملين زي اللي بيصطاد سمك، المفروض تضم صوابك الأربعة وقصادهم صابع الإبهام وتضغط على الرز وبعدين ترفع إيدك تكون مليانة رز، دا المفروض، لكن إحنا كان بيطلع في إيدنا حيتين رز، خمس حبات، لا تسمن ولا تغني من جوع.

مرة في إثنين في ثلاثة، بدأت إيد الواحد تتعود وتمتلي رز، لكن قبل ما يوصل جهاز الإدخال «الفم» يكون وقع 80 في الميه منه على الأرض، بقيت عامل زي الطفل الصغير، اللي بيغرق السجادة أكل، صراحة كنت مكسوف جدًّا، وأول ما الرز يقع، اسحبه تحت الصينيه عشان ميبش.

بعد ما خلصنا أكل، وهما بيشيلوا الصينيه، لقيوا قدامي جبل من الرز، اللي كان واقف، كنت في قمة الإحراج، إيه الطفل الصغير دا 😊.

دخلنا صلينا المغرب وروحنا، وكنت مبسوط الصراحة، أخيرًا هنرجع من الشغل ننام ومفيش تجهيز أكل، سامح قال أنا معرفتش أفطر، قلت يعني إحنا اللي فطرنا، عمومًا من بكرة، كل واحد يجيب ملعقته في جيبه وننزل بدري شوية عشان نقعد براحتنا.

حصلت لينا مواقف مضحكة كثير في موائد الرحمن دي، إحنا الوحيدين اللي كنا بناكل بملاعق في المائدة كلها، أول ما يبدأ الأكل، كل واحد يدخل إيده في جيبه ويطلع الملعة بتاعته، وأول ما يخلص يدخلها تاني.

من أكثر المواقف المضحكة، في يوم جمعة، اتأخرنا في الشغل مع المدير وراجعين في تاكسي، قبل المغرب بنص ساعة، فقلنا مش هنروح الشقة


## يوميات مُغترب

بتاعتنا، هنروح على المائدة على طول، التاكسي المفروض بيعدي من قدام المسجد، فهريدي قال للتاكسي نزلنا قدام المسجد دا، قلتله إيه ياعم، ينزلنا قدام المسجد فين، فيه حد بيروح مائدة رحمن في تاكسي، إنت عاوزهم يجروا ورانا كلهم، قلت للتاكسي اطلع قدام شويه، ونزلنا قدام شويه، ورجعنا مشي، وكل واحد شايل شنطة لاب توب في إيده، ورايح يقعد في مائدة الرحمن، الناس كلها بتبصلنا 😊.

إفطار مائدة الرحمن دا كان بيخفف عننا كثير بصراحة، غير الأكل ولبن أب 😊، كنا بنفطر مع الناس وبنكلم وكل واحد يتكلم عن مشاكله في الشغل والإقامة وحاجات كتير.

انتظروا المقال القادم: هريدي والمدير الجزء الثاني، قريبًا إن شاء الله.





## هريدي والمدير .. الجزء الثاني

شوفنا في مقال «أسبوع من العذاب» اللي اتعرضنا له أنا وهريدي وسامح من ضغط في الشغل، المعروف إن في رمضان بيكون الشغل خفيف، سواء شغل خاص أو حكومي، لكن المدير كانت وجهة نظره زي ما قالها ليا في التليفون صراحة «أنا مش جايبكو من مصر، عشان تشتغلوا ساعتين وتمشوا».

وظبط لينا خطة الشغل اللي كادت أن تقضي علينا، مكناش بنعرف ننام، شغالين قبل الفطار وبعد الفطار، في المكتب قبل الفطار، وعند العملاء بعد الفطار ونرجع البيت متكسرين آخر الليل.

قعدنا مع بعض أنا وهريدي وسامح عشان نشوف هنعمل إيه، وهنقول إيه للمدير عشان مش هنقدر نكمل بالشكل دا، وقررنا إننا هنستحمل ومنحاولش نصعد الموضوع أو نبين إننا مضايقين، بس هنطلب منه إننا منروحش لأي عملاء بعد الفطار ونشتغل بالليل ساعتين عشان نلحق ننام ونتسحر.



## يوميات مغترب

طبعاً إحنا كنا بنحكي كل حاجة لدينا يوم بيوم، وهي أكيد بدورها بتوصل دا كله للمدير، يعني المفروض إنه عارف كل اللي حصل معانا في أسبوع العذاب دا.

المدير جه يوم الخميس، سلم علينا، وأخباركو إيه، وأخبار الشغل، مالكو ضعفانين كدا ليه، يا قلب امك، صعبنا عليك بجدا! الراجل الدمعه هتفر من عينه. قال خلاص أنا عزمكو على الفطار إنهارده، محدش يروّح، شكلنا فعلاً صعبنا عليه، ظلمتك يا كبدي! هو فعلاً كان شكلنا متغير جداً ويصعب على الكافر، شعرنا كبر، عينا طلعت لبره، خدودنا دخلت لجوه، حواجبنا طلعت لفوق، وشفافنا نزلت لتحت 😊، بس مع دا كله مكنتش متوقع منه العزومة دي، والصراحة مكنتش دا السبب الأساسي للعزومة، كان فيه سبب تاني هتكلم عنه في المقال القادم إن شاء الله.

المدير نادي على دينا وقاللها إتصلي على مطعم (.....) مش فاكرا اسمه الصراحة وقاللها إحجزي طرايزة عشان هنفطر كلنا سوا إنهارده، وهو اتصل على أسرته وقاللهم هنفطر سوا مع الشباب في المطعم فمتجهزوش فطار في البيت، الراجل هيعزم الإمارات كلها عشان تفطر معانا والا إيه؟ دا إيه العزومة دي؟

بعد ما خلص موضوع العزومة بدأ يتكلم معانا وقال. أنا هبدأ في إجراءات الفيزا والإقامة ليكو إنتو التلاتة، بس عايزكو تطلعوا رجالة، طارق بقاله فترة معانا وثبت إنه قد المسئولية، فيا سامح ويا هريدي، أنا هجازف وأقدملكو وانتو لسه مكملتوش الشهر فعاوزكو تطلعوا قد المسئولية.



إحنا كنا مذهبولين إحنا التلاتة، عزومة، وفيزا وإقامة، إيه الكرم دا، هو كان حاسس إننا هنتفجر فيه ولا إيه، عشان كدا بيعمل إصلاحات سياسية 😊، قصدي إصلاحات عملية، مع إننا مكناش هنتفجر أصلاً، بس خير، يارب يكون صادق المرادي. وللعلم، كان فيه سبب آخر وراء الحديث عن الفيزا والإقامة، هتكلم عنه في المقال القادم إن شاء الله.

فيه ناس هتستغرب، هو لحد دلوقتي لسه مخلصش الفيزا والإقامة بتوعك، إنت بقالك كام شهر في الشركة، والمفروض إنك بقيت شخص أساسي. هو دا المفروض فعلاً، من وقت ما آرون مشي، لكن حصل حاجات كتير بوظت حسابات المدير، زي المثل اللي يقول: «من أعمالكم سُلط عليكم». الشركة كانت شراكة بين المدير ومواطن إماراتي، وكانت مقسومة جزئين، جزء سوفت وير ودا خاص بالمدير، وجزء هارد وير ودا خاص بالمواطن. المهم حصل حاجة بينهم، معرفش إيه هي بالضبط، تسببت في إنهم هيفضوا الشراكة.

طبعا الخسران الوحيد هو المدير بتاعي، لأن الشركة باسم المواطن، وإيجار المكتب باسم المواطن، ولما قرروا يفضوا الشراكة، المواطن رفض يتنازل عن اسم الشركة أو عن المكتب بداعي إن الاسم بقى معروف للعملاء بتوعه والمكتب طبعا إيجار قديم وباسمه فمش هينفع يغير المستأجر.

المدير كان لازم يختار اسم جديد لشركته ويأجر مكتب جديد وطبعا دا كلفه كثير جداً، لأن الأسعار كانت نار في الوقت دا، وأتذكر إنه دفع أكثر من 6 أضعاف اللي كان بيدفعه كإيجار في المكتب القديم.

## يوميات مغترب

لكن الصراحة المواطن كان رجل محترم، وكان أي حاجات يحتاجوها على اسم الشركة القديمة حتى بعد ما انفصلوا كان يوافق عليها لأنهم لسه مخلصوش تراخيص الشركة الجديدة.

لما حصل الخلاف دا، مرضيش يمشي في إجراءات الفيزا والإقامة بتاعتي، لأنها كدا هتطلع على الشركة القديمة وهيضطر بعدها يعمل نقل إقامة ليا على الشركة الجديدة، فقرر إنه يستنى لحد ما ينتهي من تراخيص الشركة الجديدة وبعدين يمشي في إجراءات الفيزا والإقامة بتاعتي.

بعد ما تراخيص الشركة الجديدة خلصت، كان لازم يبدأ في إجراءات الإقامة بتاعتي بسرعة، لاني دخلت في المخالف، بس هو كان محتار، يبدأ في إجراءات إقامة هريدي وسامح والا يبدأ في إجراءات إقامتي أنا بس الأول؟! لكن هو قرر إنه هيمشي في الإجراءات لينا إحنا الثلاثة، حسب كلامه يعني، هو كان بيقول لينا الكلام دا وأنا شايف في عينه التردد، لكن كنا مبسوطين، أخيراً هيبقى لينا إقامات، عشان نعرف نطلع عينه من غير خوف ولا تردد.

بعد الحديث عن الإقامات، المدير بدأ يتكلم عن نظرتة المستقبلية للشركة، وإننا عاوزين نخلي برنامج الشركة أفضل برنامج عقارات في الإمارات والخليج كلها، وهنحتاج معانا ناس مبيعات، بعدين بص لهريدي وقالله، متشوفلنا واحد مبيعات كويس من الشركة اللي انت كنت شغال فيها في مصر.

• هريدي: طيب والمرتب ظروفه إيه؟

• المدير: هياخد نفس المرتب بتاعك.





هريدي ما صدق الفرصة تجيله للكلام عن المرتب، رد وقال أيوه بس المرتبات هنا ضعيفة قوي، فيه شركات بتدي مرتبات حلوة، أضعاف المرتبات هنا ونفس الخبرات، والناس اللي في مصر بتشتغل على برامج كبيرة، لكن البرنامج بتاع الشركة هنا صغير، ميجيش موديول Module (جزء أو قسم) في برنامج الشركة اللي أنا كنت شغال فيها في مصر، ومظنش حد هيرضى ييجي على المرتب دا.

أنا اتصدمت من كلام هريدي، يخرب بيتك يا هريدي، الراجل لسه قايل همشي في إجراءات الفيزا، وخليكو رجاله، وانت تيجي تقولله مش هيرضى ييجي على المرتب دا! الراجل عمال يقول عاوزين نخلي برنامج الشركة أفضل برنامج عقارات في الإمارات والخليج كلها وانت تيجي تقولله البرنامج بتاع الشركة صغير وميجيش حاجة في برامج الشركة في مصر!

أنا بصيت للمدير، لقيت وجهه بقي احمر، والعفاريت بتتنطط على كتفه وقام رادد على هريدي وقال: امال إنت قبلت المرتب دا ليه. وقبلت تشتغللي على برنامج صغير ليه؟

هريدي بأسلوب يخلي الواحد يشد في شعره: أنا قلت أجرب السفر، أهو تغيير جو، ولما قدمت استقالتني، إتخايلوا عليا عشان أفضل، وعرضوا عليا مرتب أكثر من اللي هوفروا هنا، بس انا كنت خلاص قررت السفر.

المدير شاط أكثر من كلام هريدي وشعره بقي أحمر من الغيظ، وراح راجع لورا بالكروسي وحاطط رجل على رجل بإسلوب سخريه قال لهريدي: يعني انت عاوز تاخد مرتب كبير، عاوز كام مثلاً؟ 10 آلاف درهم، 15

## يوميات مُغترب


ألف درهم؟ أوك مفيش مشكلة، بس إيه مؤهلاتك اللي هتخلي شركة كبيرة تقبلك وتديك المرتب دا؟ الإنجليزي عندك ضارب، وبتخاف ترد على العملاء، وم عندكش خبرة في البلد، الموضوع مش خبرة برمجية وبس، الموضوع برمجية وخبرته بسوق العمل ولغة قوية وحاجات كتير م عندكش منها حاجة، وووو...، وووو...، وووو...، وووو...، وووو...

أنا عمال ابص للمدير وابص لهريدي، هريدي إتغسل من الكلام، ومنطقش.

طبعا فيه كلام كتير المدير قاله مش صح، لكن هو بيغسل في هريدي وخلاص عشان يحسسه إنه غلط لما قال كدا وإنه في نعمة والمفروض ميتكلمش.

بعد كدا عم الشركة صمت رهيب كل واحد شغال مع نفسه ولا نفس، على الساعة 2 كدا المدير خرج، وهو في الطريق اتصل بيا.

- المدير: إنت فين؟
- طارق: في المكتب
- المدير: طب اطلع بره المكتب
- طارق: حاضر، وفي سره هو هيضربني والا إيه؟
- طارق: أيوه يا بشمهندس، أنا بره دلوقتي
- المدير: بص يا طارق، هريدي مش كويس، وطريقة كلامه مش كويسة، اللي حصل إنهارده والي حصل الإسبوع اللي فات منه يدل على إنه مش كويس.



إلي حصل في الأسبوع اللي فات إن هريدي طلب من المدير مرتب على الأيام اللي اشتغلها في الشهر اللي فات، هريدي كان بدأ شغل آخر 5 أيام في شهر أغسطس، فالمدير قاله مرتب على إيه؟ إنت لسه مكملتش شهر عشان تاخذ مرتب !

هريدي: أنا حصلي كذا في الشركة اللي كنت شغال فيها في مصر وخذت مرتب 6 أيام.

المدير: إحنا مش فواعلية بنشتغل باليوم

هريدي: أنا ممعيش فلوس وكنت عامل حسابي على كدا، عشان كذا جيت من مصر قبل بداية الشهر

المدير: ماشي ياعم... عنينا ليك، واداله مرتب 5 ايام، بس كان مضايق جدا وقتها.

فطبعًا المواقف جمعت بعضها وجه كلام هريدي الأسبوع داعم طلبه الأسبوع اللي فات وسخنوا المدير قوي، أنا لما حسبت إن المدير لسه هيتكلم كثير، رحت مشغل التسجيل في الموبايل بتاعي. أول موبايل صيني نزل في السوق المصرية في 2008 كان بـ 700 جنيه، يحتوي على راديو وتليفزيون وساعات أعلى من الميكروفون وخاصية تسجيل المكالمات)، وبدأت تسجيل المكالمات كلها، المدير اتكلم عن طريقة طلب هريدي للمرتب، وإنه ممكن يخصم تذكرة السفر قصاد المرتب دا، وبعدين اتكلم عن طريقة الكلام عن البرنامج والمرتب وفي آخر المكالمة قال لي متقولش لهريدي الكلام ده كله، إنت قولله يهدي شويه ويشغل كويس عشان يحافظ على وظيفته وإلا هينزل مصر.

## يوميات مُفترب

أنا قصدت بالتسجيل دا، إن هريدي يسمع الكلام مباشرة من المدير،  
عشان يتصدم ويتظبط، وبعد كدا يفكر قبل ما يتكلم، لاني عارفه كويس، لو  
قلته متكلمش وترد، يقوللي أنا بحب أبقى أكتيف، ومحبش اشتغل وبس،  
لازم يكون ليا رأي، فقلت متعش نفسي كتير في الكلام واديله التسجيل  
يسمعه وخلاص.

لسماع التسجيل كاملاً:

<http://youtu.be/BMd2Im0LSMw>

بعد كدا رَوَّحنا على المطعم عشان الفطار، عزومة المدير، ودي هنفرد  
ليها مقال كامل لما فيها من مواقف مضحكة وشيقة. المهم واحنا بنفطر، وفي  
وسط الكلام، هريدي قال إحنا عايزين تليفزيون في الشقة، قلت في سري  
هيه ناقصة يا هريدي، إنت مسحوب من لسانك، طبعاً لسه متكلمتش  
مع هريدي على اللي حصل بيني وبين المدير، لإن منفردتش بيه خالص في  
المكتب، وقلت نتكلم بالليل عشان نتناقش على راحتنا، المدير بصلي كدا  
وضحك بسخرية فيما معناه، شايف مجايك، وبعدين رد على هريدي وقال:  
ورينا شغلك الأول وابقى اطلب اللي انت عايزه، هريدي قال مش أنا اللي  
عايز التليفزيون، دا سامح اللي كان يقول عاوزين تليفزيون في الشقة، المدير  
قال وانت المحامي بتاعهم يعني، في طريقة هزار، بس كان بيكز على اسنانه.  
السكن بتاعنا مكنش فيه تليفزيون، كان فيه مقومات الحياة، مطبخ كامل،  
غسالة، تلاجة، بوتجاز، والسراير بتاعتنا، لكن مفيش حاجات للرفاهية، وانا  
بالنسبالي محبش اتفرج على التليفزيون، دا غير إن الموبايل الصيني بتاعي




كان فيه تليفزيون فلما كنت أحب اتفرج، كنت اتفرج عليه، وأصلاً مفيش وقت للتليفزيون، لكن سامح هو اللي كان يحب التليفزيون وهو اللي علق على موضوع التليفزيون ده وإحنا في الشقة لكن هريدي، المحامي العام، هو اللي إتكلم.

لما روحنا، وقبل ما ننام، قلت لهريدي، فاكر لما جالي تليفون من المدير في المكتب وطلعت بره، قاللي آه، قتلته كان بيتكلم عنك، هريدي سألني: بيكلم عني في إيه؟ قتلته ولا حاجة، دا بس بيشكر فيك، أنا مش هقولك على اللي قاله، أنا هخليك تسمعه، وشغلت التسجيل، واديت الموبايل لهريدي وسمع المكالمة.

بعد ما المكالمة خلصت، هريدي قاللي، لو عندك أي تعليق قوله، قتلته لأ معنديش أي تعليق، أنا هروح أنا، أصلي تعبان وأول ما احط راسي هنام على طول، مش زيك هتفضل سهران، مش انت عاوز تبقى نشيط وأكتيف. خلي الأكتفة تنفعك !! هات الموبايل، ياللا تصبح على خير، وابقى طفي النور.

موقف هريدي في العزومة خلي المدير يتخذ قرارات خطيرة، منها إنه وقف إجراءات الفيزا والإقامات و.....

نكمل المقال الجاي إن شاء الله عشان هريدي طَفَّى النور ☺.



## عزومة المدير

لم يكن سبب عزومة المدير في الأساس هو أسبوع العذاب، لكن كان أحد الثلاثي المرح. طارق. هريدي. سامح. على موعد مع السفر، وفقاً للسؤال الذي طرحته على الصفحة. تعتقد مين هينزل مصر في رمضان؟ «كانت معظم التوقعات تشير إلى هريدي ثم طارق، وحصل سامح على أقل التوقعات.

لكن في الحقيقة فإن المدير لم يكن بالسذاجة لكي ينهي عمل هريدي قبل انتهاء مدة الزيارة، وإلا أصبح هو الخسران، كذلك الحال مع سامح، إذا لم يبق إلا هذا الفتى الغلبان، الضعفان، اللي مش كسلان 😊، أكيد عرفته، مفضلش إلا هو.

لو تفتكروا، لسه مفيش ولا إقامة اتعملت عشان نقل الشركة، لكن الزيارة بتاعتي انتهت، كانت شهرين قابلة لتجديد شهر، لكن لازم التجديد يكون قبل ما الزيارة تنتهي، وعشان المدير أو دينا ماخدوش بالهم من الموضوع دا، وأنا طبعاً معرفش في الحاجات دي، فالشهرين خلصوا من غير ما يجددولي الشهر، فكان لازم أخرج من البلد، وإلا هبدأ عد غرامة قدرها 100 درهم





## هَذَا مَا رَأَيْتَ فِي دُبَيِّ

يوميًا، لاني أصبحت مخالف، أو مقيم إقامة غير شرعية، وهناك فرق شاسع أيها القارئ الكريم بين علاقة وإقامة غير شرعية، حتى لا يذهب أحد بعيدًا عن لب الموضوع 😊.

نعود للُّب الموضوع، لما الزيارة بتاعتي انتهت، المدير قاللي هنجزلك تذكرة لمنطقة اسمها «كيش» هتقعد في المطار لحد ما نطلعك زيارة وبعدين ترجع، المنطقة دي منطقة إيرانية، أنا قلت لأ، كيش لأ، المدير قاللي لأليه؟ قتلته عشان الناس اللي بتروح كيش وتنزل مصر، أمن الدولة بياخدهم ويستجوبهم. رايح إيران ليه؟ تعرف مين هناك؟ وكلام كثير على الفاضي. طبعًا أنا مش عارف دا بيحصل والا لأ، بس اللي اعرفه إن اللي بيروح إيران، كانوا بيضططوه في أمن الدولة، وأنا أول ما بسمع كلمة أمن الدولة، بفتكر فيلم الكرنك 😊.

المدير قاللي خلاص، أنا هسافر عمان، وهاحاول أعملك فيزا عمان، لو عملتها هتيجي عمان وتقعد معايا شهر هناك لحد ما نخلص إقامتك في دبي، معملتهاش، يبقى هتستني في المطار وهنعملك فيزا زيارة ثاني. قلت ماشي عمان عمان، أحسن من كيش.

وسافر المدير على عمان والحمد لله، فشل في استخراج فيزا عمان، بعثلي وقاللي إحجز تذكرة لعمان ذهاب وعودة يوم الخميس، بحيث المدير هيكون في دبي ويعمل فيزا زيارة، وهي عادة مبتخدش أكثر من ساعة عشان تطلع، هكون أنا مستني في مطار عمان. مسقط.

رحت أنا وهريدي يوم الثلاثاء على مكتب العربية للطيران، عشان نحبز تذكرة لمسقط، وملقناش إلا رحلة واحدة الساعة 6 مساء وهتعود



## يوميات مُفترب

7:30 مساءً، اتصلت على دينا وقلت لها مفيش إلا رحلة واحدة يوم الخميس الساعة 6:00 مساءً والعودة 7:30 مساءً، أحجز والا إيه؟ قالتلي إحجز، قلت لها أولك وحجزت، كانت تكلفة التذكرة حوالي 600 درهم.

تاني يوم بعث للمدير إيميل وقلتله «أبشر، حجزت تذكرة لعمان يوم الخميس الساعة 6 مساءً والعودة 7:30 مساءً لقيته بيتصل بيا.

- طارق: ألو سلام عليكم يا بشمهندس.
- المدير: وعليكم السلام، إنت بتستهبل يعني!
- طارق: ..... سكت، مفيش كلام وفي سري. الراجل (دا عيط والا إيه؟).
- المدير: إنت حاجز تذكرة الساعة 6 مساءً، أطلعلك فيزا إمتي إن شاء الله؟ هي الجوازات بتبقى شغالة الساعة 6 مساءً؟ التذكرة دي إنت اللي هتشيلها، الشركة مش مسئولة عن أخطاء الموظفين.
- طارق: لأ بقى دا انت بتستهبل، في سري بردو، حضرتك أنا معرفش، أنا اتصلت بدينا قبل ما احجز وقلت لها على المواعيد، قالتلي إحجز، أنا مش مسئول عن شيء.
- المدير: واحد منكم اللي هيشيلها، الشركة مش مسئولة، إديني دينا.
- دينا: أيوه يا عامر، طبعاً هي بتناديله باسمه، شركاء بقى، أنا مجاش بيالي إن الجوازات بتكون مسكّرة «مقفولة» وأساساً مفيش موعد تاني للسفر غير هيك الموعد.



- وخلصوا كلام في التليفون والحمد لله ديننا الي هتشيها مش أنا.

أخت دينا كانت بتشتغل في مطار الشارقة، كلمتها عشان تشوف صرفة للتذكرة، وأختها حاولت، لكن معرفتش، لإن العربية للطيران مبرجعش فلوس لحد.

طبعًا دا كله، إما مخالف وأيام بتعد، والمدير مضايق، لإنه هو اللي هيدفع، وأنا مبسوط، أحسن يستاهل، لو كان عملي الإقامة أول ما جيت، مكنش دا كله حصل.

المهم المدير قاللي خلاص، أنت هتتزل مصر، هتقعد هناك أسبوع لحد ما  
نعمل الإقامة وترجع تاني. أوباللاااا، مصر، الحنين إلى الوطن، أمي الحبيبة،  
من ابنك حبيبك، اللي مكنش بإيده لحظة يسيبك، أخبارك إيه؟ وحشاني  
يامه، وكلكم وحشني، وعامله إيه؟ البعد عنكم والله غصبين عني.....  
وسلميلي ياما على اللي بالي بالك واقريلها كل كلمة عنها كتبتها لك، وقوليلها  
إني راااااجع والفرحة قريبة. طارق عباس، أمي الحبيبة ☺.

الفرحة مكنتش سيعاني، هتزل مصر، أول مرة غربة، والأيام كانت صعبة، والواحد ضعف خالص، يروح يشم نفسه شوية بقي.

## يوميات مُفترب

تظاهرت إن الموقف عادي، عشان المدير ميقوليش هتشيل التذاكر، أنا عارفه عاوز أي منفذ يخلي الواحد يشيل فلوس ويس.

قاللي إحجز على الجمعة الجاية، والعودة بعد أسبوع، وابقى خد الفلوس من ديننا، وفي الأسبوع دا عاوزك تعلم هريدي كل حاجة في البرنامج، عشان هو اللي هيتعامل مع كل العملاء وانت مش موجود.

كدا بقت رسمي خلاص، هنزل مصر بعد أسبوع، المدير قال، أنا هعزمكوا على الإفطار إنهارده عشان إنت هتسافر الأسبوع الجاي، ويبقى فطرنا سوا، فمحدث يروح، وقال لدينا، زي ما شفنا في المقال اللي فات تحجز في مطعم.

المطعم اسمه أبو شقرة. مطعم معروف في مصر وفاتح في دبي وأبوظبي، المهم قبل الفطار بنص ساعة، إتحركنا من المكتب إحنا الأربعة، أنا وهريدي وسامح ودينا وروحنا على المطعم بعريية ديننا، والمدير هيقابلنا هناك هو وأسرته، المدام وأولاده الإثنين ولد وبنت.

إتقابلنا على باب المطعم، ودخلنا مع بعض، المدير وأسرته، بعدين ديننا، وإحنا وراهم ومع أول سلمة من سلام المطعم، منظر خرافي، على كل سلمة، بطيختين واحدة على الشمال وواحدة على اليمين بطيخ مصري أصلي، الواحدة تيجي 10 كيلو، بصيت لفوق كدا، وشوفت منظر البطيخ، كنت هقعده على السلم واقول جمعوا حولي البطيخ دا ومش عاوز أدخل جوا، البطيخ وحشني جدًا، مشفتوش من ساعة ما سافرت، وأنا مدمن بطيخ.

طلعت السلام، وأول ما دخلت جوا المطعم، لقيت أكل، تخيلوا ☺.



لقيت أكل ملوش حصر، أطباق أكل كثير وكبيرة، ومحدث حواليتها.  
وصلنا للطرايزة المحجوزة لنا، لقيت مكتوب عليها إسم المدير، المدير  
قال كل واحد يروح يجيب فطاره، اختاورا اللي انتو عاوزينه، أوبن بوفيه.  
أوبن بوفيه. بتاع الأفلام دا، أول مرة في حياتي أدخل أوبن بوفيه، طول  
عمرنا بنختار وجبة واحدة ونحاسب عليها، إنما أوبن بوفيه، بدأت أخاف،  
إفكرت هاني رمزي لما دخل أوبن بوفيه، وفي الآخر خادوه على القسم عشان  
مدفعش الفلوس، ممكن المدير يعمل معانا كدا والا إيه؟

روحنا على أماكن الأكل، عشان نختار الأكل بتاعنا، كل واحد مننا.  
أنا وهريدي وسامح أخذ طبق من المكان المخصص للأطباق وبدأ هريدي  
وسامح يختاروا أصناف من الأكل ويخطوا في أطباقهم لكن أنا فضلت أبص  
على كل الأصناف، كل حاجة حلوة، مختار اختار إيه فيها، كل الأصناف  
عجبتي، وللحظات بسيطة تذكرت أسبوع العذاب، لما قضينا يومين على  
إفطار بعلبة زبادي ومتسحرناش، لما كنا بنرجع من الشغل في نص الليل،  
ونختار بين الأكل أو النوم.

وقررت الانتقام، هاخذ من كل صنف، لن أترك صنفًا دون أن أضع  
ملعقتي فيه، نأخذ رجلًا من كل قبيلة 😊.

وبدأت أجيب أطباق، أعبي الطبق واروح أحطه على الطرايزة، فراخ  
شغال، ديك رومي شغال، لحم ضاني شغال، كباب شغال، حمام شغال، رز  
بالكبدة شغال، شيبسي شغال، سلطات شغال، دا غير الحلو بأنواعه المختلفة،  
كله شغال، مبسبش حاجة أنا، أنا كنت عاوز طرايزة لوحدي.

## يوميات مغترب

دا كله والمغرب لسه مأذنش، بعد كذا قعدنا، مستنيين الأذان، وأنا عمال أبص للأكل، مش هرحكوا، اصبروا لما يأذن بس، هنسفكوا.

وأذن المغرب، وشربنا عصير، بعدين حنة كباب، مع حنة فراخ، ومفيش مانع من ملعقة رز، بطاطساية مقرمشاية. شوية ولقيت نفسي معتش قادر، والأكل لسه زي ما هو، نهاااا اسود. أنا بقالي ساعة عمال أجمع في الأكل، وفي الآخر مكملتش ما يعادل ربع وجبة.

المعدة صغرت والحمد لله، متعودة على الزبادي والنوم من غير سحور، الأمعاء تقلصت، منك لله يا جمال يا مروان، بقى يبقى قدامي الأكل دا كله ومش قادر أكل حاجة، أعمل إيه، أعمل إيه؟

ندهت على الوايتز، وقتله لو سمحت، واحدة سفن أب، يمكن تهضم وتعمل أي مكان في المعدة، الكباب هيطير من عيني.

المدير لما لقاني بطلت أكل، الأطباق لسه زي ما هي قالي، كل يا طارق، إتغدى، عشان لما تروح للحاجة الوالدة، متقولش إنك ضعفان، قلت في سري، هي هتقول بس، دي هتقول وهتدعي وهتحسبن، دا انت يمكن تتسخط قرد لما أنزل مصر.

جيه السفن أب، وشربت شوية، وحركت بطني حركة لولبية عشان يفضي أي مكان، وبالفعل أكلت ملعقة رز بالكبدة وبطاطساية، كان هذا آخر ما دخل على معدتي.

وجاء العاملون ليحملوا هذه الأطباق المليئة بالأطعمة، لتذهب إلى أين؟ لا أعلم، لكنني أحسست بضيق بداخلي، على مصير هذه الأطعمة، وتذكرت





## هذا ما رأيت في دبي

كم من أناس يموتون جوعًا، وكم من يتمنى مثل هذه الأطعمة التي لن يكون لها مصير غير الإهلاك، ولكنها حكمة الله في الأرض.

وجاء أحد العاملين بكتيب صغير بداخله الفاتورة ووضعها أمام المدير، وكان هريدي يجلس بجوار المدير فنظر إلى الفاتورة بعينه الثابتين ليصاب بعلامات الدهول، نظرت إليه وأحسست أن المبلغ كبير.

خرجنا من المطعم لنستقل السيارة مع دينا متجهين إلى الشارقة، حيث نسكن، ثم أخبرنا المدير أن غدا الجمعة راحة، وطلب مني أن أحجز تذكرة سفري لمصر يوم السبت وأن آخذ ثمن التذكرة من دينا.


لما روحنا البيت هريدي قال لي، عارف الفاتورة كام؟ قلت له كام، قالت تتوقع كام، قلت له يعني لو كل واحد 100، إحنا كنا 8 يبقى كله 800 درهم، قال لي الفاتورة 1700 درهم، شهقت شهقة سمعها مدير المطعم في دبي، مش عارف إذا كان المبلغ دا حقيقي ولا إيه، يمكن هريدي شافه 1700 بس هو 700، ويمكن يكون 1700 درهم، الله أعلم. دا إحنا مكلناش حاجة ياعم الحاج، ياللا ياعم إحنا مالنا، دفعنا من جيبننا يعني؟

طبعا فاكرين التسجيل بتاع المدير في المقال اللي فات، ولما هريدي زود الموضوع وإحنا في العزومة وطلب تليفزيون، وطبعا دا سوأ موقفه أكثر عند المدير.

تاني يوم. يوم الجمعة، بعد صلاة العشاء والتراويح، لقيت المدير بيتصل بيا من عمان، وهريدي كان جنبي، عرفت إن المكالمة عن هريدي، لأنه أكيد مش هيعدي هريدي في العزومة كدا، رديت على المدير وشغلت التسجيل، عشان هريدي يسمعها بعد ما المدير يقفل.

## يوميات مُفترب

- طارق: سلام عليكم، آلووو
- المدير: أيوه يا طارق، أخبارك؟
- طارق: الحمد لله.
- المدير: خلصتوا صلاة.
- طارق: آه خلصنا من زمان.
- المدير: طيب، تقبل الله.
- طارق: إن شاء الله .
- المدير: «طارق، بلغ محمد. هريدي. إنه تحت اختبار لمدة شهر، لو مثبتش نفسه فيه هينزل مصر وهيتحمل كل مصاريفه من تذاكر الطيران والفيزا وكل حاجة عشان هو مش جاي هنا يلعب».
- كان باين من صوت المدير إنه متعصب، جايب آخره من هريدي، بس قاللي كلمتين حلوين خلوني أحط رجل على رجل وهو بيتكلم كدا، قاللي: زي ما كنت متوقع منك إنك تشيل شغل من عليا وثبت نفسك وعديت المرحلة ديه وانت معانا خلاص».
- بعدين كمل وقال، لكن بالنسبة لمحمد أو هريدي، أنا مش راضي، لا عن شغله ولا عن سلوكه، سلوكه لازم يتغير، ميقعدش طلبات طول النهار ويقعد يشتغل، يطلع شغل وبعدين يطلب.
- بعدين اتكلمنا على التاسكات شوية، وقفل.



## هذا ما رأيت في دبي

أول ما قفّلت مع المدير، شغلت التسجيل وإدیت الموبيل لهريدي وقلّته،  
خديا أكتيف.


لسماع التسجيل كاملاً:

<http://youtu.be/W3ipQCilbEg>

كنت أعنف هريدي بسبب سخط المدير عليه، وكانت هذه التسجيلات  
صعبة للغاية عند سماعها ولكن لم أكن أدري أن المكالمة القادمة ستكون  
لي، وتعنيف شديد، دبرت له ديناً، بسبب تذكرة السفر التي تحملت هي  
تكلفتها..

انتظروا المقال القادم، المسافر.





## عزومة العميل

نظرًا للظروف التي تمر بها البلاد، ونظرًا لماطلة العملاء في دفع المستحقات، قررنا أن نأخذ حقنا من العملاء عزومات ☺.

بعد عزومة المدير، كان المفروض المقال يبقى «المسافر»، بس كنت مشغول شوية ولسه مجهز توش، لإنهارده الأحد بتاريخ 11-03-2012، كنت معزوم عند عميل، وافتكرت مقال عزومة المدير، فحييت أعملكم مفاجأة، مقال فرش، عزومة العميل ☺.

أنا صورت السفرة قبل ما تتظبط، لأنى بحب أشرف على العزومة اللي هتعزم فيها بنفسى، عشان وقت الهجوم، أبقي عارف أماكن الضعف، وبردو صورت طبق الأكل بتاعي بعد الهجوم بس فى الخبائة ☺.

وطبعًا إنتو عارفني من وقت عزومة المدير، لا أترك شيء إلا ووضعت فيه ملعقتي ☺.

عملت طبق مشكل حلو، وكنت حاسس إن العيون كلها عليا مش عارف ليه، ممكن عشان أخذت قلب الخروف كله، ونص الكبدة. عادي يعني، ما أنا سبت نص الكبدة للباقيين !!



## هذا ما رأيت في دبي

الطبق الكبير كان فيه ييجي نص خروف، محشي بطاطس ورأس الخروف، والقلب والكبد، طبعاً أنا درست الخريطة قبل ما كل الناس تدخل ووقت الهجوم، هجمت زي زيهم، مفيش تفرقة ولا حد قبل حد، بالعدل والمساواة 😊.

بس عاوز أقوللكم «إني مع كل ملعقة وكل حباية رز، كنت فاكر أعضاء المدونة عضو عضو، أنا مبنساش الفائز بتوعي في الرخاء 😊».

وأخيراً، زي ما حسين فهمي ومحمود ياسين قالوا. الرصاصة لا تزال في جيبي. أنا بقوللكم «العزومة لا تزال في بطني».

وفي السنة اللي قبلنا فيها عزومة المدير، قبلنا بردو عزومة العميل

عزومات عربي، أأأأأأأأأأأم الأجنبي؟



## المسافر

وما أشبه اليوم بالبارحة، قلت في آخر مقال عزومة المدير. إنتظروا المقال القادم «المسافر»، ولم أكن أعلم أن ما أقصه عليكم من تجربة مررت بها، قد يتكرر في هذه الأيام، فقد قابلتني كثير من المشاكل في العمل الأسابيع الماضية، والتي لم تُحل بعد، وكان هذا سبب تأخري في كتابة هذا المقال، حيث كنت كثير التفكير في الأيام المقبلة، وكنت أضع تصورًا لكل السيناريوهات التي قد تحدث لي، فماذا سيحدث إذا لم تحل هذه المشاكل وسأضطر إلى النزول لمصر نهائيًا، أم أن مشيئة الله ستجعلني أتغلب على هذه المشاكل، أسألكم الدعاء.

وعلى رأي الست أم بطاطا، أنت محسود يا بني، إظهار بعد عزومة المدير ثم عزومة العميل، في حد كانت عينه وحشة، وأقول لهؤلاء العملاء المدسوسين بين الفائز. متبصوليش بعين ردية، دي ماما تعبت فيا ☺.

كنا واقفين بعد عزومة المدير اللي كانت بسبب إني هتزل مصر واحتمال مرجعش تاني في رمضان، فيبقى فطار جماعي لكل الموظفين في الشركة، وكمان على رأي المدير، عشان أتغذى شوية، قال يعني العزومة هتغذي





## هَذَا مَا رَأَيْتُ فِي دَلِي

وتشيل آثار الأيام القاحلة اللي مرت علينا. وطبعًا فاكرين هريدي الأكتيف، لما طلب تليفزيون والمدير رد عليه وقاله ورينا شغلك الأول وبعدين اطلب اللي انت عاوزه.

واحنا خارجين من المطعم، المدير قاللي إبقى احجز تذكرتك على الجمعة الحماية والرجوع بعد إسبوع، خلال الأسبوع دا هكون عملتلك الفيزا، وابقى خد فلوس التذكرة من دينا، دينا كانت واقفة وسامعه الكلام.

يا بن ال...، عايزني أنزل مصر يوم 18 رمضان، وأرجع بعد أسبوع؟ يعني قبل العيد بخمس ايام، روح يا شيخ منك لله، منك لله، منك لله يا جمال يا مروان.

أنا قلت أوك ماشي، وأنا متأكد إنه مش هيلحق يعمل الفيزا، بس قلت أخده على قد عقله، علشان نخلص.

إتحركنا ناحية العربية بتاعة دينا عشان توصلنا لحد البيت، لأنها زي مانتو عارفين ساكنة في الشارقة، فالمدير حب يهزر، قال لدينا إنت هتركي لوحداك مع 3 شبان في العربية؟ قالت: عادي، شو المشكلة؟ قلت في سري، ياعم دي ميتخفش عليها، دا احنا اللي نخاف على نفسنا منها.

تاني يوم، في الشغل، واحنا في المكتب، سألت دينا، جبتي فلوس التذكرة؟ ردت وقالت: أوووو، نسيت!! لا والله، نسيتي!! نسيتي تاكلي، نسيتي تشربي، نسيتي تعكنني علينا، نسيتي تستحمي في الفسين.

• قلت: أصلي كنت عاوز أحجز إنهارده عشان أبعت للمدير إني حجزت عشان ميزعقش.

## يوميات مفترب

• قالت: لو معك مصاري إحجز وأنا بسحبهم من الصراف اليوم وبجبهملك بكرة في الصباح.

طبعاً أنا لسه قابض، يعني مقدرش أقول ممعيش مصاري (حلوة مصاري دي!! أردني بقى)، مقدرش أقول ممعيش فلوس، أبقي كداب وش، بس أنا مش عاوز أدفع من معايا، أنا عاوز أي فلوس تبقى معايا وأنا نازل مصر وهما الصراحة مش مضمونين.

قلت اروح أحجز من معايا، للمدير يغير رأيه ومعرفش انزل مصر، وأنا مروح، حجزت وبعث إيميل للمدير بالليل إني حجزت على يوم 19 رمضان والرجوع يوم 26 رمضان والله الموفق وحسبي الله ونعم الوكيل.

تاني يوم سألت دينا، جبتي الفلوس؟

قالت: أوو نسيت، الطريق كان زحمة وما عرفتش أعدي على الصراف. طب أقول إيه أنا بقى، روعي يا شيخة يصرف فيكي ربنا، شكل البت هتنام على الفلوس، طب وبعدين، 1700 درهم حق التذكرة، دا غير إني مخالف 18 يوم، يعني همدف في المطار حوالي 1800 درهم، مهو اليوم مخالف بـ 100 درهم على طول، يعني كدا 3500 درهم طاروا في الهواء، أي نعم كدا كدا هاخدهم، لأن الشركة هي اللي همدف الغرامة مش أنا، بس هاخدهم لما ارجع وعليك خير، لكن أنا عاوز أنزل مصر ويكون معايا مبلغ كويس، مش أدخل على الحاج الوالد وإيدي فاضية.

الأسبوع خلص، وأنا كل يوم أقول لدينا جبتي الفلوس وهي كل يوم تنسأهم بس بعذر مختلف فأنا قلت خلاص، أخذهم من المدير بقى.



## هذا ما رأيت في دبي

خلال الأسبوع دا شرحت لهريدي البرنامج كله، وعملتله تسجيل فيديو،  
عشان يبقى يراجع مع نفسه لأنني عارف إن فيه حاجات كتير هتضيع منه  
وخصوصًا إن الشرح مكثف، فهو براحته بقى يتفرج على الشرح الفيديو.

أول ما المدير رجع من عمان، يوم الأربعاء، إتصل بيا بالليل وكانت مكالمة  
من أسوأ المكالمات بينا

عرفت منها يعني إيه snake. ثعبان، كما أطلقنا على دينا.

دينا قالت للمدير إن طارق طلب الفلوس أكثر من 20 مرة وحساب  
البنك مكنش فيه فلوس، وأنا إتحرجت منه أكثر من مرة وفضلت تنفخ فيه،  
تنفخ، تنفخ لحد ما استوى، وأول ما استوى، إندلق عليا، وهو سخن 😊.

المدير زي مانتو عارفين بيصدق أي كلمة دينا تقولها دا غير الثقة العمياء،  
إتصل بيا ونزل رغي رغي مبطلش، وأنا ساكت مبتكلمش، إنتو إيه  
مشكلتكو بالضبط. هريدي من إسبوع يقوللي أنا اشتغلت 5 أيام إدوني  
فلوسي وانت دلوقتي كل شوية عاوز فلوس التذكرة، إنتو مش بتقدروا؟  
أنا جاييلكو شقة كويسة وجاييلكوا أثاث وعفش كويس، على الأقل قدروا  
الحاجات دي، يعني بدل ما أقعد 2 في الأوضة ممكن أقعد 4 في الأوضة، واللي  
عاجبه عاجبه، قدروا الحاجات دي يا طارق واعرفوا إننا في شركة واحدة  
ومكان واحد، إنت عارف إننا داخلين في مشاريع جديدة وحطين فلوس كتير  
فيها، شير شوية يعني محبكتش الألف درهم دلوقتي، لحد ما الأمور تستقر،  
إحنا بقالنا 4 سنين مبنأخرش مرتبات على الناس، حصل ظروف معينة، مش  
لازم كل ساعتين يا دينا فين الفلوس؟ يا دينا فين الفلوس؟ لا يا بابا مش كدا،

## يوميات مفترب

عيب يعني، أنا كل دا وبقيمك أنت وهريدي، الأسلوب (behavior) بتاعكو مش عاجبني. أنا لو عليّ أنا، مش هخليكو تشتغل إنت وهريدي بالمستوى دا، أنا بحاول أبذل مجهود وبحاول أعلمكو وبحاول أشغلكو.

إنت شايف نفسك كويس في البرمجة؟ البرمجة دي ولا حاجة، البرمجة اللي انت شايف نفسك كويس فيها دي ولا حاجة، فيه بيزنس وفيه حاجات كتير ورا البرمجة، إنت مشفتش العميل كان بيتكلم في التليفون ازاي، أنا مرضتش أسمعك الشتيمة اللي كان يقوللها، يعني الموضوع مش برمجة وبس. إنت جاي في بيئة فيري بروفيشونال، (Very Professional)، لازم تتعلموا، لازم تصبروا حتى لو شهر.

فيه شركات هنا بتأخر المرتبات شهر واثنين وثلاثة، واللي مش عاجبه خلاص اتفضل امشي، لكن أنا بوقف مرتبي عشان الناس تاخد مرتباتها، ودا مبيحصلش في أي شركة، انت خدت مرتبك، اصبر شوية يا أخي، مش كل ساعة، يا ديناء، يا ديناء، يا ديناء، هدي شوية إنت وهريدي عشان أسلوبكم دا مش عاجبني يا طارق.

هاااار اسود يا ولاد، الراجل مش قايللي خد الفلوس من ديناء، ودينا كانت بتقول نسيت أعدي على الصراف، دلوقتي تقولله طارق بيقوللي كل ساعة هاتي الفلوس، اااه يا مفترية، روجي يا شيخة إلهي صراف آلي يفرمك زي مكنة فرم الفلوس كدا.

دا انا بقيت عميل، وخاين وأسلوبي وحش ومش مقدر ظروف الشركة وعمال أطلب في الفلوس، بجد إخص عليك يا طارق بجد، يا قاسي يا مفتري.



بعد ما كان أسلوب هريدي بس اللي مش عاجب المدير، دلوقتي أسلوب طارق وهريدي، بعد ما كان طارق ثبت نفسه في الشغل وكويس وهيكمل معانا، بقي وحش دلوقتي والبرمجة دي ولا حاجة.

دا دينا دي مش تعبان، دي حرباية، حرباية إيه، دي خلية حراي بتنتج سم فتاك وقالت، دا إبليس ميعرفش يعمل كل دا لوحده.

لكن أنا كعادتي لما يكون اللي بيكلمني متعصب أو غضبان، بخليه يفرغ طاقته خالص ويهدى وبعد كذا احاول اتفاهم معاه، لأن لو كل واحد رفع صوته، مفيش مشكلة هتتحل، دا غير إن دا مديري، مش بس كدا، لا دا انا نازل مصر خلاص، يعني عاوز أسيب حاجة من ريحتي في دبي عشان أرجعلها تاني 😊.

بس طبقاً الكلام اللي قاله دا مينفعش يتسكت عليه، ويردوا مينفعش يترد عليه بنفس الأسلوب وخصوصاً في الوقت الحالي، لازم أكون في موقف قوة، فقلت بتسجيل المكالمات كشاهد إثبات وللذكرى وللزمن لأن أكيد هيجي الوقت اللي هيحصل فيه تصفية حسابات وهيقي الحساب عسير، عسير قوي.

أي مدير أو صاحب شركة مهما يكون راضي على الموظف، لكن ساعة الفلوس، لازم يشوهلك الأداء ويقلل من قيمة الموظف بأي طريقة أو بأي شكل.

يعني مثلاً المبرمج، لو هو جديد وفرش، هيقولله أهم حاجة الخبرة لو خبرة هيقولله أهم حاجة الشغل ويكون صبح من أول مرة.

## يوميات مُغترب

لو صح من أول مرة هيقولله أهم حاجة البيزنس..  
لو بنزس... هيقولله أهم حاجة إنك تدخل فلوس للشركة.  
لو دخل فلوس للشركة هيقولله أهم حاجة مسمعش صوتك ☺.  
المهم هيلاقى سبب يحسس بيه الموظف إنه ولا حاجة.  
إلا من رحم ربي، مش كل الناس كدا.  
فيه أماكن تحب تشتغل فيها، بيبقي عايز يطلع قدراتك فيشجعك  
ويزودك، ويدلعك كمان لو عاوز تدلع.  
اللهم ارزقنا بمدير يدلعنا، قولوا آميين ☺.

موضوع التذكرة في الأساس ملوش دعوة بطريقة الشغل أو العملاء،  
لكن هو داخل كله مع بعضه، أنا حاولت أوضح للمدير إني بريء من كل  
هذه التهم المنسوبة إلي، وإني معرفش إن مفيش فلوس، وإنها كانت بتقوللي  
نسيت أعدي على الصراف وأنا ميهمنيش لو أخرت مرتبي شهر أو اتنين  
أو ثلاثة لو أنا موجود في دبي، لكن عشان أنا نازل مصر فكنت عاوز آخذ  
فلوس معايا.

فكان رد المدير، قوللي صراحة هو انت مفلس في مصر، إنتو مفلسين  
ممعكوش فلوس في مصر؟ إنت مخذتش مرتب شهر مش هيكفيك تنزل  
مصر؟

سؤال نزل عليا كالصاعقة، وانت مال..... (النقط دي كلام مقصود  
من الرقابة مش مني)، إنت مال...، هو أنا بشحت منك، دي فلوس، قتلته،





## هذا ما رأيت في دبي

أنا ببني شقتي في مصر ومحتاج الفلوس دي، ودينا مقلتش إن مفيش فلوس،  
قالت بنسى!!

رد عليا وقال، إنت عارف دينا قالت كدا ليه؟ كانت بتقوللك كدا عشان  
مكسوفة تقوللك مفيش فلوس.

يا كميلة، مكسوفة ياختي، وانت هتجيبني فلوس من جيبك، دي شركة،  
يعني لو قلتي استني لما المدير ييجي كان الموضوع خلص، لكن زي ما قلنا  
قبل كدا، إنها النية المبيتة، للانتقام، من ساعة موضوع تذكرة عمان واللي  
اتخصمت منها.

المكاملة كاملة على هذا الرابط:

<http://www.youtube.com/watch?v=SNT0A9reuf8>

بعد انتهاء المكاملة الطويلة الرخمة، نظرت إلى هريدي، وكان يراقبني في  
تلهف ليعرف ماذا حدث، فقد لاحظ تغير تعبيرات ولسون وجهي مرات  
عديدة، من الأبيض. مش ابيض قوي يعني. إلى الأحمر، إلى الأسود، إلى  
الأزرق، إلى الفوحلقي.

لكنه عندما رأى وجهي قد تلون بالفوحلقي علم أن اسمه قد ذكر في  
الموضوع فظل يشاهد في صمت وكأنه يشاهد حلقة لمصارعة المحترفين، بين  
أندر تيكرو وأندر طارق ☺.

قلت لهريدي، شغللنا أغنية كل ظالم يا حبيبي وله نهاية والمدير بتاعنا ظالم  
من البداية للنهاية وهاتلنا 2 بريل، عشان يغطي على المرالي إحنا بندوقه،  
واتحمد نام بقى عشان أنا زهقت منك.



## يوميات مغترب

تاني يوم، الخميس المدير جيه الشغل، وسلم علينا وبيضحك ويهزر  
وكان مفيش حاجة حصلت، كان هدي بقي، ومفعول النفخ والتسخين كان  
خلص واتفرغ.

إداني فلوس التذكرة، وقاللي متزعش، أنا كنت بس بتناقش معاك، قتلته  
أوك بنفس مسدودة، وفي سري قلت يا جبروتك يا أخي، تقتل القتل وتأخذ  
العزاء فيه، اصبر عليا بس، هردهالك، مش هنسهاالك، كل غلطة غلطها بوقك  
يوم في حقي، كل جرح وكل دمعة بكاهها هريدي، هردهالك، مش هنسهاالك،  
خد براجمك، سيديهاك، خد دينا ورااك، وإديني فلوسي اللي اتظلمت في  
الشغل معاك، فنان يا واد يا طارق، بس مش لاقى اللي يكتشفك.

كلامك يا مديرنا محفوظ، والتسجيل موجود وهسلم السي دي لمرضى  
منصور لما أنزل مصر.

يوم الخميس كان يوم ملىان، سلمت كل الشغل لهريدي وقعدت مع  
المدير عشان آخذ التاسكات اللي هشتغل فيها وأنا في مصر، والوضع مش  
هيفتلف كثير بالنسبة للمدير، المفروض إني رايح أسبوع، يعني كأنه في  
عمان، واتفقنا إني هكون أونلين طول الوقت عشان لو فيه حاجة وقفت مع  
هريدي أحلها على طول.

يوم الجمعة، اتقابلنا ومقعدناش كثير في المكتب، كانوا بيضططولي فح،  
بيعملوا عقد حقوق ملكية الشركة عشان أمضي عليه، عشان مستعملش أي  
برامج للشركة بدون إذن، قال يعني.

المهم المدير البروفيشونال كان جايب عقد لشركة IBM وبيعدل فيه، يشيل



## هَذَا مَا رَأَيْتُ فِي دَلِي

اسم شركة IBM ويحط اسم شركته وإدهولي عشان أمضي، بصيت عليه في السريع، لقيت كلمة IBM متكررة أكثر من مرة، قل بس، دا كدا عقد لاغي نفسه، رحت ماضي عليه على طول، وخذت نسخة معايا عشان أبقي أقرأها.

وحانت لحظة الصفر، ودعت كل الموجودين، هريدي وسامح، والحرباية، قصدي ديناً، وتحركت من الشركة في رفقة المدير، عشان هيوصلني للمطار. السواق بتاعي، تعبني خالص يا جماعة، أوووف، بس هعمل إيه مضطر أستحملة، أصله مديري في الشركة ☺.

وصلني لحد باب المطار وحضني وقاللي مستنينك ارجعلنا بسرعة، قلت إن شاء الله ربنا يسهل.

أثر فيا جامد الموقف دا، حسيت في حضنه بحنان مرات الأب كدا ☺. دخلت المطار، وخلصت إجراءات الدخول ودفعت غرامة التأخير كانت 1900 درهم وبعدين رحت على صالة كبار الزوار، قصدي صالة الانتظار ☺ وقعدت وشغلت اللاب توب ونت ويرلس فري بقى، وشيكيت على الميل، قال يعني الواد مهم، وبعدين اتصلت على وليد صاحبي، سألته إن كان عايز حاجة من مصر عشان مجبهاش معايا، أنا يدوبك هجيب حاجاتي.

وركبت الطائرة ومستني بقى حاجة حلوة كدا تقعد جنبني زي الأفلام، يعني شاب في مقتبل العمر، أعزب، يبحث عن عروسة، تعالي بقى يا عروسة.

طبعاً فيه ناس هتيجي في بالها عمارة يعقوبيان ومضيفة الطيران، لالا لا عيب، أنا مش زي عادل إمام، أنا عاوز عروسة، مع العلم أنه لا غنى عن مضيفة الطيران أثناء الرحلة الجوية ونكن لهم كل احترام وتقدير.

## يوميات مغترب

فاكرين فيلم فرح، البت الصغيرة بتاعة الملجأ، اللي كانت بتغني «إحنا الجيل الصبح الفلته، أجيال الألفية الثالثة»، فاكرين لما هربت ورجعت الملجأ وراح رجل الأعمال عشان يجيها، فاكرين مديرة الملجأ اللي كانت بتسمع فيلم. محسب. لرشدي أباطة، أختها في الرضاعة جت ركبت جنبي.

والمشكلة إني مقعدتش على الحرف، عشان اعرف اهرب، أنا قعدت جنب الشباك، فلما قعدت، لقيت وشي لزق في شباك الطائرة ومبقتش عارف أفلفص، ولا عارف أحرك راسي، بقيت طول الطريق باصص للشباك، وبعد ما كنت بقول يارب عروسة حلوة تيجي تقعد جنبي، فضلت أقول مش عاوز أتجوز، مش عاوز أتجوز، مش عاوز أتجوز، مش عاوز أتجوز.

وعلى صعيد آخر، ومن زاوية أخرى، مكنش فيه حد من أهلي يعرف إني نازل، كنت عملها مفاجأة، لكن هريدي دمر المفاجأة بطريقة أصابت أهلي بالهلع، وظنوا أن مكروهاً أصاب فلذة كبدهم

يا ترى هريدي عمل إيه؟؟؟


ويا ترى تأثير المفاجأة اللي اصبحت صدمة على والدي هيبقى إزاي

وعلي والدي هيبقى إزاي؟

دا اللي هنشوفه في المقال القادم إن شاء الله.



هكذا ما رأيت في دبي



## بيان رئيس المدونة

كتبت هذا المقال بعد تأخر في كتابة المقالات ومطالبة الكثير من المتابعين  
بسرعة كتابة مقال جديد



أيها الإخوة المواطنون....

أتحدث إليكم في ظرف دقيق يفرض علينا جميعًا وقفة جادة وصادقة مع  
النفس تتوخى سلامة القصد وصالح المدونة.

## يوميات مُغترب

لقد تابعت أولاً بأول التظاهرات وما نادى به وما دعت إليه من عدم التأخر في كتابة المقالات..

كانت تعليماتي واضحة تشدد على إتاحة الفرصة أمام الفائز للتعبير عن آرائهم ومطالبهم.

ثم تابعت محاولات البعض لاعتلاء موجة تلك التظاهرات والمتاجرة بشعاراتها وأسفت كل الأسف من كثرة إعلانات مهندس اتصالات الذي اخترق الشبكات وبيوزع كوبونات.

إنني كرئيس للمدونة وبمقتضى الصلاحيات التي خوّلهالي الدستور الفيس بوكي كحكم بين السلطات أكدت مراراً وسوف أظل أن السيادة للشعب وسوف أتمسك دائماً بحقه في ممارسة حرية التعبير مادام قد تم في إطار الشرعية واحترام القانون.

لقد قمت بإلغاء كافة الإعلانات الخاصة بمهندس الشبكات دون اللجوء إلى إسقاط عضوية أصحابها. لفئة إنسانية من اللفتات بتاعتي).

أيها الإخوة المواطنون...

إنني لا أتحدث إليكم اليوم كرئيس للمدونة فحسب وإنما كمصري شاءت الأقدار أن يتحمل مسئولية هذه المدونة وأن يمضي وقته من أجلها وأجل زيادة أعضائها.

لقد اجتزنا معاً من قبل أوقاتاً صعبة، وأوقاتاً مريحة، ولم نفرق أبداً، ولم ينسحب منا أحد.

وأقول بكل الصدق.. وبصرف النظر عن الظرف الراهن.. إنني لم أكن أنوي التأخر في كتابة المقالات.



فقد قضيت ما يكفي من العمر في خدمة المدونة وأعضائها..  
لكنني الآن حريص كل الحرص على أن تعود المدونة لقوتها حتى تصبح  
عزيزة آمنة مستقرة.. وبها يحفظ الشرعية ويحترم الدستور.  
أقول بعبارات واضحة.. إنني سأعمل خلال الأشهر القادمة بكل جهد.  
كي يتم اتخاذ التدابير والإجراءات المحققة لكتابة المقالات بانتظام وبطريقة  
سلمية.. بموجب ما يخوله لي الدستور من صلاحيات.  
الإخوة المواطنون..

ستخرج المدونة من الظروف الراهنة.. أقوى مما كانت عليه قبلها.. وأكثر  
ثقة وتماسكاً واستقراراً.

إن طارق حسن الذي يتحدث إليكم اليوم.. يعتز بها قضاءه من سنين  
طويلة في خدمة المدونة وشعبها..


إن هذه المدونة العزيزة هي مدونتي مثلما هي مدونة كل مصري ومصرية..  
عربي وعربية... فيها عشت.. وحاربت من أجلها.... وسيحكم التاريخ علي  
وعلى غيري.. بما لنا أو علينا.

إن الكتابة باقية والأشخاص زائلون..

انتظروا المقال القادم إن شاء الله بعنوان «جاي في السريع».

حفظ الله هذه المدونة وشعبها.. وبارك فيهم وزودهم كمان وكمان

والسلام عليكم ورحمة الله وبركاته...



## جاي في السريع .. الجزء الأول

اتكلمنا في المقال السابق «المسافر» عن اللي عملته دينا معايا بخصوص التذكرة، واتصال المدير بيا بعد ما دينا سخته، واتكلمنا عن الورقة المعيبة اللي مضيتها قبل ما أسافر وإن المدير وصلني للمطار وقال لي متأخرش علينا، وطبعًا أنا التذكرة بتاعتي أسبوع، يعني الجمعة الجاية المفروض أكون في دبي ثاني. بطبيعتي أعشق النوم في المواصلات، عربية، ميكروياص، قطار، طائرة كله شغال، لو حتى عربية كارو هنام بردوو 😊.

الموضوع دامن صغري، أول ما اركب في عربية وتمشي، بنام على طول، أتذكر إني وأنا بتعلم السواقة في مصر، أول ما ركبت جنب السواق وهو بيشرح لي أسواق إزاي، نمت منه 😊.

ركبت الطائرة، وقرأت ورد من القرآن، وقررت الخلود إلى النوم حتى نصل إلى أرض المعمورة، طلبت وسادة وغطاء من المضيف وذهبت في سبات عميق إلى أن استيقظت على رائحة الطعام والتي كانت نفاذة للغاية، لأننا في رمضان والواحد وهو صائم بيشم رائحة الأكل من على بعد 5 كيلو 😊.



سألته المضيفة، حضرتك تحب إيه لحم ولا فراخ، بلعت ريقى كدا  
وقلتها أنا صااايسم، وقلت في بالي أكيد بيوزعوا عشان الأجانب أو اللي  
فاطرين عشان السفر، قالتلي ممكن تاخذ الوجبة معك إذا حببت، هي مغلفة،  
قالت لها إذا كان كذا ماشي، وأخذتها منها وقلت شكرا.

دي مصر للطيران، وجبة غداء أو عشاء محترمة، ولما يشغلوا فيلم يعطوك سماعات مجاناً، مش زي طيران الميكروباص، قصدي العربية، بيعنسوك بالأكل، المضيقة تعدي بالأكل كدا قدامك، وتكون رائحة الأكل نفاذة برديو عشان الواحد يجوع، ويمس إنه في صحراء مكة جوعان وعطشان ويقول أحدٌ أحد، أحدٌ أحد، ولو عاوز تاكل اشترى يا حلو، وبعد كدا يشغلوك فيلم ولو عاوز تسمع الصوت لازم تشتري السماعات يا تتفرج على فيلم من غير صوت.

لما كنت بسافر على طيران العربية، كنت باخذ ساندوتشات معايا وعصائر  
ولما يشغلوا فيلم، أول ما يعدّوا بالساعات قدامي، اروح مطلع الساعات  
بتاعتي ومشغلها، غيظة بقي 😊.

ذات مرة، والشنط بتفتش قبل متدخل صالة الانتظار، المفتش شال مني قزازة ماء وقزازة عصير كبيرة، وحطهم وراه في سلة كدا فيها حاجات كتيره متاخدة من ناس قبلي، خلите يفتش الي بعدي وروحت واخدهم من السلة وحططهم في شنطتي وماشي، هوأنا دافع فيهم فلوس عشان تاخدهم مني ولا إيه، بس لو كان مسكني كان ظبطني 😊.

وصلنا بحمد الله مطار القاهرة الدولي، وزى ما قلت في المقال السابق

## يوميات مُغترب

إني مقولتش لحد من أهلي إني نازل مصر، بس كنت متفق مع أعز أصدقائي المهندس سامي حسن عشان ينتظرنني في المطار.

لما خرجت من المطار لقيته مستنيني، سلامات وبوس وأحضان مصري أم الأجنبي.


أصلًا مفيش أحضان أجنبي، في مرة ركبت مع سواق باكستاني، وكان مضايق جدًا، فسألته أنت كويس. مصدق حد يسأله، قاللي كان راكب معايا سيدة أجنبية ومعها طفل صغير والطفل كان بيضحك ليا فحملته وبوسته، السيدة جن جنونها إلا لازم تسير على الشرطة وتقولي ليش تبوس ابني. هادا طفل، والأطفال أحباب الله، كيف تقولي هيك، أنا راجل عجوز، والراجل يا عيني كان هيك. قتلته معلش يا عم الحج، هما عقلهم كدا صغير وعييط، سيبك منهم، والله يخليك ركز في السواقة أنا عاوز أعيش 😊.

المهم، ركبت أنا وصديقي عربية للشرقية، وفي الطريق اتصلت بيه خطيبته وسألته إنت فين. قالها أنا كنت بجيب طارق من المطار ومعلش احتمال أوصل متأخر وبعدين ضحك بصوت عالي.

بعد ما خلص المكالمة سألته بتضحك ليه، قاللي أصل أنا المفروض أكون هناك دلوقتي الزيارة الأسبوعية، لأنني بروح الخميس، بس مسفرتش البلد إمبارح عشان أقابلك في المطار فلما قتلها إني كنت بجيب طارق من المطار قالت: «يادي طارق الي طلعلنا في علبة البخت».

قلت ياعم كنت رّوح، زمانها بتدعي عليا دلوقتي، دي الواحدة بتقعد تعد الأيام عشان زيارة خطيبها الأسبوعية تقوم تسيبها عشان طارق، إسألني أنا 😊.





وصلنا مدينة «أبو كبير» وقلت لصديقي تعالى بيت معايا انهاردة وروح  
بكرة الصبح، مرضيش وقال لا لازم أروح عشان أعدي على خطيبتني، قلت  
ماشني، الخوف حلو بردوو.

أخذت مواصلة للقرية بتاعتي وطول الطريق وأنا بتخيل في شكل أهلي  
أول ما أدخل عليهم ويشفوني، ابنهم في الإمارات ومكلمهم إمبارح عادي  
جدًا وموضوع إنهم يشوفوه لسه عليه بيعجي سنة ولا حاجة وفجأة يكون  
قدامهم، يااه موقف جامد 😊.

لكن هريدي. طويل العمر، يطول عمره ويزهزه عصره وينصره على  
من يعاديه هاي هي. ضيغ عليا كل الترتيب دا، واحد صاحبنا كان بيكلم  
هريدي على النت وسأله طارق عامل إيه، فهريدي قاله إن طارق نزل مصر  
إنهارده بعد صلاة الجمعة يعني زمانه وصل، فصاحبنا قال طب استني لما  
أتصل بيه، وراح ماسك تليفونه ومتصل على تليفوني لقيه مغلق، راح متصل  
على تليفون البيت الأرضي :

إبراهيم: آلو سلام عليكم، ممكن أكلم طارق.

والدتي: لا طارق مسافر، أنت مين؟

إبراهيم: هو لسه موصلش؟ أنا إبراهيم صاحبه.

والدتي: وصل منين، هو في الإمارات.

إبراهيم: خلاص يا حاجة، يمكن فيه سوء تفاهم، سلام عليكم

والدتي: آلو... آلو..



## يوميات مُغترب

إبراهيم صاحبي حس إن فيه حاجة غلط، راح مقفل المكاملة وهرب.  
طبعا والدتي قلقت من الكلام، واحد صاحب طارق يسأل عليه، مهولو  
صاحبه يبقي أكيد عارف إنه مسافر، وكمان بيقول هو لسه موصلش، وصل  
منين، وسوء تفاهم إيه هو فيه إيه؟

والدتي متعودة ترن عليا كتير، ومن الصبح وهي بترن وكل مرة بترد  
عليها السكرتيرة بتاعتي وتقولها: الهاتف المتحرك الذي طلبته مغلق، يرجى  
الاتصال لاحقًا، شكرًا.

قبل مكاملة صاحبي، كانت ممكن تفكر إن موبيلي فصل شحن، أو أنا  
نايم، بس بعد المكاملة دي، أكيد فيه حاجة.

والدتي من النوع اللي بيقلق بسرعة، يعني لما كنت بشتغل في القاهرة  
وأتاخر في المواصلات شوية آخر الأسبوع، كانت كل شوية تتصل بيا، إنت  
فين، وصلت فين، ابعتلك عربية تجيبك. فما بالكم في الغربية بقى.

بدأ عقلها يودي ويحيب، والهواجس تزيد، إبنى حصله حاجة، طارق  
حصله حاجة، اتصلوا على طارق، الموبيل مغلق، أول مرة موبيله يبقى مغلق  
الوقت دا كله، وصاحبه بيتصل يسأل هو وصل ولا لا، أكيد طارق حصله  
حاجة، أنا قلبي مقبوض، أستريارب، جيب العواقب سليمة يارب.

إخواتي بدءوا يهدوا فيها، عشان الضغط ميعلاش عليها، إهدي يا ماما،  
شكله نايم، أو الموبيل فاصل شحن، إنهاردة الجمعة.

وهي ماسكه الموبيل، وكل شوية ترن عليا، ويردو نفس الرد في كل مرة  
«الهاتف المتحرك الذي طلبته مغلق، يرجى الاتصال لاحقًا، شكرًا»





«الهاتف المتحرك الذي طلبته مغلق، يرجى الاتصال لاحقًا، شكرًا»

«الهاتف المتحرك الذي طلبته مغلق، يرجى الاتصال لاحقًا، شكرًا»

«الهاتف المتحرك الذي طلبته مغلق، يرجى الاتصال لاحقًا، شكرًا»

ومر الوقت بطيئًا جدًا على والدتي المسكينة. الله يبارك لي فيها. وهي تنتظر أن تسمع أي شيء يريح قلبها، وتدعو الله ألا يصيبه مكروه، وربما دار بخلدها أن ابنها، فلذة كبدها، قد أصابه مكروه، فحوادث المغترين كثيرة، فهذا شاب من القرية، ذهب ليعمل في قطر وعاد محمولًا على الأكتاف، وهذا مهندس معماري ذهب ليعمل في السعودية، وعاد بعد حادثة مروعة على كرسي متحرك، والحوادث كثيرة.

لم أكن أعلم أن هذا كله سيحدث، كان هريدي يعلم جيدًا أنني لم أخبر أحدًا عن رجوعي لمصر، وكان عليه ألا يخبر أحدًا حتى أصل إلى منزلي وأخبر أنا بنفسني أصدقائي، خطأ بسيط، سبب الكثير من المتاعب، تحدثت مع هريدي بعدها وألقيت عليه وابلاً من اللوم، تأسف بعدها وقال إنه لم يكن يقصد كل هذا، وانتهى الموقف.

وصلت إلى المنزل في حدود العاشرة مساءً وكان أول من رآني هو ابن أخي، وما إن رآني حتى ملأ الدنيا ضجيجًا «أونكل طارق جيه..... أونكل طارق جيه..... هيه هيه... أونكل طارق جيه... أونكل طارق.... هيه هيه..... أونكل طارق جيه..... أونكل طارق جيه، وأخذ يجري حتى دخل المنزل وصاح في الجميع، والله العظيم أونكل طارق جيه، أونكل طارق جيه»

كنت واقفًا مع أبي، كان بالخارج يرش المياه من خرطوم بيده أمام منزلي

## يوميات مُغترب

الجديد والذي لم ينته بناؤه بعد. وما إن رأني حتى ألقى الخرطوم من يده واحتضنني وقبلته ثم سألني «إيه اللي حصل أنت جاي ليه» فأجبتته مسرعاً «وحشتوني فجيت اسلم عليكو وراجع تاني».

وما إن سمعت والدتي ضجيج ابن أخي ورأت الفرحة على وجهه وهو يقسم بأن أونكل طارق جيه. حتى دبت الحياة فيها من جديد، بعد أن كانت شاردة الذهن وجاءت مسرعة إلى خارج المنزل واختطففتني من وسط الجميع بحضنها الدافئ الذي أحس فيه دائماً وكأنني طفل صغير، لم تسألني عن أي شيء، فقط أحضان وقبلات ممزوجة بدموع الفرحة لعودة ابنها سليماً إليها. منذ لحظات كانت تتوق لتسمع أي شيء عنه وها هو الآن بين ذراعيها، يا لها من فرحة، لا يستشعرها إلا الأمهات. حتى حد يشغللنا أغنية. الست دي أمي. أصل الواحد إتأثر وقلب عاطفي ☺.

نظرت والدتي إلى وجهي وجسمي ثم قالت: «يابني يا حبيبي إنت خاسس كدا ليه، يلعن السفر وسنينه، يا حبيبي وجهك أصفر كدا ليه، أنت مكتتش بتاكل ولا إيه، مش قلتك اهتم بنفسك يا طارق».

بصيت لنفسي والدمعة كانت هتفر من عنيا، أصل أنا حساس قوي ☺، وقلت لوالدتي: يا حاجة دا رجيم، بحافظ على رشاقتي ☺، فعلاً أنا كنت خاسس جدّاً، بس هنعمل إيه غصب عنا بقى.

دخلنا البيت وغيرت ملابسي وما هي إلا دقائق حتى حضر العشاء وبه ما لذ وطاب من الطعام، لي أنا وحدي، فالكل قد أنهى الفطار.

ولكن أنى لي بهذا العشاء وقد تقلصت معدتي ولم تعد تقبل إلا لقيحات



قليلة، فكيف بمعدة تعودت على الزبادي والصوم بدون سحور أن تقبل بالمحمر والمشمر، بالله عليكم كيف، كيف، كيف. موسيقى حزينة و3 دمعات مزيفة ☺.

وما إن قمت من على الصينية (السفرة اللي مش عارف الصينية) حتى نادى أمي: وادي طارق. أنت بتستهبل. فين اللي أكلته، الأكل زي ما هو ا.

• طارق: والله يا حاجة شبعنا الحمد لله، مش بقولك عامل رجيم وبعدين أنا فطرت في الطريق، كنت واخذ أكل من الطيارة.

• أمي: بألف هنا وشفنا يا حبيبي، مطرح ما يسري يمري.

ثم جاءني صوت أبي مرة أخرى، خير يا طارق، إيه اللي حصل.

أمي: خير إيه يا حسن، ما تسبب الواد يستريح شويه.

عندما رأي أبي خارج المنزل وهو يرش الماء وسألني «إيه اللي حصل انت جاي ليه»، كان سؤالاً كالصاعقة، تخيلت لو أن إجابتي كانت «أصلي سبت الشغل».

تخيلت لو أنني بالفعل عائد من الإمارات نهائياً، تخيلت لو وافقت على كلام هريدي وسامح وتركنا جميعاً الشركة وعدنا إلى مصر، تخيلت نظرات الفشل في عيون أبي وأمي.

كان هناك شيء يدور في خاطر والدي، كما قلت مسبقاً بأن منزلي تحت الإنشاء وهناك اعتماد مباشر على الفلوس اللي بيعتها، يعني فيه التزامات، وعمال يشتغلوا، فتزولي المفاجئ هيبوظ الحاجات دي كلها.

## يوميات مُغترب

نعم، شتان ما بين ردة فعل أبي وأمي ولكني أقدر الموقف جيدًا، فدائمًا ما ترتبط ردود أفعال الأمهات بالعاطفة، تتمنى الأم دائمًا أن يكون ابنها قريبًا منها، تخاف عليه من «شكة الدبوس»، تسأل دائمًا: ماذا أكلت، ماذا فعلت، بتتغطى كويس، مرتاح في الشغل.... إلخ.

أما الأب فيهتم دائمًا بمستقبل ابنه من الناحية العملية، دائمًا ما يتمنى أن يرى ابنه ينتقل من نجاح إلى آخر ولا يجب أن يرى أبدًا الفشل يقترب منه، يعينه على الصبر والمحاولة، لا يجب أن يرى ابنه عاطلاً أو منهزماً أو مكسورًا، يجب أن يراه يحيا حياة كريمة حتى ولو أفضل منه.

إنها معادلة مليئة بالحب، بين الأب والأم، معادلة من صنع الخالق عز وجل، لو كل واحد فكر في أي أب وأم هيلقي المعادلة دي، الأب يهتم بأشياء والأم تهتم بأشياء أخرى ليكمل بعضهم البعض، فلو كان الأب هو من يشد على أطفاله ستجد الأم هي من ترخي والعكس، لو كان الأب هو من يعاقب الأبناء على الأخطاء، ستجد الأم هي من تدافع وتطبطب وتقول: معلش «والعكس» لو كان الأب يضرب أبناءه عندما يخطئون، ستجد الأم تحتضنهم عندما يكون، والعكس.

بالنسبة لي، في حياتي كلها لا أتذكر أن أبي ضربني ولو لمرة واحدة، ولكن أتذكر الكثير لأمي، ياما ضربتني لما أغلط أو مسمعش كلامها وخصوصًا لما تقولي متلعبش «بلي» وتوسخ هدومك، وكنت بحتال على الموقف دا وأنا صغير، لو والدتي جاية تضربني تلاقيني دخلت في الصلاة، حتى لو مش متوضي، الله أكبر، وأفضل أصلي أصلي، وهي مستنياني أخلص الصلاة



## هَذَا مَا رَأَيْتَ فِي دَلِي

والصلاة مبتخلصش لحد ما أحس إنها هديت والغضب راح خالص، أروح مخلص الصلاة، وأفلت من العقاب 😊.

المهم، نرجع تاني عشان روحنا بعيد قوي، شرحت لأهلي سبب رجوعي، عشان الزيارة بتاعتي خلصت والمدير هيقدملي على الإقامة وهرجع بعد أسبوع إن شاء الله.


كان رد أبي: ماشي يا بني، ربنا يوفقك ويسهلك أمرك.

وكان رد أمي: أسبوع واحد، يعني مش هتعيد معانا، دالسه على العيد 10 أيام، إيه المدير ابن ال..... دا.

مش قتللكو، إنها معادلة الحب 😊.

انتظروا المقال القادم قريبًا إن شاء الله، ونظرات وكلام الجيران عن عودتي وفاصل كوميدي مع رحلة البحث عن عروسة في أسبوع. جاي في السريع الجزء الثاني 😊.





## جاي في السريع .. الجزء الثاني

بعد العشاء، والدردشة مع أهلي، قلت لأمي هروح أسلم على أختي، بيتهم ببعد عن بيتنا حوالي 100 متر، وكنت جايب هدية لابنها الصغير، كان عمره 4 شهور، رحت أنا وأخويا أحمد، أصغر مني بثلاث سنوات.

أنا وقفت برة على جنب، وأحمد خبط على الباب وبعد ما دخل، ساب الباب مفتوح عشان أنا أدخل بعد شويه.

قال لأختي، طارق باعت الهدية دي لابنك محمد، قالت بجد. وريني كدا. بعتها إمتى. وبعتها مع مين.

راح سوبر مان (طارق). داخل من الباب، وقال بعتها معايا انا، الهدية وقعت من إيد أختي واتصدمت وقعدت تبصلي وتقول أنت طارق. أنت طارق أخويا بجد. انت....؟ مش كنت....؟ هو أنت انت....؟

كان موقفًا لذيذًا جدًا، وكل ما نتكلم شويه، ترجع تسألني تاني. بجد أنت طارق. طب إيه الي حصل، إيه الي خلاك تنزل مصر بسرعة كدا؟ قلت تاني، هو أنا كل ما أشوف حد يحكيه أنا نزلت ليه.





## هَذَا مَا رَأَيْتَ فِي دِيبِي

يا ستي أنا نازل أسبوع عشان الفيزا بتاعتي واحتمال أحضر العيد هنا أو  
أسافر قبل العيد، ادعيلي بقى إن أعيد معاكو.

تاني يوم وفي قاعدة عائلية بعد العصرية، قالت أختي: ما دام أنت موجود  
في مصر، يبقى لازم نشوفلك عروسة، لازم تخطب عشان لما تسافر وتنزل  
المرّة الجاية إن شاء الله، تتجوز بقى وتستقر ولا أنت عاوز تفضل كدا.

قلت لالا لالا متفتّحيش عنيا على الحاجات دي، أنا مكسوف، متضغطيش  
عليها، لا لا 😊.

قالت لا والله. هتصيع ياد. الله يرحم أيام الإعدادية والجوابات الغرامية،  
فاكر الناظر لما مسك الجواب الغرامي بتاعك، وقالك روح جيب ولي أمرك  
ولا الثانوية العامة والدروس الخصوصية، ولا الكلية والمدينة الجامعية !!  
يا عم المكسوف، إن كنت ناسي أفكرك.

هااار اسووود، بس بس، انت لسه فاكدة الحاجات دي؟ هتفضحيننا، دا  
كان طيش شباب، كنت لسه إتناشر سنة 😊.

قالت: أنت هتقولي، من الآخر نشوفلك عروسة ولا حاطط عينك على حد.  
بصيت في الأرض وقلت: اللي تشوفيه يا أختي، أنا مقدرش أرفضك  
طلب، بس أنا معرفش حد في البلد، قالتلي أمال إحنا رحنا فين، عندك بنت  
كذا وبنت كذا وبنت كذا وبنت كذا.

قلت: ولا أعرف أي واحدة فيهم. أنا آخر بنات فاكر شكلهم في البلد،  
البنات اللي كانوا معاييا في المدرسة وأكيد معظمهم متزوج وعنده عيال  
دلوقتي.



التجربة الأولى:

أختي: طيب خلاص نبدأ بينت الحج (...)، دي في تالته كلية

أنا: هي حلوة. حلوة يا أحمد؟

أحمد أخويا قال: يعني.

قلت: يعني. يبقى مش حلوة، مليش دعوة مش عاوز.

أختي: والله بنت حلوة وزى العسل، أخوك بيضحك عليك.

قلت: أحمد، حلوة ولا مش حلوة.

أحمد: حلوة، بس يعني، مش قوي.

قلت: وله قوم من هنا، يلا حد يتصل، اتصلي يا ماما.

أمي: طيب هاتلوا دليل التليفونات وشوفوا رقم الحاج (...).

آلووو، سلام عليكم

عليكم السلام، مين معايا؟

أنا (أم طارق) أم البشمهندس طارق أبو حسن، ابن الحاج حسن

أبو عبدالعال (قال يعني الواد معروف قوي).

أهلا وسهلاً، أي خدمة يا حاجة؟

مش حضرتك الحاجة (...).

آه ياختي، خير

الموضوع إننا عاوزين نطلب إيد ببتكم (أ.م.ع) لابننا طارق، هو شغال

## هَذَا مَا رَأَيْتَ فِي دَلِي

في الإمارات ولسه جاي من السفر إمبراح ومسافر بعد أسبوع، فكنا عاوزين نعرف رأيكو عشان لو فيه نصيب، نقرأ الفاتحة أو نعمل خطوبة قبل ما يسافر. والله يا حاجة مش عارفه أقولك إيه، بس أنا هكلم أبوها وإخواتها وهنرد عليكو بكرة إن شاء الله.

يعني أتصل عليكو الساعة كام كدا؟

يعني، بكرة بعد العصر إن شاء الله.

أول ما الحاجة قفلت المكالمة، حصل هجوم مفاجئ.

أنا: إيه يا حاجة، إنتي خدتيها مرة واحدة كدا، جاي امبارح ومسافر بعد أسبوع ونقرأ فاتحة أو خطوبة، هو سلق بيض. أكيد هيرفضوا طبعًا.

أمي: يرفضوا. ليه يعني. هما يطولوا، دي كانت طيارة من الفرع.

أنا: وشوفتيها وهي بطير، والله شكلهم هيرفضوا.

أختي: آه ياماما مكنش لازم تقولي دا كله، انت كتي تسألهم وبس مكنش لازم تقولي مسافر بعد أسبوع، كدا هيخافوا.

أحمد: مبروك ياريس مبرووووك.

أنا: أنا مش قتللك قوم من هنا ياد، إنت نحس أصلاً.

تاني يوم، وبعد صلاة العصر، الحاجة اتصلت،

آلو سلام عليكم، معاكي أم طارق

أهلا يام طارق

خير ياختي، كلمتي الحج (...)



هَذَا مَا رَأَيْتَ فِي دَيْي

أختي: آه متأكده

أنا: حلوة.

أختي: جميلة ومؤدبة وبتمشي وجهها في الأرض.

أنا: ع البركة، اتصلي أنت المرادي.

أختي اتصلت على أختها

آلو، سلام عليكم

وعليكم السلام، مين معايا.

إزيك يا (...) أنا (..)

إزيك عاملة إيه، وكلام كتير بتاع بنات ييجي نص ساعة كدا، وفي آخر 3 دقائق:

بصي، أخويا طارق لسه جاي من الإمارات إمبراح، جاي أجازة ويفكر يخطب ومش هنلاقي أحسن من أختك (...) عشان نتقدم ليها.

أنا أسفة بس والله فيه ظروف دلوقتي ومش هينفع نفتح موضوع زي دا خالص وهي أساسًا رافضة أي موضوع خطوبة لأنها بتذاكر للماجستير.

طيب متحاولي معاها كدا وأنت مش تاييه عن طارق يعني وأخلاقه، دا نسمة بتمشي ع الأرض. من عندي الحتة دي مش في الحوار بس برفع من روحي المعدنية 😊.

صدقيني مش هينفع، فيه ظروف خاصة في البيت منقدرش نتكلم في حاجة زي دي، أنا أسفة.





وانتهت التجربة الثالثة بالفشل.

حسيت إني عامل زي ماجد الكدواني في فيلم. جاي في السريع. عاوز  
يجوز واحدة ويرجع في أسبوع، بس في الآخر الشغل ضاع منه، يا نهار أبيض،  
بلا عروسة بلا بتاع.

قلت لأهلي: بصوا يا جماعة، من الآخر أنا مش عاوز أخطب ولا أجوز، أنا جاي أسبوع، أرتاح فيه، وأقعد معاكم، أنتوا نسيتموا إننا في رمضان، خطوبة إيه وجواز إيه، اتقوا ربنا، حرام عليكم، حرام عليكم.

أختي الصغيرة قطعت كلامي وقالت: إيه دا، انتوا ناسيين بنت الحج (...)، إلى عنينا خضرة، وفي الأزهر دأ ما شاء الله عليها بتدي دروس تحفيظ قرآن للأطفال في المسجد.

أمي: دي أبوها صاحبك يا طارق، ويحبك قوي، وكان دايماً يسأل عليك.

أنا: شعري وقف، وعنيا زغللت كدا، بنت في الأزهر، وبتدي دروس  
تحفيظ، وعنيها خضرة، صُبرت ونُلّت يا واديا طارق، الحج (...)، دا حبيبي  
من زمان قوي، لما اتصل بيه، هاتولى رقمه بسرررررررررررعة.

## يوميات مُغترب

التجربة الرابعة:

آلو، السلام عليكم، الحج (... ) موجود

لأ، مين حضرتك؟

لما ييجي قوليله البشمهندس طارق كان عاوزك ضروري.

حاضر

سلام عليكم

قالتلي حاضر، شكلها هي، صوتها حلو، أحمدك يارب.

طبعا قاعد حاطط التليفون جنبي، أستني حد يتصل بيا، مفيش، المفروض

يكون وصل البيت، المغرب قرب يأذن، أكيد روح عشان يفطر يعني.

بعد المغرب، قلت مش بدها بقي، أتصل بيه قبل ما يروح هنا ولا هنا

آلو، سلام عليكم، الحج (... ) موجود.

أيوه، لحظة واحدة

آلو، السلام عليكم

وعليكم السلام، إزيك يا حج (... ) معاك طارق أبو حسن

يا مرحب يا بشمهندس.

يا مرحب بيك، كنت عايز أكرم معاك شوية، ينفع أعدي عليك دلوقتي

قبل صلاة العشاء؟

يا مرحب تشرف.



## هَذَا مَا رَأَيْتَ فِي دَلِي

طيب أنا جايك دلوقتي، سلام عليكم.  
رحتلہ على البيت ومش عارف هقول إيه، مكسووووووووف.  
قعدنا، وجاب الشاي، اتفضل يا باشمهندس.  
يا نهار ابيض، أنا مبشر بش الشاي أصلاً، إلا نادرًا، بس شربته غصب.  
المهم، أنا كنت مسافر الإمارات ونزلت أسبوع كدا عشان تغير الفيزا  
بتاعتي وكنت عايز أنا سبك.

راح شادد شفقة قوية من الشاي وخط الكوبايه وأنا قلبي بيدق، وإيدي  
بترجف كأني في امتحان ثانوية عامة.

قال أنا عندي بنتين، الكبيرة (...) في تانية كلية والصغيرة (...) في 3  
ثانوي، والحقيقة الكبيرة الشيخ (...) جيه واتقدم ليها وهي رفضت، فبعت  
لينا أكثر من واحد من أهل الخير يكلمنا وأنا دخلت كلمتها وقتلتها إن  
دا راجل دين وربنا كارمه وهي حافظ عليكى و....و.... لحد ما اقتنعت،  
وبعتناهم إننا موافقين ولسه مردوش علينا، والصغيرة مش مخطوبة.

فأنت كنت جاي قصدك مين؟

قلت أنا قصدي الكبيرة، لأني عاوز أخطب سنة أو بالكثير سنتين وبعدين  
أتزوج.

قال والله يا بشمهندس أنت أحسن نسب، ولو بإيدي أنا يشرفني أنا سبك،  
بس أنا قتلهم إننا موافقين، والأمر في أيدهم دلوقتي مش في إيدي، وأنت  
سيد العارفين، لا يخطب أحدكم على خطبة أخيه، لكن لو محصلش نصيب،  
فأنا يسعدني ويشرفني إني أنا سبك.



## هذا ما رأيت في دلي

أنا بقيت عامل زي يونس شلبي وأحمد بدير في مسلسل مطلوب عروسة،  
عمالين يدوروا على عروسة وكل ما يلاقوا واحدة، يطلع فيه مشكلة.

أمي: يا بني يا حبيبي، إحنا كنا عاوزين تستقر.

أنا: يا حاجة وأنت شايفاني عامل أظير في الهوا، منا قاعد أهو، لما أظبط  
شغلي وارجع نبقي نشوف.  
وفشلت التجربة الرابعة.

### رؤية وتحليل:

الواحد يا خويا يلاقي البنات قدامه كتير أوي وأول ما ينوي يخطب أو  
يتزوج، يلاقيهم اتبخروا، اللي لسة مخلصتش، اللي مين متكلم عليها، اللي  
بتحب واحد وهيتخطبوا بعد 14 سنة، اللي هتضر عفاريت.

بالنسبة بقى للشباب اللي عاوز يسافر أو ناوي يسافر، اقفشلك في عروسة  
قبل ما تسافر يا صاحبي، اخطب قبل ما تسافر، لأنك لما تسافر هتنزل كل سنة  
شهر، لا هتلق تخطب ولا تتعرف على بنت وتعرف مميزاتها وعيوبها وهتفضل  
تدور وتلف لحد ما تموت، وممكن تخطب واحدة وانت وحظك، يا تطلع بنت  
كويسة كدا وعلى مواصفاتك ويبقى ربنا كرمك، يا تطلع روحك وجميع  
الأرواح المحيطة بيك، وتفضل تلعن في الناس اللي عرفتها عن طريقهم.

طيب لو انت مسافر بقى ولسه مخطبتش، تعمل إيه؟

متعبدش نفسك انضم للجمعية اللي أنا أسستها. معنسين للأبد.

وشعارها يقول:

## يوميات مغترب

معانا فلوس ومستورة بس معنسين... يارب بس نجوز، ولو  
عشنا مفلسين.

نرجع بقى للشغل. إحنا المفروض مش في إجازة، فيه حجات لازم  
أخلصها وأتابع الشغل مع هريدي.

دخلت نت قلت أشوف إيه أخبار الدنيا هناك، أول ما فتحت الإيميل  
بتاعي لقيت أكثر من 15 إيميل، بقرأ أول رسالة:.....


يا انهار أبيض. إيه دا. دا اللي كنت خايف منه

انتظرونا في المقال القادم. وداعاً هـ.....»





هكذا ما رأيت في دبي



### وداعاً .. هريدي

نزلت مصر يوم الجمعة ووصلت بالليل، المفروض أريح يومين أو ثلاثة  
كدا من الشغل، طبعاً دي مكتتش أجازة، يعني المفروض أتابع الشغل وكل  
حاجة مع هريدي.

مكنش عندي إنترنت دي إس إل في البيت، فدخلت من التليفون  
الأرضي، وما أدراك ما إنترنت التليفون الأرضي، سرعة إيه، صار ووخ،  
لما كنت بحب أفتح كام صفحة، كنت بفتح اللينكات وأروح أصلي العصر  
وأقول أذكرك المساء، واجي ألاقهم فتحوا 😊.

معرفتتش طبعاً أفتح أي إيميل، ومقارنة بالإنترنت في الإمارات اللي أنا  
كنت متعود عليه، رحت قافل الجهاز وقلت بكره الصبح، أروح على أي  
نت كافيه.

تاني يوم الأحد، رحت نت كافيه في المدينة، لأن القرية بتاعتي مفيهاش  
أي نت كافيه، بين المدينة والقرية حوالي 17 كيلو، خدتهم جري في نص ساعة،  
أصلي بحب الرياضة 😊.



## يوميات مُفترب

محدث يصدق، رحت في عربية طبعًا، ووصلت انت كافيه على الساعة 10 صباحًا، أول ما دخلت لقيت دينا أونلين.

- دينا: طاررق إزيك، حمد الله على السلامة
- طارق: الله يسلمك، وأصبحنا وأصبح الملك لله، اللهم إني أعوذ بك من شر هذا اليوم وشر ما بعده. في سري طبعًا.
- دينا: كيف مصر وكيف أهلك؟
- طارق: بخير، مصر بتسلم عليك. إيه أخبار الشغل، المدير مش أونلين.
- دينا: الشغل تمام، المدير كان أونلين من شوية وخرج.
- طارق: طيب أنا هفضل أونلين اشتغل شويه، لو دخل أونلين هكلمه
- دينا: أولك.

شوفت الإيميلات بتاعتي وقعدت اشتغل في التاسكات اللي واخدها من المدير قبل ما أنزل.

على الجهاز اللي جنبي، جت بنت شباب وحماها، دخلوا نت عشان تكلم جوزها، كان مسافر السعودية، والست الحاجة بدأت تكلم ابنتها، ألووو، إزيك يا حبيبي، عامل إيه، أخبار شغلك إيه، إحنا كويسين الحمد لله، ومراتك كويسه الحمد لله، عامل إيه في الغربية يا حبيبي و.....

وعلى الجانب الآخر، شباب الثانوية العامة اللي هربانين من المدرسة يلعبوا جيمز على الشبكة.



## هذا ما رأيت في دبي

أحمد متضربش عليا نااار، كدا عاوز تموتني، طب والله منا سايبك، خد دي، تاااخ، تاااخ، تاااخ.

وأنا في النص عمال أنفخ، لا عارف أركز من الست الحاجة وصوتها العالي وهي بتكلم ابنها، ولا الشباب اللي عمالين يحاربوا ويموتوا في بعض.

عدى ساعتين والمدير دخلش أونلين، قلت لدينا: أنا هروح أكمل شغل من البيت عشان أنا في كافيه نت ومش عارف أركز كويس وبكره هدخل ثاني، لو في أي حاجة ابعتولي على الميل.

ثاني يوم. الاثنين. رحت على الظهر كدا، عشان ألاقي المدير أونلين، لقيت جايلي أكثر من 15 إيميل، استر يارب، أنا ماشي إمبارح ومكنش فيه حاجة.

لقيت كام إيميل من العملاء، وكام إيميل من هريدي، وكام إيميل من المدير وشكل هريدي محتاس هناك، وقبل ما أقرأ أي إيميل، لقيت المدير داخل أونلين وبيكلمني.

• المدير: إزيك يا طارق عامل إيه؟

• طارق: الحمد لله.

• المدير: صاحبك مش عارف يسد مع العملاء، جهز نفسك هخلص ورقك وتيجي آخر الأسبوع.

• طارق: أوك.

• المدير: أنا كنت عايز أسيبك تقضي العيد في مصر، بس أنت شايف الظروف.

• طارق: مفيش مشكلة، أنا هكلم هريدي دلوقتي وأخلص معاه المشاكل الموجودة.



## يوميات مُغترب

- المدير: أوك
  - كلمت هريدي كان أونلين.
  - طارق: إزيك ياريس، عامل إيه؟
  - هريدي: تمام الحمد لله وانت؟
  - طارق: تمام الحمد لله، إيه المشاكل دي كلها. إيه اللي حصل؟
  - هريدي: أنا اعرف يا خويا، أنت مشيت من هنا، والدنيا باظت من هنا.
  - طارق: طيب بالراحة وواحدة واحدة عشان نخلصهم.
- المشاكل ظهرت في وقت واحد عند أكثر من شركة، كل شركة تبعت إيميل ليا ولدينا، دينا تبعت الإيميل لهريدي وللمدير، المدير يبعثلي أنا وهريدي ويقول حلوا المشكلة دي في نفس اليوم وإبعثولي تقرير، وهريدي يبعثلي يقول. أنت فين يا... وسيني لوحدي، يعني الإيميل الواحد بيعجلى أكثر من 3 مرات.
- خلال يومين أو ثلاثة، أنا وهريدي حلينا كل المشاكل والحمد لله، الحاجات اللي مكنش هريدي عارفها أو هتاخذ منه وقت، كنت أنا بحلها وأبعثله الحل وهو يعمل تحديث للعميل.
- بس كان فيه 3 شركات ليها ظروف خاصة، إحدى هذه الشركات ساهمت في نهاية هريدي.
- الشركة الأولى: كانت شركة إماراتية، شركة أحد شيوخ الإمارات، مش عاوز اقول هو مين، شركة حاكم عجمان، والأرزاق بيد الله بقى 😊.



## هذا ما رأيت في دبي

واسم الشركة، مؤسسة الاستشار العقاري، وتعتبر أكبر شركة عقارات في عجمان، وبرنامج العقارات اللي احنا بنطور فيه، اتعمل من الأساس للشركة دي، وبعد كذا شركات تانية اشتrote.

طبعا الشركة دي مينفعش يبقى عندها مشكلة في البرنامج، ولو حصل عندهم مشكلة، مبنحلهاش من المكتب بتاعنا، المبرمج بيروح على مقر الشركة بسرعة الصاروخ يحل المشكلة ويصلي ركعتين شكر لله بعد ما يحل المشكلة ويرجع على المكتب.

لما بيحصل مشكلة في الشركة دي بتعامل مع اتنين، مدير الحسابات ومدير الآي تي، وهما الاتنين مصريين.

الشركة الثانية: شركة ألمانية، لسه شارين البرنامج حديثا، والشركة دي ليها موقف معايا كوميدي جدا لما كنت بشرح ليهم البرنامج قبل ما يشتروه، هتكلم عنه في المقال القادم إن شاء الله.

لما بيحصل مشكلة في الشركة دي بتعامل مع اتنين، صاحبة الشركة. (ألمانية) ومدير الآي تي (صيني).

الشركة الثالثة: شركة صومالية، يملكها بيعجي 10 صوماليين كدا، شركاء مع بعضهم، واحد واخوه وابن عمه وابن خاله، ومعاهم كام سيدة صومالية بردو، لما بيعملوا اجتماع، العمارة كلها بتسمع صوتهم.

لما بيحصل مشكلة في الشركة دي بتعامل مع إثنين، واحد من أصحاب الشركة (صومالي) ومدير الحسابات (سوداني).

لما ظهرت مشكلة في الشركة الأولى، شركة الشيخ، هريدي ترك كل

## يوميات مغترب

شيء وبسرعة الصاروخ، راح الشركة يحل المشكلة، وأخذت منه طول اليوم عشان يحلها..

في نفس الوقت البرنامج وقف في الشركة الألمانية، هريدي حاول يحلها أونلين عن طريق الدخول للسيرفربتاعهم، متحلتش، فكان لازم يروح الشركة وطبعاً دا عاوز يوم تاني لأنه كان في شركة الشيخ.

هريدي راح الشركة الألمانية تاني يوم، وحل المشكلة والأجهزة كلها اشتغلت تاني لكن اليوم كان خلص.

الشركة الثالثة: الصومالية، كان عليهم فلوس وكانوا عايزين تعديلات في البرنامج وحد يشرح لهم شوية حاجات مش فاهمينها، فكان لازم حد يروح لهم.

هريدي راح الشركة تالت يوم، وقابل مدير الحسابات (سوداني الجنسية) وكان مضايق جداً عشان بقاله 3 أيام ومحدث عبره، وبدأ يسأل هريدي على حاجات في البرنامج، وهريدي يجاوبه، فيرد عليه ويقول له بس هي المفروض متبقاش بالشكل دا، أنا عاوز غيرها، هريدي قاله، هي كدا، اشتغل عليها كدا، كل الشركات شغالة عليها كدا.

مدير الحسابات اضايق من هريدي، وسأله على حاجة تاني وكان هريدي ميعرفهاش، فهريدي قال إستنى لما اجر بها، فمدير الحسابات قاله، هو انت متعرفهاش، أmaal جاي تشرحلي إزاي. هريدي بحسن نية قاله، أصلي لسه جديد في الشركة، وفيه حاجات لسه مشتغلتش فيها، مدير الحسابات قاله: خلاص إبقى اعرفها بعدين وابقى تعالى قولي وأنا هكلم دينا بخصوص الفلوس.





ولما هريدي مشي من عنده، اتصل على دينا، وفضل يزق ليها، إنتوا باعتين واحد ميعرفش حاجة، باعتين واحد لسه جديد، باعتين واحد يتعلم فينا، أنا مش عاوز البرنامج دا، ومش دافع فلوس، وإحنا عاوزين فلوسنا وتعالوا خدوا البرنامج بتاعكو.

دينا وصلت كل الكلام دا للمدير، مع شوية شطة وفلافل وإن هريدي مش عارف يسد مع العملاء زي ما طارق كان هنا، وأنا مش عارفة أكمل شغلي وأتابع مع هريدي كل حاجة، ولازم طارق ييجي في أسرع وقت.

وما دام دينا قالت إن هريدي مش عارف يسد مع العملاء، يبقى لزقت في دماغ المدير، إن هريدي مش عارف يسد مع العملاء، حتى لو كل العملاء شكروا في هريدي.

من ناحيتي، بدأت أواظب في الشغل وأكون أونلين أكثر وقت ممكن، يا إما من كافي نت، يا إما من عند واحد صاحبي، لكن لو الأمور مستتبة ومفيش أي مشاكل، كنت بدخل نت من البيت عندي. من خط التليفون الأرضي، لأن الهدف إن المدير يشوفني أونلين، فيتأكد إني شغال.

مضى أول أسبوع بسرعة جدًّا، والحمد لله الشغل بقى تمام وهريدي شغال وأنا معاه، وموضوع سفري قبل العيد حسيت إنه إتأجل، لأن المدير متكلمش معايا خالص في الموضوع دا، ولا قاللي هسافر إمتى ولا قاللي قدمتك على فيزا ولا أي حاجة.

كنت كل يوم بدعي يارب ينسى، يارب ما يفتكر، يارب ما يبعثليش قبل العيد، يارب عاوز أعيد في مصر، يارب عاوز آخذ عيدية من أمي وأبويا.

## يوميات مُغترب

أيوه هاخذ عيدية من أمي وأبويا، ومحدث يبص كدا ويضحك، أنا مهما كبرت صغير، أنا مهما عليت مش فوق، مش ممكن يوم هتغير الدنيا غروب وشروق ☺. في بداية الأسبوع الثاني، لقيت المدير بيكلمني وبيقولي إن «هريدي مش كويس وانت ضحكت عليا لما قلتلي إنه كويس».

مردتش على المدير، أنا كنت عارف هو بيقول كدا ليه، كنت حاسس إنه مش هيقدم لهريدي على الفيزا وإن هريدي هينزل مصر بعد انتهاء الزيارة، وإنه بيقول كدا عشان يمهد للموضوع دا.

أنا عارف هريدي كويس، وعارف شغله كويس، وهو مأخذش فرصة زبي، وحظه كمان إنه كان لوحده في رمضان، بس إحساسي إن المدير مكانش عاوز هريدي يكمل في الشغل، عشان هريدي بيطلب كثير ويبرد كثير، غير إن دينا مش طايقاه من الأول، زي ما اتكلمنا على الموضوع دا قبل كدا في مقالات «هريدي والمدير».

اتكلمت مع هريدي وبدأت أمهدله إن المدير مضايق وقلقان منك وممكن تنزل مصر بلا عودة، حاول تستفسر منه وطمنه من ناحيتك.

وكان رد هريدي: أنا لو مشيت هبقى فرحان، أنا اتخنقت من الشغل معاه أصلاً، ونفسييتي تعبت.

رد هريدي كان دايمًا كدا، حتى وأنا في دبي، لما كنت أقوله غير طريقتك في الكلام مع المدير، متطلبش حجج من المدير قبل ما الإقامة بتاعتك تطلع، ممكن يسفرك، يقولي، أنا ممكن ارجع من الصبح على مصر والشركة اللي كنت فيها تتمنى رجوعي ومتنساش إنهم عرضوا عليا زيادة 1000 جنيه عشان

## هذا ما رأيت في دبي

مش أسافر، وكنت أرد عليه، لو كنت راجل إعملها دلوقتي وانزل ولو ادوك الزيادة دي، هديك 1000 درهم من مرتبي كل شهر، دول كانوا بيضحكوا عليك عشان مش تسافر، ولو رجعت دلوقتي ممكن ينقصوا مرتبك كمان، عشان هيقولوا عليك فشلت في السفر.

بعد يومين، لقيت المدير بعثلي رسالة وبيقولي استلم كل الشغل اللي مع هريدي وراجع كل حاجة معاه وابعثلي تقرير، أي نقص في الشغل هيكون على مسئوليتك.

كلمت هريدي، إيه اللي حصل، قاللي إن المدير بعثله رسالة إني مش هكمل في الشركة وهنزل مصر مع نهاية الزيارة.

نهاية الزيارة بتاعة هريدي كانت يوم العيد بالضبط، فهريدي طلب من المدير تقديم الزيارة، عشان ينزل قبل العيد والمدير وافق وهريدي غير الحجز على 26 رمضان.

لو تفتكروا، المدير كان قال قبل كدا، لو هريدي مكملش في الشركة، هيتحمل كل المصاريف، من أول الفيزا الزيارة والتذكرة والسكن، يعني في الآخر هيطلع مديون، ودي نقطة كانت قلقاني جدًا بخلاف الزعل إن هريدي هينزل ومش هيكمل.

هريدي قاللي حاول تشوف المدير ناوي على إيه في النقطة دي، لما اتكلمت مع المدير، قاللي المفروض إنت اللي تتحمل كل المصاريف، عشان إنت اللي جايه، قلت نعم؟ خدوهم بالصوت ليغلبوكوا ولا إيه؟ رديت على المدير وقلت، حضرتك لما نزلت مصر وعملتله إنترفيو، كان لازم عمله كل

## يوميات مُغترب

الاختبارات سواء تيكنيكال أو كومينيكيشن قبل ما يسبب شغله في مصر، هو دلوقتي هينزل مصر يا عالم هيعرف يرجع شغله ولا لا.

المهم المدير قال خلاص، أنا هديله كل حقوقه، وبعد كدا لما تجيب حد تبقى تتأكد منه، قتلته، دي آخر مرة، حضرتك عاوز تجيب، جيب، أنا معدش ليا أصدقاء مبرمجين، أنا أصلاً مقطوع من شجرة ☺.

المدير قال لدينا اقعدي مع هريدي وشوفي حسابه كام واديهوله، قعدت مع هريدي وطلبت منه كشف حساب بالمصاريف بتاعته، هريدي قدملها ورقة فيها المصاريف، اللي هي في الأساس أجرة التاكسيات من الشركة أو البيت للعملاء، لما دينا بصت في الكشف ولقيت إن الحساب معدي الـ 500 درهم، قالت لهريدي: أنا عاوزة الفواتير اللي بتأخذها من التاكسي وانت بتحاسب عشان أراجع المبلغ دا.

طبعا أنا موصي هريدي قبل ما انزل، إنه ياخذ فاتورة من التاكسي عشان المدير أو دينا ميعملوش معاه الدنيئة ويقولوا لو مفيش فواتير مش دافعين، المدير قادر ويعملها.

هريدي راح مدخل إيده في جيب شنطة اللاب توب، وراح طالع برزمة فواتير، حطها على مكتب دينا، وراح مدخل إيده مرة ثانية وطاقع برزمة فواتير وحطها على مكتب دينا.

المكتب اتفرش ورق، ودينا من النوع اللي بيقرف من أي حاجة، ومبتحبش حد يستعمل أي حاجة ليها، بصت للمكتب، وبعدين بصت لهريدي، وقالت خلاص خلاص مش ضروري، شيلهم بلييز.



## هذا ما رأيت في دلي

كلمت هريدي بعد ما خلص الحساب مع دينا واتفقت معاه يبعثلي تقرير بكل الشغل الي عمله وهستلم منه السورس كود بتاع البرنامج لما ينزل مصر ونقعد قعده مع بعض كدا.

يوم السفر، دينا وصلت هريدي للمطار، وقبل ما ينزل من العربية قالها كلمتين من ورا ظهره، أنا كنت سعيد بمعرفتك، وإن شاء الله أشوفك تاني قريب.

دينا أول ما سمعت هريدي يقول «وإن شاء الله أشوفك تاني قريب»، اعتقدت إن هريدي مش عارف إنه نازل نهائي، فردت عليه وقالت، كيف يعني، أنت نازل نهائي، أكيد قصدك أشوفك بمصر، مو هيك؟

هريدي كان عاوز يضربها، رد وقال، إنت تنوري مصر، فكري تنزلي سياحة مصر، وفي سره يقول «وحياة أمك لأوريكي النجوم في عز الظهر لو فكرتي تنزلي القاهرة المعز».

• اوك هريدي، دير بالك على حالك.

• أوك دينا مع السلامة.

تقابلت مع هريدي تاني يوم، سلمني كل الشغل على فلاشة.

سألته، أخذت كل فلوسك، قاللي: ولاد ال.....، خصموا مني التلات أيام الي أنا قدمت فيهم التذكرة، ضحككت وقلتلته، حقهم مش إنت الي طلبت مرتب على ال 4 أيام في الشهر، وبعدين إحمد ربنا إنك أخذت مرتب أساسًا.

بعدين قاللي، بس تصدق يا طارق، أول مرة أحس إن دينا أنشي وهي بتقولي في المطار «دير بالك على حالك يا هريدي»، كان نفسي أقولها متخفيش يا حبيبتني.



## يوميات مُغترب

- قتلته: حبك برص، حبيبتك بأماراة إيه، دي تلاقيها زغردت أول ما الطيارة بتاعتك اتحركت.
  - قال، يلا يلا ربنا يسامحها.
  - قتلته: متخافش، هعلمها لك الأدب بس لما ارجع دبي.
  - قاللي، يا خوفي، هي تعلمك الأدب.
  - قتلته، مش كل الطير اللي يتاكل لحمه يا هريدي ☺.
- طبعا كان موقف مؤلم جدّا، وحش بكل المقاييس، أنا كنت حاسس بالحزن في عيون هريدي، هو كان بيحاول يظهر إنه مش فارق معاه، بس أنا كنت حاسس بنبرة صوته.
- قاللي متقولش للشباب أو أي حد من صحابنا إني نزلت ومش هرجع دبي تاني، لو حد سألك، قوله إني نازل أجازة لما الفيزا تخلص، عشان الزيارة خلصت، وأنا هحاول أروح الشركة القديمة، وربنا يسهل وأرجع الشغل تاني.
- هو الحمد لله دلوقتي... رجع شركته القديمة تاني، عمل عليهم لعبة بذكاءه، قالهم إنه نازل عشان يعمل الفيزا، وهو مستعد يرجع الشغل تاني لو هما محتاجينه، أصل الغربة مش كويسة، لكن لو مرجعتش، خلاص شهر الفيزا هتكون خلصت وهسافر، وهما رحبوا بيه ورجع الشغل تاني، لكن موضوع الزيادة اللي كانوا عرضوه عليه اتلغى، قالوله دا كان عرض وانت رفضته.
- بعد كدا هريدي سافر إعاراة تبع شركته على الكويت، ونزل مصر وطلع إعاراة على السعودية ومبسوط والحمد لله.





## هذا ما رأيت في دبي

بعد ما رجع شغله بفترة، قاللي، حاول تحافظ على شغلك، الفشل... إحساس وحش جدًا جدًا يا طارق، كونك تحس بالفشل في عيون اللي حوليك، أصعب 100 مرة من الغربة اللي شفناها.

قلته معلش يا صاحبي، أهى تجربة وعدت، ومحدث بيتعلم بالساهل.

انتظروا المقال القادم بعنوان «العميل الألماني» وفيها

وما إن فُتح الباب حتى وجدت امرأة شديدة الجمال، وفي كامل زينتها، ترتدي ملابس قصيرة جدًا، تراجعت للوراء وقلت في نفسي «اللهم إني صائم، إحنا مش في رمضان ولا إيه»، ثم بادرتها بسؤالي:

- Is this (...) Company ?

فردت قائلة:

- Yes. Are you Tarek ?

قلت بصوت خافت، يكاد يكون منعدمًا:


- Yes

ضاع صوتي من هول الموقف، فهي المرة الأولى التي أسمع فيها اسمي بهذه الطريقة، فقد تحول اسمي من «طارق» أو «طططارق»، إلى «تارك»، «تاررررك»، «ترك»، وكأني أصبحت شخصًا آخر 😊.

دخلت الشركة بطيء الخطى، أقدم ساق وأأخر ساق، وإذ بي أتفاجئ بـ 3 سيدات أكثر جمالًا من التي فتحت لي الباب، قلت في نفسي، يا منجي من المهالك يارب، إنهم غنيمة لي، حلال الله أكبر.

إلى اللقاء في الجزء الثاني من «هذا ما رأيت في دبي».





## المحتويات

3	مقدمة .....
5	البداية: البحث عن فرصة سفر .....
7	في المطار .....
11	اليوم الأول في الإمارات .....
15	في السوبرماركت .....
16	في التاكسي .....
18	في التاكسي (الوش الثاني) .....
22	في الشركة .....
26	والا عقدااه .....
29	وتتوالى الاختبارات .....
33	تاسك تفوت ولا حد يموت .....
38	إبسطها يا باسط .....
44	دبي يا اسطه .....
57	طيرانت .....



Inv:7643

Date:27/4/2014 هذا ما رأيت في دب

64	وجهاً نظر .....
71	الفترة الانتقالية .....
76	هريدي .....
83	هريدي في دبي .....
89	هريدي والتاكسي .....
96	انتظار في المطار .....
106	هريدي والمدير.. الجزء الأول .....
115	أسبوع من العذاب .....
123	مائدة الرحمن .....
128	هريدي والمدير.. الجزء الثاني .....
137	عزومة المدير .....
147	عزومة العميل .....
149	المسافر .....
160	بيان رئيس المدونة .....
163	جاي في السريع.. الجزء الأول .....
173	جاي في السريع.. الجزء الثاني .....
186	وداعاً.. هريدي .....





# هذا ما رأيته في دبي

... وأنا داخل لقيت واحد بيقولي انت رايع دبي قلت أيود قال طيب خد البنت دي معاك عشان مسفرتش لوحدها قبل كدا قلت ماشي ، قال يعني أنا اللي سفرت قبل كدا ، يلا يا بنتي رزقي ورزقك على ربنا . خلصنا الإجراءات ورحنا نستنا الطائرة . ومكنش معايا التليفون ، قلتها ممكن أكلم أهلي دقيقة عشان أطمئنهم ويمشوا ، أهو نستفاد منها بحاجة ، قالت شوور اتفضل ، بس اكتب ٠٠٢ قبل الرقم عشان دا خط دولي ، قلت إيه الإحراج دا ، بردوو هتصل . واحنا قاعدين بدأنا نتكلم وهي ما صدقت اني أسألها سؤال .

مصرية عايشة في دبي وكانت نازلة زيارة لجدها وفضلت تكلمني عن الفرق بين مصر ودبي بطريقة استفزتني لما كنت هضربها ، بس قلت مينفعش دي أمانة .

فضلت تحكي ، الزبالة بتترمي في الشارع ، مفيش عداد في التاكسي والسواق بيتحكم فيك ، الشباب والمعاكسات وقلة الأدب ، وتروح تاكل في مطعم تلاقي الفاتورة طالع فيها ضريبة ، وأنا أدافع لالالا مصر دي أمي ، متقوليش كدا ، لالالا ، ولكن لا حياة لمن تنادي . وأول ما وصلت دبي قلت فعلا عندك حق والله بس بردوو فضلت مصر أمي بس في الرضاعة .....

بهذا الأسلوب يحكي لك المهندس طارق عبد العال قصة سفره كانت حلما تحول لكابوس ثم ما لبث أن باتت دبي أحب بلاد الله ثم تفكر في السفر فعليك قراءة الكتاب ومعرفة خبرة أخيك طارق .  
٢٠ ألف متابع لمدوناته على الفيس بوك من جميع دول الوطن العربي



للطلب والاستفسار اتصل على

**16766**

[www.nahdetmisr.com](http://www.nahdetmisr.com)  
our page/nahdet misr group

